

1ሳሜላ ማጽፋ ጊደ ቆፋ

ሳሜላ ማጽፋ ኮይርዚ ኢስራኤል አሳይ ዳናታ አይሶ ዋጋፔ ጌዴ ካዎይ አይሲዛ ዋጋን ፒኒዳ ሃናታ ቆንጨሴስ። ሄሳ ማላ ላሜይ ኢስራኤልን ሃናናስ ዳንዳይዳይ ዳሮ ባጋ ሄቹ አሳታ ጋሶና። ሄይቲካ ኮይርዚ ወርሴላን ዴንዲዳ ጌታ ዳናታፔ ኢሶይ ሳሜላ፤ ናምእንሶዚ ኢስራኤልስ ኮይሮ ካዎ ጌዲዳ ሳኦሌ፤ ሄቫንሶዚ ኢዚ ማታ ኦይካናፔ ካሴ ኢዛ ታሪኬይ ሳሜላ ታሪኬራኔ ሳኦሌ ታሪኬራ ኢሲፌ ኦይኬቲ ዲዛ ዳዊቲ።

ሃይሳ ሃ ማጽፋስ ዋና ኪታይ ጋልእ ጫቆ ማጽፋን ዲዛ ሃራ ታሪኬ ማጽፋታ ማላ ጸሳስ አማኔቲላይ ኣንጆኒኔ ሎኦ ዲሳን ጋሴስ፤ አዛዜቲል ኢጶይካ ኩንዴላሲኔ ባሻሽ ጋሊዛይሳ ቤሴስ፤ ሄሲካ ጸሳይ ቄሴ ኤሌስ፡ «ታና ቦንቺዛይታ ታ ቦንቻና፤ ታና ካቂዛይታ ታኒ ካወሻና» ጌዲ ኢዚ ዮቲዳ ቃላይ ቆንጨ ቤቲዴስ። (2:30)

ሃይሲ ሃ ማጽፋይ ካዎይ ዋኒ ካዎታናኮ ዲዛ ዲማ ዲማ ቆፋታ ቆንጨሴስ፤ ሄሳፌ ሲንሴ ኢስራኤልን ቱሙ ካዎ ጌቲቲ ኤሬቲዳይ ጸሳ፤ ጌዶ ኣቲን ጉዩፔ ዴሬይ ኦይቺዳ ኦይሾ ጋሶን ጸሲ ኢስታስ ካዎ ዶሪዴስ። ሄሳ ጌዲኮካ አይፌ ዮኦይ ካዎዛፔኔ ኢስራኤሌ ዴራፔ ቦላራ ፒርዲዛ ጸሳ ጋርሳን ኢስቲ ዲዛይሳ (2:7-10)። ሄሲካ ጸሳ ዋጋ ጌደን ዴሬታ ጌዲን ዎይኮ ማንቆታ ጌዲን ኢስታ ማታይ ኢሲ ጌና ናጌታናስ ቤሲዛይሳ ኤሪሴስ።

ሃ ማጽፋይ ኦይኪዳ ኩሜሳ ቆፋ

ሳሜሊ ኢስራኤሌ ካሌሊዛዴ ጌዴል 1:1—7:17

ሳኦሌ ካዎቲል 8:1—10:27

ሳኦሊ ዴራ አይሲዳ ኮይሮ ላይላታ 11:1—15:25

ዳዊቲኔ ሳኦሌ 16:1—30:31

ሳኦሌኔ ኢዛ ናይታ ሃይቆ 31:1-13

ሂልቃናኔ ኢዛ ኬላ አሳታ

¹ ኤፍሬሜ ዴሬን ኤራማቴ-ዙፊሜ ጌቲቲዛ ሻራ ሚንሶን ዲዛ ሂልቃና ጌቲቲዛዴይ ዴስ፤ ኢዚካ ኤፍሬሜ ዴሬ አሳ፤ ኢዚ ዪርሃሜ ና፡ ኤሊሁ ና፡ ቶሁ ና፡ ዙፌ ና።

² ኢዛስ ሃናኔ ፊናና ጌቲቲዛ ናምኤ ማቺቲ ዴቲስ፤ ፊናናስ ናይቲ ዴቲስ፤ ሃናስ ጌዲኮ ኣይኮ ናይካ ዴና።

3 ሂልቃናይ ኡባ ዳንዳይዛ ጎዳ ጎይናናሲኔ ኢዛስ ያርሾ ሺሻናሰ ላይላን ላይላን ባ ዲዛ ካታማፔ ፑዴ ሴሎ ኬዘስ፤ ሄን ኤሌ ና ናምኣቲ ኣፊኔይኔ ፊኒሃሲ ጎዳ ቄሴታ።

4 ሂልቃናይ ሴሎ ቢዲ ያርሾ ያርሺዛ ዋዴይ ጋኪዳ ዋዴ ኡባን ባ ማቾ ፊናናሰ፡ ኢዚ ኣቱማ ናይታሲኔ ማጫ ናይታሰ ኡባሰ ኣሾዛፔ ኢሰታ ጋኪዛ ገሻ ኢሰታሰ ኢሜሰ።

5 ጊዶ ኣቲን ኢዚ ሃና ሲቁዛ ገሻሰ ኣሾዛፔ ኢዚሰ ናምኡ ኩሼ ኢሜሰ፤ ጊዲኮካ ጎዳይ ኢዞ ማይኒሲ ዋሊዴሰ።

6 ጎዳይ ኢዞ ማይኒሲ ዋሊዳ ገሻሰ ኢዚ ዳዉላያ ኢዞ ሃንቁላዉሲኔ ዩሎቻዉሰ።

7 ሄሲካ ላይላን ላይላን ፓጮይ ባይንዳ ሃኔሰ፤ ሃናይ ጎዳ ኬላ ዩዛ ዋዴ ኡባን ኢዛ ዩካናሼኔ ካላ ሙሲ ኢዞ ጸናናሼ ጋካናሰ ዳዉላያ ኢዞ ዩሎቻዉሰ።

8 ሄሳ ጌዶን ኢዚ ኣዚና ሂልቃናይ ኢዞ፡ «ሃኔ! ኣይሰ ዩካይ? ኣይሰ ካላ ሚኪ? ኔ ዋዚናይ ኣይሰ ጨጨዜ? ታኒ ኔሰ ታሙ ኣቱማ ናይታፔ ኣጂኪና?» ገሼ ታኪዴሰ።

ሃናይ ጎዳኮ ሺሺዳ ዋሳ

9 ኢሲ ጋላሰ ኢሰቲ ሴሎን ዲሼ ሚዲኔ ኡዩዳፔ ጉዬ ሃናይ ዴንዳ ኤቃዲሰ። ሄ ዋዴ ቄሴ ኤሌይ ጸሳ ኬላ ፔንጌን ቆሲላላ ኣቻን ኦይዴ ቦላ ኡቴላን ዴሰ።

10 ሃናይ ኢዚ ዋዚናይ ሜቂዳ ገሻሰ ሂቂማ ዩካሼ ጎዳ ዋሳዲሰ።

11 ኢዛካ፡ «ኡባፌ ዋልቃማ ጎዳዉ ታና ኔ ኣይሌይ ካዉሻቴላ ኔ ሃ ጸላዳ ታና ኔ ቆፒኮኔ ታና ኔ ኣይሌዮ ባሎንታ ኔ ታሰ ኣቱማ ና ኢሚኮ ኢዚ ባ ዴኦ ላይላ ኡባን ኔሰ ጊዳና ማላ ታኒ ኢዛ ጎዳሰ ኢማና፤ ማጋላይካ ኢዛ ሁኤ ቢናና ቦቹና» ጋዉሰ።

12 ሃናይ ጎዳ ኣጎንታ ዋሳሼ ታኪን ኤሌይ ኢዚ ዶና ጸሊዴሰ።

13 ሃናይ ኣይኮካ ቃላ ሲሶንታ ዋዚናን ዋሲዛ ገሻሰ ኢዚሰ ሜቴርሻይ ጸላ ቃጾሰ። ሄሳ ገሻሰ ኤሌይ ኢዞ ማፅቲዳ ኣሳ ማላ ቆዲዴሰ።

14 ኢዚካ ኢዞ፡ «ሃኔ ኔ ኣይዴ ጋካናሰ ሃይሳላ ማፅታኔ? ኔኒ ሄሳ ዋይኔ ኡሻ ኔፔ ዲጋ!» ገዴሰ።

15 ሃናይካ ኢዛሰ፡ «ታ ጎዳዉ ታ ማፅታቤኬ፤ ታኒ ኬሂፔ ዋዚናይ ሜቂዳ ማጫሳ፤ ሄሳ ገሻሰ ታኒ ታ ዋዚና ጎዳ ሲንላን

ሚጫይሲፌ ኣቲን ዋይኔ ኡሹ ጊዲን ዋይኮ ሃራ ማሶሲዛ ኡሹ ታ ኡያቤኬ።

16 ታኒ ሃይሳ ኬና ኣዱሳ ዋሳ ዋሲዳይ ዴጾ ሜቶይኔ ጨጨይ ታና ጋኪዳይሳፌ ዴንዲዳይሳን ጊዲዳ ጊሻሰ ታና ኔ ኦሳንቻዮ ኢሲ ጎኣይ ባይንዳ ሹፋሮ ማጫሳ ማላ ቆዶፓ» ጋዱስ።

17 ኤሌይካ ኢዞ፥ «ሳሮን ባ፥ ኢሰራኤል ጸሲ ኔ ዋሶይሳ ኔሰ ኢሞ» ጊዴስ።

18 ኢዛካ ኢዛስ፥ «ኔ ኣይሌያ ኔ ሲንላን ቲማ ዴሙ!» ጋዱስ። ኢዛ ዴንዳዳ ባ ኦኔ ባዱስ፤ ካሊካ ማዱስ፤ ሃሳፌ ጉዬ ኢዚ ቦላ ጨጨይ ቤቲቤና።

ሳሜል ዬሌቴል

19 ዋንቴላ ጋላስ ሂልቃናይኔ ኢዛሶ ኣሳይ ማላዶ ዋንታራ ዴንዲዳ ጎዳ ጎይኒዳፔ ጉዬ ባንታሶ ጌዴ ኤራማ ቢዳ፤ ሂልቃናይ ባ ማቾ ሃናራ ኣቂዴስ፤ ጎዳይካ ኢዞ ቆፒዴስ።

20 ሂሰቲን ሃናይ ቃንላታዱስ፤ ኢዚሰ ዋዴይ ዉሪን ኣቲማ ና ዬላዱስ፤ ናዛ ሱንላካ፥ «ጎዳፔ ዋሳዳ ዴማዲስ ጋሼ ሳሜል» ጋ ሱንላዱስ።

ሃናይ ሳሜል ጎዳስ ኢማዱስ

21 ሂልቃናይ ጎዳስ ላይላን ላይላን ሺሺዛ ያርሾዛ ያርሻናሲኔ ባ ኣዲኔቲዳ ኣዲና ጋላናስ ባሶ ኣሳ ኡባ ኤኪዲ ሴሎ ኬዚዴስ።

22 ጊዶ ኣቲን ሃናይ ኢስታራ ባቤኩ፤ ኢዛ ባ ኣዚናስ፥ «ዪጳዚ ጳንል ዱሊዳፔ ጉዬ ታኒ ኤፋዳ ጎዳ ሲንል ሺሻና፤ ኢዚካ ባ ዴኦ ላይል ኡባን ሄን ዴኣና» ጋ ዮታዱስ።

23 ኢዚ ኣዚና ሂልቃናይካ ኢዚስ፥ «ኔሰ ሎኦ ሚሳቲ ቤቲዳይሳ ኦላ፤ ኔ ጳንል ዱላናሺ ጋካናስ ሃይሳን ታካ፤ ጸሲ ኔሰ ኢሚዳ ሂዶታ ቃላ ጸላ ፖሎ» ጊዴስ፤ ሄሳ ጊሻሰ ሃናይ ዪጳዛ ጳንል ዱላናሺ ጋካናስ ባሶን ኡታዱስ።

24 ናዚ ጳንል ዱሊዳፔ ጉዬ ኢዛራ ሄሹ ላይላ ዋፋኖ፥ ታሙ ኪሎ ጳሌኔ ኢሲ ሉካሞ ኩሜል ዋይኔ ኡሹ ኤካዳ ጌዴ ሴሎን ዲዛ ጸሳ ኬል ኤፋዱስ፤ ናዚካ ቡሮ ዪጳ።

25 ኮርማዛ ሹኪዳፔ ጉዬ ዪጳዛ ኤኪዲ ኤሌኮ ሺሺዳ።

26 ሃናይካ ኤሌ፥ «ታ ጎዳዉ፥ ሼሞፖ ጋሞኣ፤ ሃይሳን ኔ ሲንላን ኤቃዳ ጎዳ ዋሲዳ ማጫሳያ ታናኮ!

27 ሄ ዋዴ ሃይሳ ሃ ናዛ ኢማና ማላ ዋሳዲስ፤ ጎዳይካ ታ ዋሲዳይሳ ታስ ኢሚዴስ።

28 ሄሳ ጊሻስ ታኒካ ሃኢ ዛራዳ ጎዳስ ኢዛ ኢማይስ፤ ኢዚ ባዴኦ ላይሰ ኡባን ጎዳስ ኢማቲዳይሳ ጊዳና» ጋዲስ፤ ሄሳፌ ጉዬ ሄን ጎዳስ ጎይኒዳ።

2

ሃና ዋሳ

1 ሃናይ፥ «ታ ዋዚናይ ጎዳን ኡፋዬቲዳስ፤
ታ ካጨይ ጸሳን ጶቁ ጶቁ ጊዳስ፤
ኔኒ ታና አሺዳ አሾን
ታኒ ኡፋዬቲዳ ጊሻስ
ታ ዶናይ
ታ ሞርኬታ ቦላ ዶዬቲዳስ።

2 «ጎዳ ማላ ጌሺ ኦኒካ ዴና፤
ኔፔ አቲን ሃራይ ዴና፤
ኑ ጸሳ ማላ ዛላይ ዴና።

3 «ሃይሳ ማላ ኦቶርን ሃሳዮፕቲ፤
ሃይሳ ማላ ጨቁቲፋ ቃላይ
ኢንቲ ዶናፔ ኬዞፖ፤
ጋሶይካ ጎዳይ ኢዚ ኤራ፤
ኦሶ ኡባ ኢዚ ጌዳሬስ።

4 «ዋልቃማታ ቶራይ ሜቄሬቲዳስ፤
ዳቡራንቻቲ ጊዲኮ
ዋልቃ ዴሚዳ።

5 ካሴ ካሊዳይቲ ጋፊዲ
ሃኢ ካሳስ ሃሬቲዳ፤
ካሴ ጋፊዳይቲ ሃኢ ካሰ ካሊዳ፤
ማይኔያ ሃኢ
ላፑን ና ዬላዲስ፤
ዳር ናይታ አዬያ
ሃኢ ዬሎ ጳያዲስ።

6 «ጎዳይ ዋዴሲኔ ፓሌስ፤
ዱጌ ዱፎን ጌልፋሲኔ ኬሴስ።

7 ጎዳይ ማንቄሌስኔ ዱሬሴስ፤
ካዉሼሲኔ ጌታሴስ።

8 ኢዚ ማንቆ ጉዲላፌ ዴንሴስ፤
 ኣይኮይካ ባይንዳ ማንቆዛ
 ቶቁ ቶቁ ሂሰቲስ፤
 ባ ሹሜታራካ ኢሲፌ ኡቲሴስ፤
 ቦንቾ ኣራታካ ላቲሴስ።

ጋሶይካ ቢታ
 ዮቻቲ ጎዳሳ፤
 ኢዚ ኣላሜ ኢስታ ቦላ ዋሒዴስ።

9 «ኢዚ ጌሻታ ቶሆ ናጌስ፤
 ኢታቲ ጊዲኮ ቶማን ዩጌታና፤
 ኣሲ ባ ዋልቃን ጸኔና።

10 ጎዳራ ኤቄቲዛይቲ ሊቃና፤
 ኢዚ ኢስታ ቦላ ሳሎፔ ጉማና፤
 ጎዳይ ቢታ
 ጋጸ ጋካናስ ፒርዳና፤
 ኢዚ ካዋዛስ ዋልቃ ኢማና፤
 ኢዚ ቲዬቲዳይሳ ካጩ
 ቶቁ ቶቁ ሂሰታና»
 ጋ ዋሳዲስ።

11 ሄሳፌ ጉዬ ሂልቃናይ ባሶ ኤራማ ቢዴስ።
 ናዚ ሳሜሊ ቄሴ ኤሌ ሲንፋን ዲሼ ጎዳስ ሃጋዜስ።

ኤሌ ናይታ ኢታቲስ

12 ኤሌ ናይቲ ሹፋርታ፤ ጎዳስካ ያዬቲና።

13 ሄ ዋዴ ቄሴቲ ዳራራ ዲዛ ኢሲፌቲፋን ፖሊዛ ዋጋቲ ዳቲስ፤
 ኣይ ኣሲካ ያርሾ ሺሺዛ ዋዴ ኣሾይ ዶይሴቲሺን ቄሴዛ ኦሳንቻይ
 ሄቩ ኣቻራ ዲዛ ቃጼ ኤኪዲ ዬስ።

14 ኢዚካ ቃጼዛ ዲጌ ዲስቲዛን ዋይኮ ጸርዛን፣ ኦቶዛን ዋይኮ
 ባፋዛን ዬዴስ፤ ሄሳፌ ጉዬ ቃጼዚ ኤኪ ኬዚዳ ኣይ ኣሾካ ቄሴዚ
 ባስ ኤኬስ፤ ኢስቲ ሴሎ ዬዛ ኢሰራኤሌ ኣሳ ኡባ ሄሳ ማላን
 ሞኬቲስ።

15 ጊዶ ኣቲን ሃንዳዚ ጸጌታናፔ ሲንፋን ቄሴዛ ኦሳንቻይ
 ዬዲ ያርሾዛ ሺሺዛዴ፣ «ቄሴዚ ቃዬፔ ኣቲን ዶይሴቲዳ ኣሾ ኔፔ
 ኤኮንታ ጊሻስ ቄሴዛስ ጸጻና ኣሾ ታስ ኢማ» ጌስ።

16 አዳዲስ፡ «ኮይሮ ሃኒዳይ ጽጌቶ፤ ሃሳፌ ጉዬ ኔ ኮይዛይሳ ኤካንዳሳ» ጊኮካ ቁፅዛ ኦሳንቻዚ፡ «አካይ! ሃኢ ታሰ አማ! ኔ አሞንታ አጊኮ ታ ዋልቃራ ኤካና» ጌሰ።

17 ጎዳሰ ሸቂዛ ያርሾዛ ሃሳፉ ሂሰቲ ካጺዛ ጊሻሰ ኤሌ ናይታ ናጋራይ ጎዳ ሲንፋን ኬሂ ዳጾ ጊዲዴሰ።

ሴሎን ሳሜላ ዱሰ

18 ሳሜሊ ቡሮ ዮጋቴፋን ዲሼ ላይኖፔ ዳዴቲዳ ማይኦ ማይኢዲ ጎዳ ሲንፋን ኦፊሰ።

19 ኢዛ አያ ባ አዚናራ ላይፋን ላይፋን ሺሺዛ ያርሾ ሺሻናሰ ቢዛ ዋዴ ኡባን ኢዛሰ ቦላራ ማይኦናሰ ቁሬ ማይኦ ዳዲሳ ኤካ ያወሰ።

20 ኤሌይ፡ «ዋሳን ኢዛ ጎዳፔ ዳማዳ ዛራ ጎዳሰ አሚዳ ሃ ናዛ ቆጼ ጎዳይ ሃ ማጫሳይፌ ሃራ ዩሎ ኔሰ አሞ» ጊሼ ሂልቃናኔ ኢዛ ማቼዮ አንጄሰ፤ ሃሳፌ ኢሰቲ ጉዬ ባሶ ሲሚ ቢዳ።

21 ጎዳይ ሃና አንጄዴሰ፤ ኢዛ ቃንፋታዳ ሄቹ አቱማ ናይታኔ ናሞኡ ማጫ ናይታ ዩላዱሰ፤ ዩላጋ ሳሜሊካ ጎዳ ሲንፋን ዲጨዴሰ።

ኤሌኔ ኢዛ ና ናሞኦታ

22 ሄ ዋዴ ኤሌይ ኬሂ ጨሚዴሰ፤ ኢዛ ናይቲ ኩሜፋ ኢሰራኤሌ ቦላ ኦፊሼ ዲዛይሳ፡ ጋይቶቴፋ ዱንካኔዛ ፔንጌን ኦፊዛ ማጫሳታራ ኢሰቲ ላይማቲዲይሳ ሲዪዴሰ።

23 ሄሳ ጊሻሰ ኢዚ ኢሰታሰ፡ «ኢንቴ ኦፊዛ ኢታ ኦሶዛ ኩሜፋ ዳራፔ ታ ሲያይሰ፤ ኣይሰ ሃይሳ ማላ ኦፊቲ?

24 ታ ናይቶ ሊኬ ጊዴኬታ፤ ጎዳ ዳራ ጊዶን ኢንቴ ጊሻሰ ላሌቲዳ ዋሬይ ሎኦ ጊዴና።

25 አሳዴይ ሃራ አሰ ቆሂኮ ጎዳይ ኢሰታ ጊዶን ፒርዴሰ፤ ጊዶ አቲን አሲ ጎዳ ቆሂኮ ኦኒ ኢዛሰ ጋናታኔ?» ጊ ሃንቄቲዴሰ። ጊዲኮካ ጎዳይ ኢሰታ ጳይሳና ኮዪዳ ጊሻሰ ኢሰቲ ባንታ አዋ ሴራ ኤኪቤቴና።

26 ዩላጋ ና ሳሜሊ ጌሳኒኔ ቴማን ጎዳ ሲንፋኒኔ ኣሳ ሲንፋን ዲጨ ዲጨ ቢዴሰ።

ኤሌሶ አሳ ቦላ ዮቴቲዳ ቲንቢቲ

27 ሄ ዋዴ ጳሳፌ ኪቴቲዳ ኢሲ ናቤይ ኤሌኮ ዩዲ፡ «ጎዳይ፡ ኒኔ አዋ ሶ አሳይ ካሴ ጊብጾን ፓሮኔ ኩሼን ዲዛ ዋዴ ታና ኢዛሰ ቆንጨሳቤኪና?

28 ኢዚ ታሰ ቄሴ ጊዳና ማላ፥ ታሰ ያርሾ ያርሺዛሶዛ ቦላ ኢዚ ኬዛና ማላ፥ ኤጳኔ ጨዋሳና ማላ፥ ታ ሲንላንካ ኤፋዴ ማይኣና ማላ ኢስራኤል ቆሞታ ኡባ ጋርሳፌ ታ ኔ ኣዋ ዶራዲስ። ኢስራኤል ኣሳይ ታማን ጹጊ ሺሺዛ ያርሾ ኡባ ኔ ኣዋ ኬላ ኣሳሰ ኢማዲስ።

29 ታ ኣቂዛ ኬላን ሺቃና ማላ ታ ኣዛዚዳ ያርሾዛኔ ካላዛ ኣይሰ ካጲዳቲ? ኔኒኔ ኔ ናይቲ ታ ዴሬ ኢስራኤልይ ሺሺዳ ያርሾ ኡባፌ ሙሩታ ሙሩታ ዶሪ ሚዲ ኢንቲ ሞላቲዳታ፤ ኔካ ታፔ ኣላዳ ኔ ናይታ ኣይሰ ቦንቻዲ?» ጌሰ።

30 «ሄሳ ጊሻሰ ጎዳ ኢስራኤል ጸሳይ፥ ሩኔ ኬሊኔ ኔ ኣዋ ኬላ ኣሳይ ታ ሲንላን ሜርናሰ ሃጋዛና ማላ ሂዶታ ቃላ ኢማዲስ፤ ሃኢ ጊዲኮ ጎዳይ ሃኒፌ ጉዬ ታ ሃይሳ ኦሊኬ፤» ታና ቦንቹዛይታ ታካ ቦንቻና፤ ታና ካጲዛይቲ ሙሌራካ ካጲታና።

31 ቤኣ ኔ ዜሬላ ጊዶን ጨማይ ቤቶንታ ማላ ኔ ዋልቃኔ ኔ ኣዋ ኬላ ኣሳ ዋልቃ ታ ሚንላና ዋዴይ ያና።

32 ኔኒ ታ ኬላን ሜቶ ቤኣና፤ ኢስራኤልሰ ኣይ ሎኦይ ኦሴቲኮካ ኔ ኬላን ሙሊካ ጨማይ ቤቲና።

33 ታኒ ታሰ ያርሾ ያርሺዛሶዛፔ ዲጎንታ ኔ ዜሬላቲ፥ ሹምፖራ ፓጻ ኣታናይቲ ኔ ኣይፌታ ኣፋንላን ዶልጂሚሳናሰ፥ ኔ ዋዚናካ ጨጨን ኩንላናሰ ጸላ ኣታና። ጊዶ ኣቲን ሃራ ኔ ዜሬላቲ ኡባይ ዬላጋቲላን ሙልቄቲ ሃይቃና።

34 «ኔ ናይታ ናምኣታ ኣፊኔ ቦላኔ ፊኒሃሴ ቦላ ጋካናይሲ ኔሰ ማላታ ጊዳና፤ ኢሰቲ ናምኣይካ ኢሲ ጋላሰ ሃይቃና።

35 ታ ዋዚና ማላኔ ታ ቆፋ ማላ ታሰ ሃጋዛና ኣማኔቲዳ ቄሴ ታኒ ታሰ ዴንላና፤ ኢዛ ኬላ ታ ሚንላ ኤሳና፤ ኢዚካ ታ ቲይዳይሳ ሲንላን ሜርናሰ ሃጋዛና።

36 ኔ ዜሬላታፔ ኣቲዳ ኣይ ኣሲካ ኢሲ ሳቂሌ ቢራሲኔ ኢሲ ባርሳ ካላሰ ጊዲ ኢዛ ሲንላን ጉፋኒዲ ጎይናና፤ «ሃቺሰ ባጲዛዝ ታ ዴማና ማላ ዛይ ታና ቄሴቲላ ኦሶታፔ ኣዋይሳንካ ጌልላርኪ!» ጊዲ ኔና ዋሳና» ጊዴሰ።

3

ሳሚላ ጸይጌቲሳ

1 ዬላጋ ና ሳሚሊ ኤሌፔ ጋርሳራ ጊዲዲ ጸሳሰ ኦሊሹ ዴሰ፤ ሄ ዋዴ ቢታ ቦላ ጎዳ ቃላይ ኣልኦ፤ ኣጂታይካ ቤቲ ኤሬና።

2 ኢዛ ኣይፌይ ዳቡርዲ ዴላናስ ዳንዳየንታ ኢጲዴስ፤ ኤሌይ ኢሲ ጋላሳ ኦማርስ ባ ኢቺዛሶን ኢቺ ዴስ።

3 ሳሜሊካ ጸሳ ታቦታይ ዲዛ ጸሳ ኩፋን ኢቺ ዴስ፤ ሄን ዲዛ ጸምፔዚካ ቶኢቤና።

4 ጎዳይ ሳሜላ ጴይጊዴስ፤ ሳሜሊካ፡ «ዬ፡ ታ ሃን ዳይስ» ጊዴስ።

5 ኤሌኮ ዎጺ ቢዲ፡ «ኢንቴ ጴይጊን ሄኮ ያዲስ» ጊዴስ። ጊዶ ኣቲን ኤሌይ፡ «ታ ኔና ጴይጋቤኬ፤ ሲማ ባዳ ኢቻ» ጊዴስ፤ ኢዚካ ሲሚ ቢዲ ኢቺዴስ።

6 ቃሴካ ጎዳይ፡ «ሳሜላ!» ጊ ጴይጊዴስ፤ ሳሜሊካ ዴንዲ ኤሌኮ ቢዲ፡ «ኢንቴ ጴይጊን ሄኮ ያዲስ» ጊዴስ፤ ኤሌይካ ዛሪዲ፡ «ታ ናዞ! ታ ኔና ጴይጋቤኬ፤ ሲማዳ ኢቻ» ጊዴስ።

7 ሄሳፌ ካሴ ጎዳይ ኢዛስ ሃሳዬ ኤርንታ ጊሻስ ሳሜሊ ጎዳ ጨንጉርስ ሻኪ ኤሪቤና።

8 ጎዳይ ሳሜላ ሄቩቶ ጴይጊዴስ፤ ሳሜሊ ኤሌኮ ዴንዲ ቢዲ፡ «ኢንቴ ጴይጊን ሄኮ ያዲስ» ጊዴስ፤ ሄ ዎዴ ናዞ ጴይጊዳይ ጎዳ ጊዲዳይሳ ኤሌይ ኤሪዴስ።

9 ሄሳፌ ጉዬ ኤሌይ ሳሜላ፡ «ባዳ ኢቻ፤ ሂያፔ ኢዚ ኔና ጴይጊዛ ጊዲኮ፡ ላቤት ታ ጎዳዉ፡ ታ ኔ ኣይሌይ ሲያይስ ዮታ» ጊዴስ። ሄሳ ጊሻስ ሳሜሊ ካሴ ባ ኢቺዛሶን ሲሚ ቢዲ ኢቺዴስ።

10 ጎዳይካ ዪዲ ሄን ኤቂዴስ፤ ካሴ ጴይጊዳይሳዳካ፡ «ሳሜላ! ሳሜላ!» ጊ ጴይጊዴስ። ሳሜሊካ፡ «ጎዳዉ፡ ታ ኔ ኣይሌይ ሲያይስ፡ ዮታ» ጊዴስ።

11 ጎዳይካ ሳሜላ፡ «ቤኣ፡ ሲያናስ ሻጺዛ ሚሽ ታ ኢስራኤሌ ቦላ ኦፋና።

12 ሄ ጋላስ ኮይሮፔ ወርሴፉ ጋካናስ ኤሌ ቦላኔ ኢዛሶ ኣሳ ቦላ ዮቲዳይሳ ኡባ ታ ፖላና።

13 ኤሌይ ኤሪዛ ናጋራ ጋሶን ኢዛሶ ኣሳታ ቦላ ሚርናስ ፒርዴታናይሳ ታ ኢዛስ ዮታ ዎፋዲስ፤ ኢዛ ናይቲ ፓራ ሚሽ ኦሊዳ፤ ጊዶ ኣቲን ኢዚ ኢስታ ሄ ኦሶዛ ዲጊቤና።

14 ሄሳ ጊሻስ፡ «ኤሌሶ ኣሳ ቆሆይ ያርሾን ዎይኮ ሞጎታን ሙሌካ ወሬና» ጋዳ ካሴ ኤሌሶ ኣሳ ቦላ ጫቃ ዎፋዲስ» ጊዴስ።

15 ሳሜሊ ጋዴይ ዎንታናሹ ጋካናስ ኢቺዴስ፤ ሄሳፌ ዴንዲዲ ጎዳ ኩፋ ፔንጌታ ዶይዴስ፤ ባ ቤኢዳ ኣጂታ ኤሌስ ዮታና ባቢዴስ።

16 ጊዶ አቲን ኤሌይ ሳሜላ፡ «ታ ናዞ ሳሜላ!» ጊዶይጊዶስ፡ ሳሜላካ፡ «ዬ» ጊዶይጊዶስ፡

17 ኤሌይካ፡ «ጎዳይ ኔሰ አይ ዮቲዳ? ታፔ ቆቶፋ፤ ኢዚ ኔሰ ዮቲዳሪፔ ኔ ኢሲኒዮ ቆቲኮ ጎዳይ ኔ ቦላ ቂጻቲ ዩጎ» ጊዶስ፡

18 ሄሳ ጊሻሰ ሳሜላ ኢሲ ሚሺካ ቆቶንታ ኡባካ ኢዛሰ ዮቲዳሰ፤ ኤሌይካ ኢዛሰ፡ «ኢዚ ጎዳ ጊዳዳ ጊሻሰ ባና ሎኢዳ ማላ ኦሶ» ጊዶስ፡

19 ሳሜላ ዲጪ ዲጪ ቢዳሰ፤ ጎዳይ ኢዛራ ዲዛ ጊሻሰ ኢዚ ዮቲዛ ቃላፔ ኢሲናካ ሳኣን ኩንዳ ኤሩኩ፡፡

20 ዳኔፔ ቢዳ ቤርሳቤሄ ጋካናሰ ዲዛ ኢሰራኤል አሳይ ኡባይ ሳሜላ ቱማፔ ጎዳ ናቤ ጊዳዳይሳ ኤሪዳሰ፡፡

21 ጎዳይ ሴሎን ጉጂ ጉጂ ቆንጪዳሰ፤ ሄን ባ ቃላ ባጋራ ባና ሳሜላሰ ቆንጪሲዳሰ፡፡ ሳሜላ ቃላይ ኢሰራኤል ኡባ ጋኪዳሰ፡፡

4

ታቦታዛ ዲኤቲስ

1 ሄ ዋዴ ኢሰራኤል አሳይ ፊሊሰጾሜ አሳ ኦላናሰ ኬዚዳሰ፤ ኢሰራኤል አሳይ አቤንኤዜሬን፡ * ፊሊሰጾሜ አሳይ አፌቄን ዱንካኒዳሰ፡፡

2 ፊሊሰጾሜ አሳይ ኢሰራኤል አሳ ኦላናሰ ባ ኦላንቻታ ሳልፊሲዳሰ፤ ኦላዚ ኬሂ ሚኒን ኢሰራኤል አሳይ ፊሊሰጾሜ አሳን ጸኔቲዳሰ፡፡ ሄ ኦላን 4,000 ጊዳና አሲ ኢሰራኤሌፔ ሃይቂዳሰ፡፡

3 ኦላ አሳይ ባ ጉታ ጉታ ሲሚዳ ዋዴ ኢሰራኤል ሃላቃቲ፡ «ጎዳይ ሃች ኩኒ ፊሊሰጾሜታን ጸኔታና ማላ አዛሰ ኦሲዳ? ኩናራ ኢሲፌ ኬዚዳ ኩ ሞርኬታ ኩሼፔ ኩና አሻና ማላ ጎዳ ጫቆ ላላ ታቦታ ኣኔ ሴሎፔ ኤኪ ዮሰ» ጊዳ፡፡

4 ሄሳ ጊሻሰ ዳሬዚ ጌዳ ሴሎ አሰ ከቲዲ፡ ከሩቤ ጊደን ባ አራታ ቦላ ኡቲዳ ጎዳ ኡባፌ ዋልቃማ ጸሳ ጫቆ ቃላ ታቦታ ኤሂሲዳ፡፡ ኤሌ ና ናምኣቲ አፊኔይኔ ፊኒሃሲ ጫቆ ቃላ ታቦታራ ሄን ዳቲስ፡፡

5 ጎዳ ጫቆ ቃላ ታቦታይ ጌዳ ኢሰራኤል ኦላንቻቲ ዱንካኒ ዲዛሰ ቢ ጌሊዳ ማላ ቢታይ ቃጸናሼ ጋካናሰ ኢሰራኤል አሳይ ኡባይ ኡፋይሳን ዋልቃማ ዋሶ ዋሲዳሰ፡፡

* 4:1 አቤንኤዜሬ ጉሲ ማዶ ሹቻ ጉሳ፡፡

4:4 ኬሳ 25:22

6 ፊሊሰጾሜ አሳይ ሄሳ ዋልቃማ ዋሶዛ ሲዱዲ፥ «ሃይሲ ኢሰራኤል አሳይ ዲዛሶን ኑ ሲዱዛ ዋልቃማ ዋሶይ አይ ዋሶ?» ጌ ኦይቺዳ፤ ጎዳ ጫቆ ቃላ ታቦታይ ሄ ዱዳይሳ ኤሪዲ፤

7 ፊሊሰጾሜ አሳይ ባቢዲ፥ «ጾሲ ኢሰታ ጉታ ዱዳ ጊሻሰ ኑስ አዬ አና! ሃይሳ ማላይ ኑናራ ጋይቲ ኤሪና።

8 ኑስ አዬ አና! ሃይታ ዋልቃማ ኤቃ ጾሳታ ኩሼፔ ኑና አሻናይ ኦኔ? ሃይቲ ካሴ ጊብጾ አሳ ባዞ ቢታን ዱማ ዱማ ቦሻን ሾጪዳ ኤቃ ጾሳታ።

9 ፊሊሰጾሜ አሳው፥ ሚኒቲ! ኢንቲ አዳቲላ ኤሪቶ! ሂሰቶንታ አጊኮ ኢንቲ ካሴ ኢሰታ አይሌሲዳ ማላ ኢብራዌ አሳይ ኢንቲና አይሌሳና፤ ኢንቲ አዳቲላ ኤሪቶ፥ ኦሌቲቲ!» ጌዳ።

10 ሂሰቲን ፊሊሰጾሜ አሳይ ኦሌቲዳሰ፤ ኢሰራኤል አሳይ ጸኔቲዲ ኢሶይ ኢሶይ ባቃቲ ባ ዱንካኔን ዱንካኔን ጌሊዳሰ፤ ዳሮ አሳይ ዉሪዳሰ፤ ኢሰራኤሌፔ 30,000 ኦላንቻቲ ሃይቂዳ።

11 ጾሳ ጫቆ ቃላ ታቦታይካ ዲኤቲዳሰ፤ ኤሌ ና ናሞኦቲ አፊኔይኔ ፊኒሃሲ ሃይቂዳ።

ኤሌ ሃይቆ

12 ሄ ጋላሰ ኢሲ ቢኒያሜ ዳሬ አሲ ባ ማይኦ ዳኪዲ ባ ሁኤ ቦላ ጉዲላ ላሊዲ ኦላሶፔ ዋሳን ሴሎ ዱዳሰ።

13 አዳዚ ሄ ጋኪዳ ማላ ጾሳ ጫቆ ቃላ ታቦታ ጊሻሰ ባ ዋዚናን ጩጪሼ ዲዛ ኤሌይ ኦጌ አቻን ባ ኦይዴ ቦላ ኡቲዲ ናጌ ቦላ ዳሰ፤ አዳዚካ ጌዴ ካታማ ጌሊዲ ሃኒዳ ኡባ ዮቲን አሳይ ሲዱዲ ካታማ ዋሶን ቃሊዳሰ።

14 ኤሌይካ ዋሶዛ ሲዱዲ፥ «ሄሲ አዛ ዋሶ?» ጌ ኦይቺዳሰ፤ አዳዚ ኤሶን ዱዲ ኤሌሰ ዮቲዳሰ።

15 ሄ ዋዴ ኤሌሰ ላይላይ 98 ጌዲዳ ጊሻሰ ኢዛ አይፊቲ ጾላናሰ ዳንዳይቤቲና።

16 አዳዚ ኤሌሰ፥ «ታኒ ሃኢ ኦላሶፔ ዩሰ ያይሰ፤ ሃቾ ኦላፔ ኬሳ ኤካ ያዲሰ» ጌዳሰ።

ኤሌይካ፥ «ታ ናዘ! ሂሰቲን አዜ ዋኒዳይ?» ጌ ኦይቺዳሰ።

17 ዋሪዛ ኤሂዳ አዳዚ፥ «ኢሰራኤል አሳይ ፊሊሰጾሜ አሳ ሲንፋፊ ባቃቲዳሰ፤ ኦላ አሳፔ ዳሮይ ዉሪዳሰ፤ ሄሳሶካ ኔ ና ናሞኦቲ አፊኔይኔ ፊኒሃሲ ሃይቂዳ፤ ጾሳ ጫቆ ቃላ ታቦታይ ዲኤቲዳሰ» ጌዳሰ።

18 አዳዚ ጾሳ ጫቆ ቃላ ታቦታ ጊሻሰ ዮቲዳ ማላ፥ ኤሌይ ጊሞቤ ፔንጌ አቻን ኡቲዳ ኦይዳዛ ቦላፊ ዘኮ ቦላ ኩንዲዳሰ፤ ኢዚ ጩጋ ጌዲዳ ጊሻሲኔ ኢዛሰ ጉባይ ዳጾ ጌዲዳ ጊሻሰ

ቆይታ ሜቂ ሃይቂዳሰ፤ ኢዚ ኢሰራኤል ኣሳ ቦላ 40 ላይሰ ፒርዲዳሰ።

ፊኒሃሴ ማቺ ሃይቆ

19 ሄ ዋዴ ኢዛ ናዛ ፊኒሃሴ ማቻ ሻራራ ዳዉሰ፤ ኢዛ ዬላናሰ ዋዴይ ዉሪዴሰ፤ ኢዛ ጸሳ ጫቆ ቃላ ታቦታይ ዲኤቲዳይሳ፤ ኢዚ ኣዚና ኣዋይ ሃይቂዳይሳኔ ባ ኣዚና ሃይቆካ ሲዪዳ ማላ ሚጻይ ሚኒን ጉልባታ ዬላዲሰ።

20 ኢዛ ሼምፖ ኬዛና ሃኒሺን ኢዚ ኣቻን ዲዛ ማጫሳቲ፤ «ኣይኮይ ባ፤ ኣቲማ ና ዬላዳሳ» ጊዳ፤ ኢዛ ጊዲኮ ዛር ኢማቤኩ፤ ኤዘጋ ሲያቤኩ።

21 ጸሳ ጫቆ ቃላ ታቦታይ ዲኤቲዳ ጊሻሰ ኢዚ ኣዚናይኔ ኣዚናዛ ኣዋይ ሃይቂዳ ጊሻሰ፤ «ቦንቾይ ኢሰራኤል፤ ሻኬቲዳሰ» ጋሼ ናዛ፤ «ኢካቦዴ»† ጋ ሰንፋዲሰ።

22 ቃሴካ፤ «ጸሳ ጫቆ ቃላ ታቦታይ ዲኤቲዳ ጊሻሰ ቦንቾይ ኢሰራኤል፤ ሻኬቲዳሰ» ጋዲሰ።

5

ጫቆ ቃላ ታቦታይ ኣሽዶዴኔ ኣቃሮኔ ቡስ

1 ፊሊሰጾሜ ኣሳይ ጫቆ ቃላ ታቦታ ዲኢዳ፤ ጉዬ ኣቤንኤዘሬ፤ ኣሽዶዴ ኤፊዳ።

2 ሄፔካ ኤቃ ጸሰ ዳጎኔኮ ጌልሊዲ ሄን ዋሊዳ።

3 ኣሽዶዴ ዴሬ ኣሳይ ዋንቲፋ ጋላሰ ማላዶራ ዴንዲዲ ጸሊሺን ዳጎኔይ ጸሳ ጫቆ ቃላ ታቦታ ሲንፋን ጉፋኒ ዲዛይሳ ቤኢዳ፤ ኢሰቲ ኢዛ ዴንሊዲ ካሴ ኢዚ ዲዛሶን ዋሊዳ።

4 ቃሴ ዋንቲፋ ጋላሰ ማላዶራ ዴንዲዲ ጸሊሺን ዳጎኔይ ጸሳ ጫቆ ቃላ ታቦታ ሲንፋን ቢታ ቦላ ጉፋኒ ዴሰ፤ ኢዛ ሁኤይኔ ኢዛ ኩሼቲ ፔንጌ ቦላ ሜቄሬቲ ዋጂን ሃንኮ ኣቲዳ ኣሳቲፋይ ጸላ ዴሰ።

5 ሃቶ ጋካናሰ ዳጎኔ ቄሴታ ጊዲን ሃራ ኣሽዶዴን ዲዛ ዳጎኔ ኤቃታ ኬፋ ጌሊዛ ኡባታ ቶሆይ ሄማቲ ኣፋና ማላ ኣቲን ኢዛ ፔንጌ ዬጶንታ ማላ ኦሴቲዳይ ሄሳ ጋሶና።

6 ጎዳ ኩሼይ ኣሽዶዴ ዴሬ ቦላኔ ኢዛ ጉታታ ቦላ ዴጲዴሰ፤ ኢዚካ ኢሰታ ቦላ ባሽ ኤሂዴሰ፤ ኪጸን ሾጪዴሰ።

† 4:21 ኢካቦዴ ጉሲ ኢብራዊታ ቃላራ ጸሳ ቦንቾይ ዴንዲዴሰ ዋይኮ ጳይዴሰ ጉሳ።

7 አሸዶዴ አሳቲ ሄሳ ቤኢዳ ዋዴ፥ «ኢዛ ኩሼይ ኑ ቦላኔ ኑ ጸሳ ዳጎኔ ቦላ ዴዲዳ ጊሻስ ኢሰራኤል ጸሳ ጫቆ ቃላ ታቦታይ ኑ አቻን ጋሞአናስ ቤሴና» ጊዳ።

8 ሄሳፌ ጉዬ ፊሊሰጾሜ ዴሬ ኣይሲዛይታ ኡባ ጸይጊሲዲ «ኢሰራኤል ጸሳ ጫቆ ቃላ ታቦታ ዋስቲና?» ጊ ኣይቺዳ።

ኢስቲካ ዛሪዲ፥ «ኢሰራኤል ጸሳ ጫቆ ቃላ ታቦታ ጌቴ ኤፍቴ» ጊዳ። ሄሳ ጊሻስ ኢሰራኤል ጸሳ ጫቆ ቃላ ታቦታ ኤፊዳ።

9 ጊዳ ኣቲን ኢስቲ ጫቆ ቃላ ታቦታ ሄ ኤፊዳፔ ጉዬ ጸሳ ኩሼይ ካታማይ ቦላ ዴዲዳ ጊታ ሸሮ ኢስታ ቦላ ኤሂዴሰ፤ ዪቆኔ ጨማ ጎንታ ዴራ ኪጸን ሾጨዴስ።

10 ሄሳ ጊሻስ ጸሳ ጫቆ ቃላ ታቦታ ኣቃሮኔ ዬዲዳ፤ ታቦታይ ሄ ጋኪ ጌሊሺን ኣቃሮኔ ዴሬይ፥ «ኢሰራኤል ጸሳ ጫቆ ቃላ ታቦታ ኢስቲ ኑ ቦላ ኤሂዳይ ኑናኔ ኑ ዴራ ዉርሳና» ጊዲ ዋሲዳ።

11 ጎዳ ኩሼይ ኢስታ ቦላ ከሂ ዴዲዳ ጊሻስ ሃይቆይ ካታማዮ ከሂ ዳጋንፊዴሰ፤ ሂስቲን ኣሳይ ፊሊሰጾሜ ዴሬ ኣይሲዛይታ ኡባ ጸይጊዲ፥ «ኢሰራኤል ጸሳ ጫቆ ቃላ ታቦታ ኑ ቢታፌ ኬሲቲ፤ ባ ዴሬ ሲሞ፤ ሂስቶንታ ኣጊኮ ኑናኔ ኑ ዴራ ኢዚ ዉርሳና» ጊዳ።

12 ሃይቆንታ ፓጽ ኣቲዳይታ ኪጸ ሃርጌይ ዋዪሲዛ ጊሻስ ካታማይ ዋሶይ ሳሎ ጋኪዴስ።

6

ጫቆ ቃላ ታቦታ ሲሞ

1 ጎዳ ጫቆ ቃላ ታቦታይ ፊሊሰጾሜን ላፑን ኣጊና ኡቲዴስ።

2 ፊሊሰጾሜቲ ቄሴታኔ ማሮታ ጸይጊዲ፥ «ጎዳ ጫቆ ቃላ ታቦታዛ ኑ ዋስቲና? ካሴ ኢዚ ዲዛሶ ኑ ዋስቲ ዛራናኮ ኣኔ ኑስ ዮቲቲ» ጊዳ።

3 ኢስቲካ፥ «ኢሰራኤል ጸሳ ጫቆ ቃላ ታቦታ ኢንቴ ዛሪዛ ጊዲኮ ቆሆስ ሸቂዛ ያርሾራ ኢሲ ቦላ ጋሊ ዬዲቲ ኣቲን ጮ ሜላ ዬዶፍቴ፤ ሄ ዋዴ ኢንቴ ፓጻና፤ ኢዛ ኩሼይ ኢንቴ ቦላ ኣይሰ ዴዲዳኮ ኢንቴ ኤራና» ጊዳ።

4 ፊሊሰጾሜቲ፥ «ኑኒ ቆሆ ያርሾስ ዬዳናይሲ ኣይ ጊዳና ቤሲዜ?» ጊ ኣይቺዳ፤ ኢስቲካ ዛሪዲ፥ «ኢንቴና ጊዳን ዋይኮ ኢንቴ ሃላቃታ ሾጨዳይ ኢሲ ቆሞ ባሻ ጊዲዳ ጊሻስ ፊሊሰጾሜታ ኣይሲዛይታ ቆዳን ዋርቃፌ ኦሴቲዳ ኢቻሹ ኪጸ ሚሰሌታኔ ዋርቃፌ ኦሴቲዳ ኢቻሹ ኤጩሬ ሚሰሌታ ዬዲቲ።

5 አንቲ ቢታ ዳይሳናስ ኪቴቲዳ ኤጨፎታኔ ኪዳ ሚስሌታ ኦሊዲ ኢስራኤሌ ጸሳ ቦንቸስ አሚቴ፤ አንቲ ሄሳዎ ኦሊኮ ኦኔ ኤሪዛይ ኢዚ ባ ኩሼ አንቲ ቦላፌ፤ አንቲ ጸሳታ ቦላፌኔ አንቲ ቢታ ቦላፌ ዴንሳናዝ ጊዳና።

6 አንቲ ጊብጾ ዴሬ ማላኔ ጊብጾ ካዎ ማላ አንቲ ዎዚና አይስ ቩቻሴቲ? ኢስቲ ኢስራኤሌ ኣሳ ዬዲዳይ ጸሳይ ኢስታ ቦላ ዎልቃማ ሃንቆ ጋሊን ጊዴኔ?

7 ሄሳ ጊሻስ ኦራፋ ጋሬኔ ቃሞባራይ ኢስታ ሞርጌን ዎጵንታ ናምኡ ዳንሊዛ ሚዛታ ጊግሲቲ፤ ጋሬዛ ቦላ ዎጲቲ፤ ኢስታ ማራታ ጊዲኮ ሶ ዛሪቴ።

8 ጎዳ ጫቆ ቃላ ታቦታ ጋሬዛ ቦላ ጫኒቲ፤ ጫቆ ቃላ ታቦታ ሚሌን ዲዛ ሳጺኔዛ ጊዶን አንቲ ቆሆ ያርሾስ ዬዲዛ ዎርቃ ሚስሌታ ዎሊዲ ኢዚ ባ ኮዪዳ ኦጌራ ባና ማላ ዬዳጊቲ።

9 ጊዶ ኣቲን ኢዚ ኣዎ ባናኮ ጸሊቲ፤ ኢዚ ቤቲ-ሼሚሼ ባጋራ ካሴ ባ ዪዳ ዴሬ ቢዛ ጊዲኮ፤ ሃይሳ ዎልቃማ ሚቶዛ ኦ ቦላ ጋሊዳይ ጎዳ። ኢዚ ሄ ቦንታ ኣጊኮ ሜቶዚ ኦ ቦላ ዴንጋቲ ጋኪዴስ ኣቲን ኢዛ ኩሼይ ኦና ሾጮንታይሳ ኦ ኤራና» ጊዳ።

10 ኢስቲካ ኢስታስ ዮቴቲዳ ማላ ኦሊዳ፤ ናምኡ ሚዛታ ኤኪዲ ኢስታ ቦላ ጋሬዛ ዎጲዳ፤ ኢስቲ ማራታ ኬላ ጎርዲዳ።

11 ጎዳ ጫቆ ቃላ ታቦታ፤ ዎርቃፌ ኦሴቲዳ ኤጨፎ ሚስሌታኔ ኪዳ ሚስሌታ ጋሬዛ ቦላ ጫኒዳ።

12 ሄሳፌ ጉዬ ሚዛቲ ኦጌ ኦይኪ ቢሼ ሂምባ! ሂምባ! ጊሼ ሲቲ ጊዲ ቤቲ-ሼሚሼ ጋካናስ ቢዳ፤ ፊሊስጾሜ ዴሬ ኣይሲዛይቲካ ቤቲ-ሼሚሼ ዛዎ ጋካናስ ካሊ ቢዳ።

13 ሄ ዎዳ ቤቲ-ሼሚሼ ኣሳይ ዙሌ ጊዶን ባንታ ገሰቲ ጫኪሼ ዴቲስ፤ ኢስቲ ቶቁ ጊ ጫቆ ቃላ ታቦታ ቤኢዲ ኬሂ ኡፋዬቲዳ።

14 ጋሬዚካ ዪዲ ቤቲ-ሳሚሴን ዲዛ ኢያሶ ጋዴን ዲዛ ኢሲ ጊታ ዛላ ማታን ኤቁዴስ፤ ዴሬዚ ጋሬዛ ሚላ ቂሪዲ ናምኡ ሚዛታ ጸጌቲዛ ያርሾ ሂስቲ ጎዳስ ሺሺዴስ።

15 ሌዌቲካ ጎዳ ጫቆ ቃላ ታቦታ ሚሌን ዎርቃ ሚሻቲ ኢዛ ጊዶን ዲዛ ሳጺኔዛራ ጋሊ ኤፊዲ ዎጋ ዛላዛ ቦላ ዎሊዳ፤ ሄ ጋላሲካ ቤቲ-ሼሚሼ ዴሬይ ጎዳስ ጸጌቲዛ ያርሾ ሺሺዳ፤ ያርሾታካ ያርሺዳ።

16 ፊሊስጾሜታ ኣይሲዛ ኢቻሻቲ ሄሳ ኡባ ቤይዳፔ ጉዬ ሄ ጋላስ ኣቃርኔ ሲሚዳ።

17 ፊሊስጾሜቲ ቆሆ ያርሾስ ጊዲ ጎዳስ ዬዲዳ ኪዳ ሚስሌን ኦሴቲዳ ዎርቃቲ ኢሶይ ኣሽዶዴ ጊሻስ፤ ኢሶይ ጋዛ ጊሻስ፤

ኢሶይ አስቁሎና ገሻስ፤ ኢሶይ ጌቴ ገሻሲኔ ኢሶይ አቃርኔ ገሻስ ሸቂዳይታ።

18 ዋርቃፌ ኦሴቴዳ ኤጩሬ ሚስሌታ ቆዳይ፤ ኢቻሹ ፊሊሰጾሜ አይሲዛይቲ ሃሪዛ ካታማታኔ ኢስታፌ ካሬራ ዲዛ ጉታታ ቆዳ ሊኬ። ቤቴ-ሳሚሴ ዳሬ አስ ኢያሶ ጋዴን ጎዳ ጫቆ ቃላ ታቦታ ኢስቲ ኢዛ ቦላ ዋሒዳ ዋጋ ዛላዚ ሃቾ ጋካናሰካ ማርካ።

19 ጊዶ አቲን ቤቴ-ሸሚሹ አሳይ ጎዳ ጫቆ ቃላ ታቦታ ቃሪ ቤኢዳ ገሻስ ኢስታ ጊዶፌ ጉላታ ሾጪዲ 70 አሳታ ዋጂዳሰ፤ ጎዳይ ኢስታ ኬሂ ሾጪዳ ገሻስ ዳሬይ ዩኪዳሰ።

ጫቆ ቃላ ታቦታ ቂሪያቴ-ዩአሪሜን

20 ሄሳ ገሻስ ቤቴ-ሸሚሹ አሳይ፤ «ሂስቲን ሃይሳ ጎዳ፤ ጌሻ ጸሳ ሲንላን ኤቃናሰ ዳንዳይዛይ ኦኔ? ጫቆ ቃላ ታቦታዚ ሃይሳፌ ኬዚዲ ኦናኮ ባኔ?» ጊዳ።

21 ሄሳፌ ጉዬ ቂሪያቴ-ዩአሪሜ ቢታ ቃስታኔ ከቲዲ፤ «ፊሊሰጾሜ አሳቲ ጎዳ ጫቆ ቃላ ታቦታ ኦኮ ዛሪዳ ገሻስ ሃ ዲጌ ዋጂ ኤኪዲ ፑዴ ኢንቴ ሄሪ ኬዚቴ» ጊዳ።

7

1 ቂሪያቴ-ዩአሪሜ አሳቲካ ዲጌ ዋጂዲ ጎዳ ጫቆ ቃላ ታቦታ ኤኪዲ ፑዴ ባንታ ሄሪ ኤፊዲ ዙምቡላ ሁኤን ዲዛ አቢናዳቤሶን ዋሒዳ፤ ጎዳ ጫቆ ቃላ ታቦታ ናጋና ማላ ኢዛ ና ኤልኤዜሬ ደማሲዳ።

ሳሜሊ ኢስራኤል አሳ ካሌሒዳ ካሌፉ

2 ጫቆ ቃላ ታቦታይ አዲሳ ዋዴ ቂሪያቴ-ዩአሪሜን ዴኢዳሰ፤ ኢሲ ቦላ 20 ላይሳ ሄን ጋምኢዳሰ፤ ኢስራኤል አሳይ ኡባይ ጩጩዳሰ። ጎዳካ ኮዩዳሰ።

3 ሳሜሊ ኢስራኤል ዳራ፤ «ኢንቴ ኩሜላ ዋዚናፔ ጎዳኮ ሲሚዛ ጊዲኮ ሃሪ ኤቃ ጸሳታኔ አስታርቴ ኢንቴ ጊዶፌ ዲጌቴ፤ ኢንቴና ጎዳሰ አሒ አሚቴ፤ ኢዛሰ ጸላ ጎይኒቴ፤ ኢዚ ኢንቴና ፊሊሰጾሜታ ኩሼፔ ኬሲ ኤካና» ጊዳሰ።

4 ሄሳ ገሻስ ኢስራኤል አሳይ ባኦሌኔ አስታርቴ ኤቃ ጸሳታ ባንታ ጊዶፌ ዲጊዲ ጎዳሰ ጸላ ጎይኒዳ።

5 ሄሳፌ ጉዬ ሳሜሊ፤ «ታ ኢንቴ ገሻስ ሄን ጎዳ ዋሳና ማላ ኢስራኤል አሳ ኡባ ሚዲጸን ሺሺቴ» ጊዳሰ።

6 ኢስራኤል አሳይ መጸዳጽን ሽቂዳ ዋዴ ሃል ዱቂዱ ጎዳ ሲገኝ ጉሲደስ፤ ሄ ጋላሲካ ጸመዳ፤ «ኑኒ ጎዳ ቆሂዶስ» ጌዲ ፓዲዳ። ሳሜሊ መጸዳጽን ፒርዲሼ ዴራ አይሲደስ።

7 ኢስራኤል አሳይ መጸዳጽን ሽቂዳይሳ ፊሊስጾሜ አሳይ ሲዱዳ ዋዴ፤ ፊሊስጾሜ አይሲዛይቲ ኢስታ ኦላናስ ኬዚዳ፤ ኢስራኤሉቲ ሄሳ ሲዱዳ ዋዴ ፊሊስጾሜታስ ባቢዳ።

8 ሳሜላስ፤ «ጎዳ ኑ ጸሳይ ኑና ፊሊስጾሜታ ኩሼፔ አሻና ማላ ኑ ጊሻስ ኢዛኮ አጎንታ ዋሳ» ጌዳ።

9 ሳሜሊካ ኢሲ ጳሚዛ ዶርሳ ላቃ ኤኪዲ ሹኪደስ፤ ሙሌራካ ጸጌቲዛ ያርሾ ሂስቲ ጎዳስ ሺሺደስ፤ ኢስራኤሉ ጊሻስ ጎዳኮ ዋሲደስ፤ ጎዳይካ ኢዛ ዋሳ ሲዱደስ።

10 ሳሜሊ ጸጌቲዛ ያርሾዛ ያርሺዛ ዋዴ ፊሊስጾሜቲ ኢስራኤሉታ ኦላናስ ኬዚ ዱዳ፤ ጌዶ አቲን ሄ ጋላስ ጎዳይ ፊሊስጾሜታ ቦላ ዋልቃማ ዳዳ ጌርስ ዳዳሲዳ ጊሻስ ኬሂ ኤቲ ባቲ ጌዳ፤ ጸኔቲዳካ ኢስራኤሉታ ሲገላፊ ባቃቲዳ።

11 ኢስራኤሉ አሳይ መጸዳጽ ኬዚዲ ፊሊስጾሜ አሳ ኦጌ ቦላ ዋዳሼ ዋዳሼ ቤቲ-ካሬፔ ዳንኤ ባጋራ ዲዛሶ ጋካናስ ዩዳሊዳ።

12 ሄሳፊ ጉዬ ሳሜሊ ኢሲ ሹች ኤኪዲ መጸዳጸሲኔ ሸኔስ ጌዶን ኤሲደስ፤ «ሃች ጋካናስ ጎዳይ ኑና ማዲደስ» ጌሼ አቤንኤዜሬ ጌ ሱጎሊደስ።

13 ሄሳፊን ፊሊስጾሜ አሳይ ጸኔቲዳ ጊሻስ ናምኦንል ኢስራኤሉ አሳ ቦላ ፊሊስጾሜቲ ዋራጂቤቲና፤ ሳሜሊ ሸምፖራ ፓጻ ዲዛ ላይል ኡባን ጎዳ ኩሼይ ፊሊስጾሜታ ቦላ ዴዲደስ።

14 ፊሊስጾሜቲ ኢስራኤሉታ ኩሼፔ ዋሊ ኤኪዳ ካታማቲ አቃሮኔፔ ቢዲ ጌቲ ጋካናስ ኢስራኤሉታስ ሲሚዳ፤ ኢስቲ ሃሪዛ ቢታቲ ኡባይ ፊሊስጾሜታ ኩሼፔ ላኦ ኬዚዳ፤ ኢስራኤሉታ ጌዶኒኔ አሞሬታ ጌዶን ሳሮይ ዴስ።

15 ሳሜሊ ሸምፖራ ፓጻ ዲዛ ላይል ኡባን ኢስራኤሉ አሳ ኡባስ ፒርዲደስ።

16 ላይላን ላይላን ሳሜሊ ቤቴሌ፤ ጌልጌላኔ መጸዳጽ ቢዲ ኢስራኤሉ አሳስ ፒርደስ።

17 ሄሳፊ ጉዬ ኤራማን ዲዛ ባሶ ሲሚዲ ሄንካ ኢስራኤሉ አሳስ ፒርደስ፤ ሄን ጎዳስ ያርሾ ያርሺዛሶ ኦሊደስ።

8

ኢስራኤሉ አሳይ ካዋ ካዋላናስ ሺሺዳ ኦይሻ

1 ሳሜሊ ጨሚዳ ዋዴ ባ ናይታ ናሞኣታ ኢስራኤል ቦላ ፒርዳና ማላ ሹሚዴስ።

2 ኢዛስ ባይራ ናዚ ኢዩኤሌ ጌቴቴስ፤ ካሎዚ ኣቢያ ጌቴቴስ፤ ኢስቲ ቤርሳቤሂን ፒርዴቴስ።

3 ጊዶ ኣቲን ናይቲ ባንታ ኣዋ ኦጌ ካሊቤቴና፤ ቤሶንታ ጎኣ ዴማናስ ጊሼ ኦጌቴ ኬዚዳ፤ ማጋንጾ ኤኪዲ ፒርዳ ጌላሲዳ።

4 ሄሳ ጊሻስ ኢስራኤል ጨማቲ ዉሪ ኢሲ ቦላ ሸቂዲ ሳሜሊ ዲዛሶ ኤራማ ዪዳ።

5 ኢስቲካ ሳሜላስ፡ «ኔኒ ጨማዳሳ፤ ኔ ናይቲ ኔ ሎሴ ካሌቴና፤ ሄሳ ጊሻስ ሃራ ካዋቴላቲ ኦሊዛ ማላ ኦና ካሌሊዛ ካዋ ኦስ ካዋላ» ጊዳ።

6 ጊዶ ኣቲን፡ «ኦና ካሌሊዛ ካዋ ኦስ ካዋላ» ጊዳይሲ ሳሜላ ሚሺሲዳ ጊሻስ ሳሜሊ ጎዳ ዋሲዴስ።

7 ጎዳይካ ሳሜላስ ዛሪዲ፡ «ታ ኢስታስ ካዋ ጊዶንታ ማላ ኢስቲ ካዲዳይ ታና ኣቲን ኔና ጊዶንታ ጊሻስ ዴዉዚ ጊዛይሳ ኡባ ሲያ።

8 ታ ኢስታ ጊብጼ ቢታፌ ኬሶሶፌ ሃኖ ጋካናስ ታና ኣጊዲ ሃራ ኤቃ ጸሳታስ ጎይኒሼ ኦሊዳ ማላ ኔ ቦላካ ኦላቴስ።

9 ኔኒ ጊዲኮ ኢስቲ ኔና ጊዛይሳ ሲያ፤ ኢስታ ቦላ ካዋቴዳይሲ ኢስታ ቦላ ኣይ ኦፋናኮ ኢስታ ኤሪሳ ቤሲዛ ማላ ኢስታስ ሚንላ ኮታ» ጊዴስ።

10 ሳሜሊካ ካዋ ካዋፋናስ ኦይቺዳ ዴራስ ጎዳ ቃላ ኡባ ኮቲዴስ።

11 ኢስታስ፡ «ኢንቴ ቦላ ካዋታና ካዋዚ ኢንቴ ቦላ ኦፋናይሲ ኢንቴ ኣቲማ ናይታ ኡባ ኤኪዲ ፓራ-ጋሬ ላጊዛይታኔ ቶጋንቻታ ኬሳና፤ ኢስቲ ፓራ-ጋሬታ ሲንላን ዋጽና።

12 ኢስታ ጊዶፌ ኢሶታ ኢሶታ ሻላቃታ፡ ማቶ ሃላቃታ፡ ሃሞሳ ሃላቃታ ሂሰታና፤ ባጋታ ኢዛ ጋዴ ጎያና ማላኔ ኢዛ ካል ሺሻና ማላ፡ ኦላ ማሳራታኔ ፓራ-ጋሬስ ጊዲዛ ሚሻታ ኦሊዛይታ ሂሰታና።

13 ኢንቴ ማጫ ናይታ ኤኪዲ ሺቶ ኬሲሳና፤ ዋጼ ካልሳናኔ ሶሎ ኡኪሳና።

14 ኢንቴ ጋዴቴ፡ ዋይኔ ጋዴቴኔ ዋጋራ ቶኪዛ ጋዴቴ ሎኦሶ ሎኦሶ ኤኪዲ ባ ሹሚታስ ኢማና።

15 ኢዚ ኢንቴ ካፋፌኔ ኢንቴ ዋይኔ ሚላፌ ታማፌ ኢሳ ባ ካዋቴላን ዲዛ ባ ኦሳንቻታሲኔ ባ ሹሚታስ ኢማና።

16 አቱማኔ ማጫ አንቱ አይሌታ፡ አንቱ ሜሄፔ ደሬቲዳ ሎኦታ ሎኦታ ባሰ ሂሰታና።

17 ደርሳ ወዴፔኔ ዳይሻ ወዴፔ ታማፌ ኢሲ ኩሼዛ ባሰ ኤካና፤ አንቱ አንቱ ሁኤራ ኢዛ አይሌታ ጊዳና።

18 ሄሲ አንቱ ቦላ ጋኪዳ ዋዴ አንቱ ዶሲዲ ዶሪዳ ካዋዛፔ ዴንዲዳይሳን ዋሳና። ጊዶ አቲን ጎዳይ ሄ ጋላሰ አንቱ ዋሶ ሲዬና» ጊዴሰ።

19 ዴሬይ ጊዲኮ ሳሜሊ ሃሳይዛ ቃላዛ ወዳን ዬጎንታ ኢዲዲ፡ «ጊዴና፤ ኑሰ ካዋይ ካዋታና ማላ ኮዮሰ።

20 ሃራ ዴሬታ ማላ ኑኒካ ኑና ካሌላዛዴ፡ ኑ ሲንሳራ ቢዛዴኔ ኑሰ አሌቲዛ ካዋይ ዲዛ ካዋቱሰ ጊዳና» ጊዳ።

21 ሳሜሊካ ዴሬዚ ጊዛይሳ ኡባ ሲዪዴሰ፤ ሄሳ ዛሪዲ ጎዳሰ ዮቲዴሰ።

22 ጎዳይካ፡ «ኢሰቲ ጊዛይሳ ሲያ፤ ካዋካ ኢሰታሰ ካዋላ» ጊዴሰ፤ ሄሳፌ ጉዬ ሳሜሊ ኢሰራኤሌ አሳ፡ «ኢሶይ ኢሶይ አንቱ ዪዳ ካታማ ካታማ ሲሚ ቢቱ» ጊዴሰ።

9

ሳሜላኔ ሳኦሌ

1 ቢኒያሜ ቆዋታፔ ቂሴ ጌቲቲዛ ኢሲ ኤሬቲዳ አሲ ዴሰ፤ ኢዚካ አቢኤሌ ና፡ ጸረሬ ና፡ ቢኮራቱ ና፡ ቢኒያሜ ዴሬ አሰ አፌቄ ና።

2 ቂሴሰ ሳኦሌ ጌቲቲዛ ናቴላ ናይ ዴሰ፤ ኢሰራኤሌ አሳ ጋርሳፌ ማላኒኔ ሱሬቱላን ኢዛ ጋኪዛይ ዴና፤ ጌሳን ሃራ አሳይ ኡባይ ኢዛሰ ሃሼፔ አጼና።

3 ሄ ዋዴ ሳኦሌ አዋ ቂሴ ሃሬቲ ሳይዳ፤ ሂሰቲን ቂሴይ ባ ና ሳኦሌ፡ «አሽካራታ ጊዶፌ ኢሳ ኤካ ባዳ ሃሬታ ኮያ» ጊ አዛዚዴሰ።

4 ሄሳ ጊሻሰ ዙምቡላቲ ዲዛ ኤፍሬሜ ዴሬኒኔ ሻሊሻ ሄራን ዩዪ ኮዩዳ፤ ጊዲኮካ ሃሬታ ዴሚቤቲና። ሄፔ ዴንዲዲ ሻኢሊሚ ዛዋራ ካንሏ ቢዳ፤ ሃሬቲ ጊዲኮ ሄንካ ዴቲና፤ ቃሴካ ቢኒያሜ ሳሳራ ካንሏ ቢዳ፤ ሄንካ ዴማና ዳንዳይቤቲና።

5 ሄፔካ ዴንዲዲ ዙፌ ዛዋ ጋኪዳ ዋዴ ሳኦሊ ባናራ ዲዛ አሽካራዛሰ፡ «ሃኒ ዋዴ ታ አዋይ ሃሬታሰ ቆፋ አጊዲ ኑ ጊሻሰ ጩጩ ደማና ጊሻሰ ሃ ያ አኔ ጉዬ ሲሞሰ» ጊዴሰ።

6 ጊዶ አቲን አሽካራዚ ኢዛ፡ «ቤኣ፡ ሃኖ ካታማይን ጸሳ አሲ ዴሰ፤ ኢዚካ ኬሂ ቦንቹቲዳ አሳ፤ ኢዚ ዮቲዛ ዮኦ ኡባይ ኢዚ

ጊዳ ማላ ፖሌቲስ። ኑ አዋራ ባናሰ ቤሲዛኮ ኢዚ ኑስ ዮታና ጊሻሰ እኔ ሄ ኢዛኮ ቦስ» ጊዳስ።

⁷ ሳኦሊካ ኢዛሰ ዛሪዲ፡ «ቤላ ኑ ባናሺን ኑ ኢዛሰ አይ አማኔ? ሉካዎን ኑ ኦይኪዳ ሺንቂይካ ወሪዳስ፤ ኑኒ ጸሳ አሳሰ አዎታ አሚዛ ሚሺ ዳና፤ ሂስቲን ኑስ እዚ ዲዜ?» ጊዳስ።

⁸ አሽካራዚካ፡ «ታሰ ኢሲ ሳቂሌ ቢራሰ ጨጎይ ዳስ፤ ኑ አዋ ባጋ ኦጌራ ባናኮ ኢዚ ኑስ ዮታና ማላ ታሰ ዲዛ ሚሻዮ ጸሳ አሳሰ አማና» ጊዲ ናምእንሶ ዛሪ ዮቲዳስ።

⁹ ሃይሳፌ ሲንላን ኢስራኤሌ ዳሬን ኢሲ አሲ ጸሰ ኦይቻና ቢሼ፡ «እኔ ሃ ዪቲ፡ አጁታ ዮቲዛዴኮ እኔ ቦስ» ጊዳስ፤ ሃኢ ናቤ ጌቲቲዛዴይ ቤኒ ዋዴ ካዪዛዴ ጌቲቲስ።

¹⁰ ሳኦሊካ አይሌዛስ፡ «ሎኦኮ! ሃያ እኔ ቦስ» ጊዳስ። ሄሳ ጊሻሰ ጸሳ አሲ ዲዛ ካታማ ቢዳ።

¹¹ ኢስቲ ካታማዮ ጌላና ሃኒሺን ዲዛ ዙምቡላይ ቦላ ፑዴ ኬሳን ዲሺን ሃሐ ዱቃናሰ ቢዛ ጌላኦታ ዳሚዲ፡ «አጁታ ዮቲዛይሲ ሃይሳን ዲዜ?» ጊ ኦይቹዳ።

¹² ኢስቲካ ዛሪዲ፡ «ኤ ዳስ፤ ቤኢቲ ኢንቲ ሲንላን ዳስ፤ ኤሶን ቢቲ፤ ዳሬይ ጎይኒዛ ዙምቡላዛ ቦላ ያርሾ ሺሻና ጊሻሰ ሃች ቡሮ ኑ ካታማ ዪዳስ፤

¹³ ኢንቲ ጌዴ ካታማ ጌሊዳ ማላ ኢዚ ካሐ ማናሰ ፑዴ ዙምቡላ ቦላ ኬዛናፔ ሲንላን ኢንቲ ኢዛ ዳማና፤ ያርሾዛ እንጃናይ ኢዛ ጊዲዳ ጊሻሰ ኢዚ ያናሼ ጋካናሰ ዳሬዚ ሙሰ ዶሜና፤ ሄሳፌ ፑዴ ሃንኮ ጴይጌቲዳ ዳሬዚ ማና፤ ሃኢራ ኬዚቲ፤ ሄራካ ኢንቲ ኢዛ ዳማና» ጊዳ።

¹⁴ ኢስቲካ ፑዴ ካታማዮ ኬዚዳ፤ ኢስቲ ካታማዮ ቢ ጌሊሺን ሳሜሊ ጎይኒዛሶሆ ፑዴ ዙምቡላ ቦላ ኬዛናሰ ቢሼ ኢስቲ ዲዛ ባጋ ዪዳስ።

¹⁵ ሳኦሊ ያናፔ ኢሲ ጋላሳፌ ሲንላን ጎዳይ ሳሜላስ ቆንጨሲ ዋሒዳስ።

¹⁶ ጎዳይ፡ «ዋንቶ ሃኒ ዋዴ ቢኒያሜ ዳሬፔ ኢሲ አሰ ኔኮ ኪታና፤ ታ ዳሬ ኢስራኤሌ ቦላ ካዎታና ማላ ቲያ፤ ኢዚካ ታ ዳራ ፊሊሰጾሜታ ኩሼፔ ዋሒ ኤካና፤ ቤኦ ኢስታ ዋሶይ ታኮ ጋኪዳ ጊሻሰ ቦላፌ ታኒ ታ ዳራ ሞካ ጸላዲስ» ጊዳስ።

¹⁷ ሳሜሊ ሳኦሌ ቤኢዳ ማላ ጎዳይ፡ «ሄኮ ታ ኔስ ዮቲዳ አዳዚ ሃይሳ፤ ኢዚ ታ ዳራ አይሳና» ጊዳስ።

¹⁸ ሳኦሊካ ገምቤዛ ፔንጌን ዲዛ ሳሜላኮ ሺቂዲ፡ «አጁታ ዮቲዛይሳ ኬሒ አዋን ዲዛኮ ታሰ ዮታንዲ?» ጊዳስ።

19 ሳሜሊ ኢዛስ፡ «አጁታ የቲዛይሲ ታና፤ ሃች አንቲ ታናራ ማና ገሻስ ፑዴ ጎይኒዛሶሆ ዙምቡላ ቦላ ኬዚቲ፤ ዋንቶ ማለዶ ታ ኔና ሞይዛና፤ ኔ ዋዚናን ዲዛይሳካ ታ የታና፡፡

20 ሄቹ ጋላሳፊ ሲንፋን ጳይዳ ሃሬቲ ቤቲዳ ገሻስ ኔ ኢስታስ ጩጮፓ፤ ኢሰራኤል አሳ ኡባ አሞይ ኮይዛይ ኔና ኔ አዋ ኬላ አሳ ኡባ ገዴኔ?» ገዴሰ፡፡

21 ሳኦሊካ፡ «ታኒ ኢሰራኤል አሳ ጋርሳን ኡባፊ ቆዳን ጉሐ ገዲዳ ቢኒያሜ ቆሞታፔ አሳ ገዲኪና? ታ ዛርኬይ ቢኒያሜ ቆሞታ ጋርሳን ጉሐ ገዴኔ? ሂሰቲን ሃይሳ ማላ የኦ ኔ ታስ አይሰ የታይ?» ገዴሰ፡፡

22 ሄሳፊ ጉዬ ሳሜሊ ሳኦሊኔ ኢዛ አሸካራዛ አዳራሻ ኬሐ ኤሂዴሰ፤ ጳይጌቲዳ ሄቹ ታሙ ገዲዛ አሳፔ ቦላራ ቦንቾሶን ኡቲሲዴሰ፡፡

23 ሳሜሊ ካሐ ካሐዛይሳ፡ «ሃይሳ ዱማ ዋላ ጋዳ ታ ኔስ አሚዳ ቢሊቲ አሸዛ አኔ ሃ ኤሃ» ገዴሰ፡፡

24 ካሐ ካሐዛይሲካ ጌዳ አሸዛ ኩሜሐ ኤሂዲ ሳኦሊ ሲንፋን ዋሒዴሰ፤ ሳሜሊ ኢዛ፡ «ሃይሲ፡ ታኒ አማሐ ጳይጋዲሰ» ገዲሶፊ ደሚዲ ኢሲ ሚሺ ሃናናሺ ጋካናሰ ታ ናጌ ዋሒን ኔስ ዱማቲ ኡቲዳ ሚሽ ገዲዳ ገሻስ ማ» ገዴሰ፡፡ ሳኦሊካ ሄ ጋላሳ ኦማርሲ ሳሜላራ ኢሲፊ ሚዴሰ፡፡

25 ሄ ጎይኒዛ ዙምቡላዛ ቦላፊ ዱጌ ካታማ ዋጲዳፔ ጉዬ ሳሜሊ ባ ኬላን ዲዛ ፖቄዛ ቦላ ሳኦሊራ ሃሳይዴሰ፡፡

ሳኦሊ ካዋቲሐ

26 ማለዶ ዴንዲዳ፤ ሳሜሊ ሳኦሊ ፖቄዛ ቦላፊ ጳይገዲ፡ «ታ ኔና ሞይዛና ጋይሰ ጊጌታ» ገዴሰ፡፡ ሳኦሊካ ጊጌቲዳ ማላ ሳሜላራ ኢሲፊ ኦይኬቲዲ ካሬ ኬዚዳ፡፡

27 ኢሰቲ ቢዲ ካታማይ ዉርሴሐ ማቲሺን ሳሜሊ ሳኦሊሰ፡ «ኔ አይሌዚ ኑፔ ሲንፋቲ ባና ማላ ኔ ኢዛስ የታ» ገዴሰ፡፡ አሸካራዚካ ኢዚ የቲዳ ማላ ኦሒዴሰ፤ ሄሳፊ ጉዬ ሳሜሊ ሳኦሊ፡ «ኔኒ ገዲኮ ኔስ ጸሳፊ ኪቲቲዳ ኪታ ታ ኔስ የታና ማላ ጉላ ዋዴስ ሃኒን ናጋሻ» ገዴሰ፡፡

10

1 ሳሜሊ ዛይቲ ቢሪሌ ኤኪዲ ዛይቲዛ ሳኦሊ ሁኤን ጉሲዳፔ ጉዬ ዬሪ ኤኪዴሰ፤ ሄሳፊ ጉዬ፡ «ባ ጺንጾ ቦላ ኔ ሃሪዛዴ ገዳና ማላ ጸሲ ኔና ዶሪቤኔ?

2 ሃች ኔ ታፔ ሻኬታ ቢሺን ቢኒያሜ ጳሳን ዲዛ ጸልጸሆ ጌቲቲዛሶን ዲዛ ኤራሂሊ ዱፎ አቻን ዲዛ ናምኡ አሳታራ ኔ ጋይታና፤ ኢስቲካ፡ ሩ ኮይዛ ሃሬቲ ቤቲዳ፤ ሃኢ ኔ አዋይ ሃሬታሰ ቆፒዛይሳ አጊዲ ታ ናዛ ጊሻሰ ታ አይ ኦሊን ኪያኔ? ጊሼ ጩጩን ዴሰን ጋና።

3 «ኔኒካ ሲንሐ ጉጃ ጉጃ ባዳ ታቦሬን ዲዛ ጊታ ዛፌዛሶ ጋካናሰ ባና፤ ሄንካ ሄሹ አሳቲ ኢሶይ ሄሹ ዴይሻ ላቃ፡ ናምኦንሶዚ ሄሹ ኡኬሐ፡ ሄሻንሶዚ ዋይኔ ኡሺ ኩሚዳ ሉካዋ ኦይኪዲ ጸሳኮ ቤቲሌ ኬዚሼ ኔናራ ጋይታና።

4 ኢስቲ ኔና ሳሮኪ ሲሚዲ ናምኡ ኡኬሐ ኔሰ ኢማና፤ ኔካ ኢስታፌ ኤካና።

5 «ሄሳፌ ጉዬ ኔኒ ፊሊሰጾሜ ኦላንቻቲ ዲዛሶ ጸሳ ዙማ ጊቢኦ ኬዛና፤ ኔ ካታማዮ ጋኪዳ ማላ ናቤታ ዱላታይ፡ ማሲንቆን፡ ካራቤን፡ ዲንኬኒኔ ዲላን አዛቤቲዲ ቲንቢቲ ዮቲሼ ዙምቡላን ጎይኒዛሶፒ ዱጌ ዋጂሺን ኔ ኢስታ ዴማና።

6 ኔ ቆፖንታ ዲሺን ጎዳ አያናይ ዋልቃን ኩሚዲ ኔ ቦላ ዋጃና፤ ኔካ ኢስታራ ቲንቢቲ ሃሳያ ዶማና፤ ኔኒ ሃራ አሰ ሚሳታ ላሜታና።

7 ሃይቲ ማላታቲ ኔ ቦላ ፖሌቲዛ ዋዴ ጸሲ ኔናራ ዲዛ ጊሻሰ ኔ ኩሼይ ኦላና ዳንዳይዛ ኡባ ኦላ።

8 «ታፔ ሲንላታዳ ዱጌ ጌልጌላ ዋጃ፤ ታኒካ ጸጌቲዛ ያርሾኔ ኢሲፌቲላ ያርሾ ሺሻናሰ ኔኮ ያና፤ ጊዶ ኦቲን ታ ኔኮ ያዳ ኔ አይ ኦላና ቤሲዛኮ ታ ዮታናሼ ጋካናሰ ላፑን ጋላሰ ኔ ታካና ቤሴሰ» ጊዴሰ።

9 ሳኦሊ ሳሚላፒ ሻኬቲ ባና ጊሺን ጸሲ ሳኦሌ ዋዚና ላሚዴሰ፤ ማላታቲ ኡባይ ሄ ጋላሰ ፖሌቲዳ።

10 ሳኦሊ ጊቢኦ ጋኪሺን ናቤታ ዱላታይ ኢዛ ዴሚዴሰ፤ ጸሳ አያናይ ዋልቃን ኩሚዲ ኢዛ ቦላ ዋጂዴሰ፤ ኢዚካ ኢስታራ ቲንቢቲ ሃሳይዴሰ።

11 ካሴ ኢዛ ኤሪዛይቲ ኡባይ ኢዚ ናቤታራ ቲንቢቲ ሃሳይሺን ቤኢዲ ኢስቲ ባንታ ጊዶን፡ «ቂሴ ናዛ ኦዜ ቦቺዳይ? ሳኦሊ ናቤታ ባጋ?» ጊሼ ኢሶይ ኢሳ ኦይቺዳ።

12 ሄ ዴሬን ዴኢዛ ኢሲ አዴዚ፡ «ኢስታ አዋይች ኢዚ ኦኔ?» ጊ ኦይቺዴሰ፤ ሄሳ ጊሻሰ፡ «ሳኦሊካ ናቤታ ባጋፌ?» ጊዛ ቶሴ ቃላ ጊዲዴሰ።

13 ሳኦሊ ቲንቢቲ ሃሳዬ ገጊዳፔ ጉዬ ጎይኒዛሶሆ ፑዴ ዙምቡላ ቦላ ኬዚዳሰ።

14 ሄ ዋዴ ሳኦሊስ አዋ አሻይ ሳኦሊኔ ኢዛ አሸካራ፥ «ኢንቲ አዋን ዴቲ?» ገ ኦይቺዳሰ፤ ኢሰቲካ፥ «ኦኒ ሃሬታ ኮያና ቢደሰ፤ ገዶ አቲን ኢሰቲ ቤቶንታ ኢጸን ሳሜላኮ ቢደሰ» ገዳ።

15 ሳኦሊ አዋ አሻዚካ፥ «ሃያና ሳሜሊ ኔሰ ዮቲዳይሳ ታሰ ዮታርኪ!» ገዴሰ።

16 ሳኦሊካ ዛሪዲ ኢዛሰ፥ «ኦሰ ሃሬቲ ቤቲዳይሳ ቆንጨሲ ዮቲዳሰ» ገዴሰ፤ ገዶ አቲን ኢዚ ካዎታናይሳ ሳሜሊ ኢዛሰ ዮቶይሳ ባ አዋ አሻዛሰ ዮቲቤና።

17 ሳሜሊ ኢሰራኤሌ ዴራ ጎዳ ሲንፅ ሚጸጸ ጾይጊዲ፥

18 ኢሰታሰ፥ «ጎዳ ኢሰራኤሌ ጸሳይ፥ ሂን ኢሰራኤሌ አሳ ገብጾፔ ኬሳዲሰ፤ ገብጾን ኢንቲ ኡንኤቲ ዲዛሶፔ፥ ሃራ ካዎቲፅታ ኩሼፔ ታ ኢንቲና አሻዲሰ» ገሰ።

19 ሃቶ ገዲኮ ኢንቲ ሚቶፔኔ ዋዬፔ ኢንቲና አሺዳ ኢንቲ ጸሳ ካጺዲ፥ «ሃኔና ኦሰ ካዎ ካዎፅ» ገዴታ። ሄሳ ገሻሰ ኢንቲ ቆዋን ቆዋኒኔ ኢንቲ ዛርኬን ዛርኬን ጎዳ ሲንፅ ሺቂቲ» ገዴሰ።

20 ሄሳፌ ጉዬ ሳሜሊ ኢሰራኤሌ ቆዋታ ኡባ ሺሺን ቢኒያሜ ቆዋይ ዶሬቲዳሰ።

21 ካሊዲካ ቢኒያሜ ቆዋታ ኢሰታ ዛርኬን ዛርኬን ሺሺዳሰ፤ ማጸሬ ዛርኬይ ዶሬቲዳሰ፤ ዉርሴፅን ቂሴ ና ሳኦሊ ዶሬቲዳሰ፤ ገዶ አቲን ኮዩሺን ኢዚ ቤቲቤና።

22 አሳቲካ፥ «አዴዚ ዪዳ?» ገ ኦይቺዳ፤ ጎዳይካ፥ «ኤ፥ ዪዳሰ፤ ገዶ አቲን ሳኦሊ ሚሻታ ገዶን ቆቲቲ ኡቲዳሰ» ገዴሰ።

23 ኢሰቲካ ዋጺ ቢዲ ኢዚ ቆቲቲ ዲዛሶፔ ኤኪ ዪዳ፤ ኢዚ ዴራ ገዶን ኤቂዳሼ ጌሳን ኢዛራ ሊኬቲዛ ኣሲ ዶንታ ገሻሰ ኣሲ ኡባይ ኢዛሰ ሃሼፔ ጋርሳን አቲሰ።

24 ሳሜሊካ ኩሜፅ ዴሬዛ፥ «ጎዳይ ዶሪዳይሳ ቤዬቲ? ዴራ ኡባ ገዶን ኢዛራ ገኒዛ ኣሲ ዴና» ገዴሰ፤ ዴሬዚ ባ ቃላ ጾቄ ሂሰቲዲ፥ «ካዎይ ሚርናሰ ካዎቶ!» ገዴሰ።

25 ሳሜሊካ ካዎሰ ቤሲዛ ዋጋኔ ማራ ዴራሰ ቆንጨሲዳፔ ጉዬ ማጸፋን ጸፊዲ ጎዳ ሲንፅን ዋሐዳሰ፤ ሄሳፌ ጉዬ ሳሜሊ አሳ ኡባ ባሶ ባሶ ባና ማላ ዬዲዳሰ።

26 ሳኦሊካ ባሶ ገቢኣ ቢዳሰ፤ ጸሲ ኢሰታ ዋዚና ቦቺዳ ገታ አሳቲ ኢዛራ ኢሲፌ ቢዳ።

27 ኢሲ ኢሲ ሹፋሮ አሳቲ፥ «ሃይሳ ማላ ኣሲ ኦና አሻና ዴንዳይዜ?» ገዲ ኢዛ ካጺዳ፤ ኢዛሰ ኣይኮ ኢዋታካ ኤሂቤቴና፤ ሳኦሊ ገዲኮ ጮኡ ገዴሰ።

11

ያቡሴ ካታማ አቴል

¹ አሞኔ ዴሬ አስ ናኦሴይ ከዚሲ ያቢሴ ጋላኣዴ ጊዶሊዴስ፤ ያቡሴ አሳይ ኡባይ፡ «ኔ ኑናራ ጫቄታ፤ ኑኒ ኔስ ሃሬታና» ጊዳ።

² ናኦሴይ ኢስታስ፡ «ታ ኢንቴናራ ጫቄታናይ ኢንቴፌ ኢሳ ኢሳ ኡሻቻ አይፌ ዎጫ ኬሳዳ ኢስራኤሌ አሳ ኡባ ካዉሺዳፔ ጉዬና» ጊ ዛሪዴስ።

³ ያቡሴ ዴሬ ጨማቲ፡ «ኩሜላ ኢስራኤሌ አሳስ ኑ ከታ ዬዳናስ ላቸን ጋላስ ኑስ ባሬ ኢማ፤ ኑና አሺዛ አሲ ዳይኮ ኑ ኔስ ሃሬታና» ጊዳ።

⁴ ከቴቲ ቢዳይቲ ሳኦሊ ዲዛሶ ጊቢኣ ቢ ጋኪዲ ሄሳ ዴሬዛስ ዮቲዳ ማላ ዴሬዚ ኡባይ ባ ቃላ ቶቄ ሂስቲዲ ዬኪዴስ።

⁵ ሄ ዎዴ ሳኦሊ ጎሻሶፔ ቦራታ ላጊ ዪሼ፡ «ሃይሲ አሳይ አዛስ ዬኪዜ?» ጊ ኦይቺዴስ፤ ኢስቲካ ያቡሴ አሳይ ኢስታስ ጊዳይሳ ኢዛስ ዮቲዳ።

⁶ ሳኦሊ ሄሳ ሲዱዳ ማላ ጸሳ አያና ዎልቃይ ኢዛ ቦላ ዎዲዴስ፤ ሳኦሊ ኬሂ ሃንቄቲዴስ።

⁷ ዎጻ ቦራታ ቃንጾሬሊዴስ፤ ኢስታ አሾዛካ ከቴቲዛ አሳታ ቦላ ኢስራኤሌ አሳ ኡባኮ ዬዲሼ፡ «ሳኦሌኔ ሳሜላ ካሎንታ ኢጺዛ አሲ ዲኮ ኢዛ ቦራታይሳቶካ ቃንጾሬላና» ጊዴስ፤ ዳሮ ዳጋማይ ሳዳ ማታፔ ዴራ ቦላ ዎዲዴስ፤ ዴሬዚ ኢሲ ዎዚና ጊዲዲ ከዚዴስ።

⁸ ሳኦሊ ቤዜቄን ባ ኦላ አሳ ሺሺን አሳ ቆዳይ ኢስራኤሌፔ 300,000፡ ዩሁዳፔ 30,000 ጊዲዴስ።

⁹ ያቡሴፔ ከቴቲ ዪዳ አሳታስ፡ « (ዎንቶ አርሼይ ሆኢሺን ኢንቴ ላኣ ዬዴታና) ጊዲ ኢስታስ ዮቲቲ» ጊዳ። ከቴቲዳይቲ ቢዲ ሄሳ ያቢሴ አሳስ ዮቲን አሳይ ኡፋይሳን ጉፒዴስ።

¹⁰ ያቡሴ አሳይ አሞኔ አሳስ፡ «ዎንቶ ኑ ኢንቴስ ኩሼ ኢማና፤ ኢንቴካ ኢንቴስ ሎኦ ሚሳቲዳዝ ኑ ቦላ ኦላና ዳንዳይታ» ጊዳ።

¹¹ ዎንቴላ ጋላስ ሳኦሊ ባ ኦላ አሳ ሄሹ ኬሲ ሻኪዴስ፤ ጋዴይ ዎንታና ጊሺን አሞኔ ጉታ ሜንሊ ጌሊዲ ጸልቄይ ዎቶና ጋካናሼ ዲፒ ሂስቲዳ፤ ሽዎፖራ ፓጻ ኣቲዳይቲ ጊዲኮ ናሞኡ አሲ ኢሲፌ ዴኣናስ ዳንዳዮንታሼ ጋካናስ ላሌቲዳ።

ሳኦሊ ካዎቴላ አማኔቴል

¹² ሄሳፌ ጉዬ ዴሬዚ፡ « (ሳኦሊ ኑ ቦላ ዎኒ ካዎታና ዳንዳይዜ!) ጊዳይቲ ኦናንቴ? ሄይታንታ ኑኒ ዎቶና ማላ ሃ ኑኮ ኤሃ!» ጊዳ።

13 ሳኦሊ ጊዲኮ፡ «ሃች ጎዳይ ኢሰራኤል አሺዳ ጋላስ ጊዲዳ ጊሻስ ሃቻ ጋላሳን ኦኒካ ሃይቆፎ» ጊደሰ።

14 ሄሳፌ ጉዬ ሳሜሊ ዴራ፡ «ሃ ዪቴ ኣኔ ጌልጌላ ቦስ፤ ኢዛ ካዎቴላካ ሚንሶስ» ጊደሰ።

15 ዴሬዚ ወሪ ጌልጌላ ቢዴስ፤ ሳኦሊ ካዎቴላካ ጎዳ ሲንላን ሚንሲዴስ፤ ዴሬዚካ ሄን ጎዳ ሲንላን ኢሲፌቴላ ያርሾ ሺሺዴስ፤ ሳኦሊኔ ኢሰራኤል ኣሳይ ኡባይ ጊታ ባኣሌ ኦሒዳ።

12

ሳሜላስ ወርሴላ ሃሳያ

1 ሳሜሊ ኩሜላ ኢሰራኤል ዴራስ፡ «ቤኢቴ ኢንቴ ጊዳይሳ ኡባ ሲያዳ ታ ኢንቴስ ካዎ ካዎላዲስ።

2 ካዎ ጊዲ ኢንቴና ካሌላናዴ ቤኢቴ ዴሚዴታ፤ ታስ ዎዴይ ቢዴስ፤ ታስ ሁኤይካ ፑሉሚዴስ፤ ታ ናይቲካ ኢንቴናራ ዴቴስ፤ ናቴቴላፌ ዶማዳ ታ ኢንቴና ካሌላሼ ጋሞኣዲስ።

3 ቤኢቴ፡ ሃኢ ታ ኢንቴ ሲንላን ኤቃዲስ፤ ጎዳ ሲንላኒኔ ኢዚ ቲይዳዴ ሲንላን ታ ቦላ ዎሒዛዚ ዲኮ ማርካቲቴ፤ ኦና ቦራ ኤካዲና? ኦና ሃሪ ኤካዲና? ኦና ባሌላዲና? ኦና ቦላ ጌኔ ኦላዲና? ቤኢዲ ቤኦንታዴ ማላ ሃናናስ ኦናፔ ማጋንጾ ማዲና? ሃይታንታ ኡባፌ ኢሳ ታ ኦሒዳ ጊዲኮ ታ ኢንቴስ ዛራና» ጊደሰ።

4 ኢስቲካ፡ «ኔ ኦና ባሌላቤካ ዎይኮ ጌኔ ኦ ቦላ ኦላቤካ፤ ኣይ ኣሳ ኩሺፔካ ኢሲ ሚሽ ኤካቤካ» ጊ ዛሪዳ።

5 ሳሜሊካ፡ «ታ ቦላ ኢንቴ ኣይ ዎሶካ ዴሞንታይሳስ ጎዳይኔ ኢዚ ቲይዳይሲ ሃች ኢንቴ ቦላ ማርካ» ጊደሰ።

ዴሬዚካ «ኤ ኢዚ ማርካ» ጊደሰ።

6 ሂስቲን ሳሜሊ ዴሬዛስ፡ «ሙሴኔ ኣሮኔ ዶሪዳይ፡ ካሴ ኢንቴ ኣዎታካ ጊብጾፔ ኬሲዳይ ጎዳ።

7 ሃኢካ ኢንቴሲኔ ኢንቴ ኣዎታስ ኦሒዳ ጸሎ ኦሶ ኡባ ጊሻስ ጎዳ ሲንላን ታ ኢንቴና ሞቲዛ ጊሻስ ሃይሳን ኤቂቴ።

8 «ያቆቤይኔ ኢዛሶ ኣሳይ ጊብጾ ጌሊዳፔ ጉዬ ኢንቴ ኣዎቲ ማዶ ዴማናስ ጎዳኮ ዋሲዳ፤ ጎዳይካ ኢንቴ ኣዎታ ጊብጾፔ ኬሲዲ ሃይሳ ሃ ሶሆዛን ዳና ማላ ኦሒዳ ሙሴኔ ኣሮኔ ከቲዴስ።

9 «ኢስቲ ጊዲኮ ጎዳ ባንታ ጸሳ ባሊዳ፤ ሄሳ ጊሻስ ኢዚ ሃጾሬ ዴሬ ኦላ ጋዳዎ ሲሳራስ፡ ፊሊስጾሚሲኔ ሞኣቤ ካዎስ ኢስታ ኣሒ ኢሚዴስ። ኢስቲካ ኢሰራኤል ኣሳ ጸኒዳ።

10 ሄሳፌ ጉዬ ኢስታስ፡ ሱኒ ናጋራ ኦሊደስ፤ ኑኒ ጎዳ አገዲ ባኣሌሲኔ አስታሮቲስ ጎይኒደስ፤ ሃኢ ገዲኮ ኑና ኑ ሞርኬታ ኩሼፔ አሻ፤ ኑ ኔስ ጎይናና!፤ ገዲ ጎዳኮ ዋሲዳ።

11 ሄሳፌ ጉዬ ጎዳይ ዩሩባኣሌ፡ ባራቄ፡ ዮፍታሄኔ ሳሜላ ከቲዲ ኢንቴ ሳሮን ዳና ማላ ኢንቴ ዩሾን ዲዛ ኢንቴ ሞርኬታ ኩሼፔ ኢንቴና ኬሲ ኤኪደስ። *

12 «አሞኔ ካዎ ናኑሴይ ኢንቴ ቦላ ዳንዲዳይሳ ኢንቴ ቤኢዲ ጎዳ ኢንቴ ጸሳይ ኢንቴስ ካዎ ገዲኮካ፡ ረዴና፤ ኑና ሃሪዛ ካዎ ኑ ኮዮስ» ገዴታ።

13 «ኢንቴ ኦይቺዳይሳኔ ዶሪዳ ካዎዛ ቤኢቴ ጎዳይ ኢንቴ ቦላ ካዎሊደስ።

14 ኢንቴ ጎዳስ ያዩኮ ጎይኒኮ፡ ኢዛስ አዛዜቲኮኔ ኢዛ አዛዛ ቦላ ማካሎንታ አገኮ፡ ሄሳሶካ ኢንቴኒኔ ኢንቴ ቦላ ካዎቲዳ ካዎዚ ጎዳ ኢንቴ ጸሳ ካሊኮ ኢንቴስ ሎኦ ገዳና።

15 ገዶ አቲን ኢንቴ ጎዳስ አዛዜቶንታ ኢዲዲ ኢዛ አዛዛ ቦላ ማካሊኮ፡ ኢዛ ኩሼይ ኢንቴ አዋታ ቦላ ዳዲዳ ማላ ኢንቴ ቦላካ ዳጸና።

16 «ሄሳ ገሻስ ኢንቴ ሚኒ ኤቂቴ፤ ጎዳይ ኢንቴ ሲንፋን ኦሊዛ ሃ ገታ ሚሻ ጸሊቴ!

17 ሃይሲ ሃኢ ገስቴ ማጸ ዎዴ ገዴኔ? ዳዳኔ ኢራ ዩዳና ማላ ታኒ ጎዳኮ ዋሳና፤ ኢንቴካ ኢንቴስ ካዎይ ካዎታና ማላ ኢንቴ ኦይቺዳይሳን ጎዳ ሲንፋን ኣይ ኬና ኢታ ኦሶ ኦሊዳኮ ሄ ዎዴ ኢንቴ ኤራና» ገዴስ።

18 ሄሳፌ ጉዬ ሳሜሊ ጎዳኮ ዋሲደስ፤ ሄ ጋላሲካ ጎዳይ ዳዳኔ ኢራ ዩዲደስ። ሄሳ ገሻስ ዳሬዚ ጎዳሲኔ ሳሜላስ ኬሂ ያዩደስ።

19 ዳሬዚ ኡባይ ሳሜላ፡ «ኑ ኦሊዳ ሃራ ናጋራይ ጉጸንታ ዲሺን ኑስ ካዎይ ካዎታና ማላ ኦይቺዳይሳን ሃራ ኢታ ሚሽ ጉጂ ኦሊዳ ገሻስ ኑ ሃይቆንታ ማላ ኑስ ኔ ኣይሌታስ ጎዳ ኔ ጸሳ ዋሳ» ገዴ።

20 ሳሜሊካ ኢስታስ፡ «ባቦፍቴ፤ ሃይሳ ሃ ኢታ ኡባ ኦሊዳታ፤ ገዶ አቲን ኢንቴ ኩሜፋ ዎዚናፔ ጎዳስ ጎይኒቴ፤ ጎዳ ካላናፔ ጉዬ ጎፒቴ።

21 ኢንቴና ጎኣናስ ዎይኮ አሻናስ ዳንዳዮንታ ሹፋሮ ሚሻታ ካሎፍቴ፤ ኢስቲ ሃዳ።

22 ጎዳይ ኢንቴና ባ ዳሬ ሂስታናስ ዶሲዳ ባ ገታ ሱንፋ ገሻስ ባ ዳራ ኣጌና።

12:10 ዳና 10:10-15

12:11 1ሳሜ 3:20፤ ዳና 4:6፤ 7:1፤ 11:29

* 12:11 ዩሩባሌ ገዛይሳ ኢሲ ኢሲ ማጸፋቲ ጌዶኔ ጌቲስ።

12:12 1ሳሜ

23 ሄሳፌካ ቦላራ ታ ኢንቴስ ዋሶንታ አጋዳ ታ ጎዳ ቆሃናይሲ ታፔ ሃኮ። ታኒ ሎኦኔ ሱሬ ኦጌ ኢንቴና ታማርሳና።

24 ኢንቴ ጊዲኮ ጎዳስ ያዩቴ፤ ኩሜላ ዋዚናፔ ኣማኔቴላን ኢዛስ ጎይኒቴ፤ ኢዚ ኢንቴስ ኦሒዳ ጊታ ዮኦታ ባሎፒቴ።

25 ኢንቴ ናጋራ ኦሶን ሚኒ ኤቂዛ ጊዲኮ ኢንቴካ፣ ኢንቴ ካዎይካ ዳያና» ጊዴስ።

13

ሳሜሊ ሳኦሌ ሴሪዳ ሴሪ

1 ሳኦሊ ካዎቲሺን ኢዛስ ላይላይ ሄቹ ታማ። ኢዚ ኢስራኤሌ አይዱ ታማኔ ናሞኡ ላይሳ ሃሪዴስ።

2 ሳኦሊ ኢስራኤሌ አሳፔ 3,000 ኣስ ዶሪዴስ፤ 2,000 ኣሲ ዙሞቡላይ ዳሪዛ ቤቴሌኒኔ ማኪማሴን ሳኦሌራ፣ 1,000 ኣሲ ቢኒያሜ ዳሬ ገቢኣን ዮናታኔራ ዴስ፤ ሃንኮ ዴሬዚ ባሶ ባሶ ባና ማላ ሞይዚዴስ።

3 ዮናታኔይ ጌባን ዲዛ ፊሊስጾሜ ኦላ አሳይ ዲዛሶ ሾጪዴስ፤ ፊሊስጾሜ አሳይካ ሄሳ ሲዩዴስ፤ ሳኦሊካ፣ «ኢብራዌ አሳይ ሲዮ!» ጊዲ ዴራ ቦላ ዛዬ ፑኒሲዴስ።

4 ሄሳ ጊሻስ ኢስራኤሌ አሳይ ኡባይ፣ «ሳኦሊ ፊሊስጾሜ ኦላ አሳይ ዲዛሶ ሾጪዴስ፤ ኢስራኤሌ አሳይ ፊሊስጾሜ አሳ አቻን ቱና ሚሻ ማላ ኢጾቲዴስ» ጊዛ ዎሬ ሲዩዴስ፤ ዴሬዚካ ሳኦሌ ካላናስ ጌልኤላን ሺቂዴስ።

5 ፊሊስጾሜ አሳይ 3,000 ፓራ-ጋሬ፣ 6,000 ቶጋንቻታ፣ ቆዳይ ባይንዳ አባ ሻሚንታ ማላ ዳሪዳ ኦላ ኣስ ኤኪዲ ኢስራኤሌ ኦላናስ ሸቂዴስ፤ ኦላስ ኬዚዲካ ቤቴ-ኣዌቴ ኣርሼይ ሞኪዛ ባጋራ ዲዛ ማኪማሴን ኡቲዳ።

6 ኢስራኤሊቲ ዲዛ ሃኖታይ ኬሂ ሂርጊሲዛዝ ጊዲዳይሳኔ ኢስታ ኦላ አሳይካ ዳሮ ጩጩን ዲዛይሳ ቤኢዲ ጎንጎሎይ ዲዛሶን፣ ዎራይ ዲዛሶን፣ ዛላይ ዲዛሶን፣ ኣፎይ ዲዛሶንኒኔ ኦላይ ዲዛሶ ኡባን ቆቲቲዳ።

7 ኢስራኤሌ አሳፔ ኢሲ ኢሲ አሳቲ ዮርዳኖሴ ፒኒዲ ጋዴኔ ጋላኣዴ ዴሬ ቢዳ።

ሳኦሊ ጊዲኮ ጌልኤላን ታኪዴስ፤ ኢዛራ ኢሲፌ ዲዛ ኦላ አሳይ ኡባይ ባቢ ኮሶሪዴስ።

8 ኢዚካ ሳሜሊ ኢዛስ አሚዳ ባሬዛ ማላ ላፑን ጋላስ ጋካናሼ ናጊዴስ፤ ጊዶ ኣቲን ሳሜሊ ጌልጌላ ዪቤና፤ ሄሳፌ ጉዬ ሳኦሌ ኦላ ኣሳይ ላሌቱል ኦይኪዴስ።

9 ሄሳ ጊሻስ ሳኦሊ፡ «ጸጌቲዛ ያርሾዛን ኢሲፌቲላ ያርሾዛ ሃ ኤሂቲ» ጊዴስ፤ ሄሳፌ ጉዬ ጸጌቲዛ ያርሾዛ ኢዚ ያርሺዴስ።

10 ኢዚ ያርሾዛ ያርሺ ጊጊዳ ማላ ሄራካ ሳሜሊ ጋኪ ዋጂዴስ፤ ሳኦሊ ኢዛ ሞኪ ኤካና ኬዚዴስ።

11 ሳሜሊ፡ «ኔ ኣይ ኦላዲ?» ጊዲ ኢዛ ኦይቺዴስ፤ ሳኦሊካ ኢዛስ፡ «ኦላ ኣሳይ ላሊቲዳይሳ፡ ኔካ ባሪዳ ሳቲን ዮንታ ኣጊዳይሳ፡ ፊሊስጾሜ ኣሳይ ማኪማሴን ሺቂዳይሳ ቤኣዲስ፤

12 «ሄሳ ጊሻስ ፊሊስጾሜ ኣሳይ ዱጌ ጌልጌላ ታ ቦላ ያና፤ ታኒ ጎዳፔ ቲማይ ያና ማላ ዋሳቤኬ» ጋ ቆፓዲስ፤ ሄሳ ጊሻስ ጸጌቲዛ ያርሾ ሺሻናይሲ ታስ ኣቶንታዝ ጊዲዴስ» ጊ ዛሪዴስ።

13 ሳሜሊካ ኢዛስ፡ «ኔስ ቤሶንታዝ ኦላዳሳ፤ ጎዳ ኔ ጸሳይ ኔስ አሚዳ ኣዛዞ ናጋቤካ፤ ኔ ናጊዳኮ ኢስራኤሌ ቦላ ኔ ካዎቲላይ ሜርናስ ሚኒ ዳናሺን።

14 ሃኢ ጊዲኮ ኔ ካዎቲላይ ሚኒ ኤቁና፤ ቤኣ ጎዳይ ባ ዎዚና ማላ ሃኒዛ ኣስ ዴሚዴስ፤ ኔኒ ጎዳ ኣዛዞ ናንታ ኢጲዳ ጊሻስ ኢዚ ዴሬዛ ካሌሊዛዴ ጊዳና ማላ ዶሪዴስ» ጊዴስ።

15 ሄሳፌ ጉዬ ሳሜሊ ጌልጌላፔ ዴንዲዲ ቢኒያሜይ ኣይሲዛ ዴሬን ዲዛ ፑዴ ጊቢኣ ኬዚዴስ፤ ሳኦሊካ ባናራ ኢሲፌ ዲዛ ኣሳታ ቆዲዴስ፤ ኢስታ ቆዳይካ 600 ጊዲዴስ።

16 ፊሊስጾሜቲ ማኪማሴን ዴንካኒ ኡቲዳ ዎዴ ሳኦሊ፡ ኢዛ ና ዮናታኔይኔ ኢስታራ ኢሲፌ ዲዛ ኣሳቲ ቢኒያሜይ ኣይሲዛ ጌባ ዴሬን ዴቲስ።

17 ዎራጂዛይቲ ሄዙ ጩጋን ሻኬቲዲ ፊሊስጾሜታ ጉታፔ ኬዚዳ፤ ኢሲ ጩጋዚ ሹኣሌይ ኣይሲዛ ቢታ ኦፊራ ቢዴስ።

18 ናሞኣንሶ ጩጋዚ ቤቲ-ሆሮኔ ቢዴስ፤ ሄዘንሶ ጩጋዚ ባዞ ቢታ ጊናራ ሲቦዩ ዙሌራ ዱጌ ቤሲዛ ዛዋ ዩዩዴስ።

19 ፊሊስጾሜቲ፡ «ኢስራኤሌቲ ባንታስ ማሻ ዎይኮ ቶራ ኦሶፊቶ» ጊዳ ጊሻስ ኩሜላ ኢስራኤሌ ቢታን ዎጋጩይ ዴና።

20 ሄሳ ጊሻስ ኢስራኤሌ ኣሳይ ኡባይ ባንታ ማራሻኔ ጸይሌ ቆጲሳናስ፡ ባ ቤዩዴታኔ ባጫታ ፖሺሳናስ ዱጌ ፊሊስጾሜ ዴሬ ዎጂቲስ።

21 ላይዳኔ በዪጼ ቃሴ ቦራ ላጊዛ ቢራታ ሌች ፖሺሳናስ ኦይዱ ገራማ ገዲዛ ሳቂሌ ቢራ ጨጌቱስ፤ ኢስቲ ባንታ ማራሻኔ ጸይሌ ቆጶሳናስ ሄሳስ ናምኡ ኩሹ ገዲዛዝ ጨጌቱስ። *

22 ሄሳ ገሻስ ኦላዚ ዴንዲዳ ጋላስ ሳኦሌፔኔ ኢዛ ና ዮናታኔፔ ኣቲን ኢስታራ ኢሲፌ ኬዚዳ ኦላንቻታ ገደን ማሻ ዋይኮ ቶራ ኦይኪዳ ኢሲ ኣሲካ ዴና።

23 ሄ ዋዴ ፊሊስጾማታፔ ኢሲ ጨጋዚ ማኪማሴ ፑርዴን ኣፂ ኡቲዴስ።

14

ዮናታኔይ ፊሊስጾማታ ቦላ ጋሊዳ ዳፋ

1 ኢሲ ጋላስ ሳኦሌ ና ዮናታኔይ ኢዛ ጎንዳሌ ኦይኪዛ ናቴላዛ፡ «ሃ ያ፤ ሃራ ባጋራ ዲዛ ፊሊስጾማ ኦላንቻታ ጉታ ኣኔ ፒኖስ» ገዴስ፤ ገዶ ኣቲን ሄሳ ባ ኣዋስ ዮቲቤና።

2 ሄ ዋዴ ሳኦሊ ገቢኣፔ ማታን ማጌሮኔ ጌቲቲዛሶን ኦሮማኔ ሚላ ጋርሳን ዲንካኒ ኡቲዴስ፤ ኡሱፑን ጾት ገዲዛ ኣሳቲ ኢዛራ ዴቱስ።

3 ኤፋዴ ማይኢዛ ቁሴ ኣካያይ ኢስታራ ዴስ፤ ኢዚካ ሴሎን ጎዳ ቁሴ ገዲ ዲዛ ኤሌ ና፡ ፊኒሃሴ ና፡ ኢካቦዴ ኢሻ ኣሂጾቤ ና። ገዶ ኣቲን ዮናታኔይ ኢስታ ገደን ዶንታይሳ ኤሪዳ ኣሲ ዴና።

4 ዮናታኔይ ፊሊስጾማ ኦላንቻቲ ዲንካኒ ዲዛሶ ፒናና ኮዪዳ ፑርዴዛ ቦላ ሃዲርሳራኔ ኡሻቻራ ኮይሮይሲ ቦጾጾ፡ ናምኣንሶዚ ሴኔ ጌቲቲዛ ናምኡ ዘልዶ ዛላቲ ዴቱስ።

5 ኢሲ ዛላዚ ፑዴሃ ባጋራ ማኪማሴ ገናራ ዴስ፤ ናምኣንሶዚ ዲጌሃ ባጋራ ጌባ ገናራ ዴስ።

6 ዮናታኔይ ኢዛስ ጎንዳሌ ኦይኪዛ ናቴላዛ፡ «ሃ ያ፤ ቃጸሬቶንታ ኦላንቻታ ጉታ ኣኔ ፒኖስ፤ ጎዳይ ኦ ገሻስ ኦሊታናኮ ኣኔ ኤሪዛይ፤ ጎዳይ ጉላ ኣሳን ገዲን ዳሮ ኣሳን ኣሻና ገኮ ኢዛ ዲጋናይ ዴና» ገዴስ።

7 ኢዛስ ጎንዳሌ ኦይኪዛ ናቴላዚ፡ «ኔ ዋዚናን ቆፒዳ ኡባ ኦላ፤ ጉዬ ጎፓ፤ ታኒካ ኩሚላ ዋዚናፔ ኔናራ ዳይስ» ገዴስ።

8 ዮናታኔይ ኢዛስ፡ «ሂስቲኮ ሃያ፤ ኣሳይ ዲዛሶ ፒኒዲ ኣኔ ኣሳስ ቤቶስ።

9 ኢስቲካ፡ ሱኒ ኢንቲኮ ባና ጋካናስ ኦና ሄን ናጌቲ» ገኮ ኦኒ ዲዛሶን ዲዲ ኢስታ ናጋና፤ ፑዴ ኢስታኮ ኬዘኮ።

* 13:21 ላይዳ ገዛይሲ ሃራ ቢታታን ካል ሱራጊዛ ኮንጩ ማላ ሚሻ።

10 ጊደ አቲን ኢስቲ ኑና፡ «ፑዴ ኑኮ ከዚቲ» ጊኮ ጎዳይ ኢስታ ኑ ኩሼን አሏ ኢሚዳይሳስ ሄሲ ማላታ ጊዲዛ ጊሻስ ኑ ኢስታኮ ፑዴ ከዛና» ጊዴስ።

11 ኢስቲ ናሞኣቲ ፊሊስጾሜ ኦላንቻታስ ቤቲዳ ማላ ፊሊስጾሜቲ፡ «ኣሶ ቤኢቲ፤ ኢብራዌቲ ካሴ ባንቲ ቆቴቲዳ ኦላፊ ከሳ ቦላ ዴቲስ» ጊዴስ።

12 ሄሳፊ ጉዬ ፊሊስጾሜታ ሄራን ዲዛ ኦላ ኣሳይ፡ «ኣኔ ሃ ኑኮ ከዚቲ፤ ኑ ኢንቲና ኢሲ ሚሽ ቤሲ ኣጋና» ጊዲ ዮናታኔ ቦላኔ ኢዛ ጎንዳሌ ኦይኪዛ ናቲላዛ ቦላ ዋሲዳ። ሄሳ ጊሻስ ዮናታኔይ ኢዛ ጎንዳሌ ኦይኪዛይሳ፡ «ጎዳይ ኢስታ ኢስራኤሌታ ኩሼን አሏ ኢሚዳ ጊሻስ ሃ ያ ታና ካላ» ጊዴስ።

13 ዮናታኔይ ዙሚዲ ባስ ጎንዳሌ ኦይኪዛይሳ ካሌሌ ኤኪዲ ከዚዴስ፤ ፊሊስጾሜቲ ዮናታኔ ኩሼን ኩንዲዳ፤ ኢዛስ ጎንዳሌ ኦይኪዛይሲ ኢዛ ጉዬራ ካሊሼ ኢስታ ዋፂዴስ።

14 ዮናታኔይኔ ኢዛ ጎንዳሌ ኦይኪዛይሲ ኮይሮ ጋላስ ኢሲ ዋጻ ፔይሺዛ ጋዴን ናሞኡ ታሙ ጊዲዛ ኣስ ዋፂዳ።

ፊሊስጾሜታ ጾኔቲስ

15 ጉታ ጊደን ዴራ ቦላኒኔ ጎሻታ ቦላን ሺሮይ ዴንዲዴስ፤ ካሞቤ ናጊዛይቲኔ ዴፋ ጋሊዛይቲ ኡባይ ኮኮሪዳ፤ ቢታይካ ቃጶዴስ። ሄ ሺሮዚካ ጸሳፊ ኪቲቲዴስ።

16 ቢኒያሜይ ኣይሲዛ ጊቢኣን ዲዛ ሳኦሌ ዛቤቲ፡ ፊሊስጾሜ ኦላንቻቲ ዴማ ዴማ ባጋራ ላሌቲሺን ቤኢዳ።

17 ሳኦሊ ባናራ ዲዛ ኣሳታስ፡ «ኣኔ ኦላንቻታ ቆዲቲ፤ ኑ ጊዶፊ ኦኒ ቢዳኮ ቤኢቲ» ጊዴስ። ኢስቲ ቆዲዛ ዋዴ ዮናታኔይኔ ኢዛ ጎንዳሌ ኦይኪዛይሲ ሄን ዴቲና።

18 ሳኦሊካ ኣካያ፡ «ጸሳ ጫቆ ቃላ ታቦታ ሃ ኤካ ያ» ጊዴስ፤ ሄ ዋዴ ታቦታዚ ኢስራኤሌ ኣሳ ማታን ዴስ።

19 ሳኦሊ ቄሴዛስ ዮቶ ቦላ ዲሺን ፊሊስጾሜታ ሺሮዚ ጉጂ ጉጂ ቢዴስ፤ ሄሳ ጊሻስ፡ «ኣጋጋ፤ ኔ ኩሼ ሃ ዛራ» ጊዴስ።

20 ሄሳፊ ጉዬ ሳኦሊኔ ኢዛ ኦላንቻቲ ኢሲ ቦላ ኦላስ ቢዳ፤ ኢስቲካ ፊሊስጾሜቲ ባንታ ማሻን ቡሳኬቲሼ ጌታ ሺሮ ጋርሳን ዲዛይሳ ቤኢዳ።

21 ሃይሳፊ ሲንላን ፊሊስጾሜታ ሚሊን ኤቂዲ ኢስታራ ኢስታ ጉታ ቢዳ ኢብራዌቲ ሳኦሌራኔ ዮናታኔራ ዲዛ ኢስራኤሌ ኣሳኮ ሲሚ ጌሊዳ።

22 ኤፍሬሙ ጌዜን ቆቴቲ ዲዛ ኢሰራኤል አሳይ ኡባይ ፊሊስጾሜ አሳይ ባቃቲሼ ዲዛይሳ ሲዪዲ ሚንሉዲ ካሌቲ ካሌቲ ዩዴሉዴስ።

23 ሄ ዋዴ ጎዳይ ኢሰራኤል አሺዴስ፤ ኦላዚ ቤቲ-አዌነራ ካንሉ ቢዴስ።

ኦላዛፔ ሲሚን ሃኒዳ ሚሻታ

24 ሳኦሊ፥ «ሃች ታ ሞርኬታ ቦላ ሃሎ ኬሳናፔ ሲንፋን ኦማርስ ጋካናስ ካሐ ሚዳ አሲ ቃንጌቲዳዴ ጊዶ» ጊዲ ኢዚ ዴሬዛ ጫቄሉዴ ጊሻስ ሄ ጋላስ ኢሰራኤል አሳይ ጩጩን ፔኢዴስ፤ ሄሳ ጊሻስ ዴሬፔ ኢሳዴይካ ካሐ ዶናን ጌልሊቤና።

25 ኦላ አሳይ ኡባይ ዋራ ጊዶ ጌሊሺን ኤሲ ቢታ ቦላ ቤቲዴስ።

26 ዴሬዚ ዋራ ጊዶ ጌሊዛ ዋዴ ኤሳ ኢሊሎይ ጸኬቲዛይሳ ቤኢዴስ። ጊዲኮካ ጫቆዛስ ያዪዳ ጊሻስ ባ ኩሼ ባ ዶናኮ ሺሺዳ አይ አሲካ ዴና።

27 ጊዶ አቲን ኢዛ አዋይ ዴራ ጫቂሲ ዋሉዳይሳ ዮናታኔይ ሲዪቤና፤ ሄሳ ጊሻስ ኢዚ ባ ኩሼን ኦይኪዳ ፕሬዛ ዴራ ኤሳ ኢሊሎዛ ጊዶ ዩዲ ኤኪዲ ባ ኩሼራ ባፂን ኢዛስ አይፊይ ዴሊዴስ።

28 ሄሳፊ ጉዬ ኢሲ ዋታዳራዚ፥ «ኔ አዋይ ኦላ አሳ፥ ሃች ካሐ ዶናን ጌልሊዳ አሲ ኦኒካ ቃንጌቲዳዴ ጊዶ» ጊዲ ሚንሉ ጫቄሉዴስ። አሲ ኡባይ ዳቡርዳይ ሄሳ ጋሶና» ጊዴስ።

29 ዮናታኔይካ፥ «ታ አዋይ ቢታ ቦላ ሜቶ ሜጂዴስ፤ ሃኖ ኤሳይፊ ታ ጉሐ ባጂዳ ዋዴ ታ አይፊይ ዋኒ ዴሊዳኮ ቤኢቲ!

30 ዴሬዚ ባ ሞርኬታፔ ዲኢ ኤኪዳይሳፊ ሚዳኮ ሃች አይ ማላ ሎኦሺን አቲዴ! ሃይቂዳ ፊሊስጾሜታ ቆዳይ አይ ማላ ዳር ጊዳናሺን አቲዴ!» ጊዴስ።

31 ሄ ጋላስ ኢሰራኤል አሳይ ማኪማሴፔ ቢዲ አያሎኔ ጋካናስ ፊሊስጾሜ አሳ ሾጪዳፔ ጉዬ ኬሂ ዳቡርዴስ።

32 ሄሳ ጊሻስ አሳይ ዶርሳ፥ ቦራኔ ማራታ ዲኢ ኤሂዲ ቢታ ቦላ ሹኪዲ ዩቄቲሼ ሱፋራ ሚዴስ።

33 ሄሳፊ ጉዬ ሳኦሊስ፥ «ቤኦ አሳይ ዩቄቲሼ ሱፋራ ሚዲ ጎዳ ቆሂሼ ዴስ» ጊ ዮቲቲዴስ። ሳኦሊካ፥ «ኢንቲ ዋጋ ሚንሉዴታ፤ ሄሳ ጊሻስ ኢሲ ጌታ ሹች ቡሉሊሲዲ ሃ ታስ ኤሂቲ» ጊዴስ።

34 ኢዚካ፡ «ዳራ ጊደን ዩዩ ዩዩዲ፥ ሐንቴ ኢሶይ ኢሶይ ኢንቴ ቦራታኔ ኢንቴ ዶርሳታ ሃ ኤሂቴ፤ ሃይሳን ሹኪ ሚቴ፤ ጊዶ ኣቲን ኣሾዛ ሱፋራ ጋሊ ሚዲ ጎዳ ቆሆፒቴ» ጊ ዮቴቴ» ጊዴሰ። ሄሳ ጊሻሰ ሄ ጋላሳ ኦማርሰ ኢሶይ ኢሶይ ባ ቦራ ኤሂዲ ሄን ሹኪዴሰ።

35 ሳኦሊካ ያርሾ ያርሺዛሶ ጊግሲዴሰ፤ ያርሾ ያርሺዛሶ ኦሊሺን ሃይሲ ኢዛሰ ኮይሮ።

36 ሳኦሊ፡ «ኦማርሳራ ፊሊሰጾሜታ ካሊ ዋጂዲ ዋንታናሼ ጋካናሰ ኢሰታ ቦንቆሰ፤ ኢሰታፌ ኢሲ ኣሲካ ሼምፖራ ፓጾ ኣጎኮ» ጊዴሰ። ኢሰቲካ፡ «ኔሰ ሎኦ ሚሳቲ ቤቲዛ ኡባ ኦፋ» ጊ ዛሪዳ። ቄሴይ ጊዲኮ፡ «ኣኔ ሃን ጸሰ ኦይቾሰ» ጊዴሰ።

37 ሄ ዋዴ ሳኦሊካ፡ «ፊሊሰጾሜ ኣሳታ ካላዳ ዱጌ ዋጾ? ኢሰራኤሌታ ኩሼን ኔ ኢሰታ ኣፋ ኣማኔ?» ጊ ጸሰ ኦይቹዴሰ፤ ጊዶ ኣቲን ጸሲ ሄ ጋላሰ ኢዛሰ ኣይ ዛርካ ኣሚቤና።

38 ሄሳ ጊሻሰ ሳኦሊ፡ «ኦላንቻታ ካሌሊዛ ኡባቶ፥ ሃ ሺቂቴ፤ ሃቾ ኣይ ናጋራይ ኦሴቲዳኮ ኣኔ ሻኪ ኤርሰ።

39 ኢሰራኤሌ ኣሺዳ ዴኦ ጎዳይ ቤኢን ታ ና ዮናታኔይ ቆሆ ኦሊዳ ጊዲኮካ ሃይቃና ቤሴሰ» ጊዴሰ። ጊዶ ኣቲን ዴራ ጊዶፌ ኢዛሰ ዛሮ ኣሚዳይ ኢሳዴይካ ዴና።

40 ሄሳፌ ጉዬ ሳኦሊ ኢሰራኤሌ ኣሳ ኡባ፡ «ኢንቴ ወርካ ሄ ባጋራ ኤቂቴ፤ ታኒኔ ታ ና ዮናታኔይ ሃ ባጋራ ኤቃና» ጊዴሰ። ኣሳይካ፡ «ኤር ኔና ሎኦይሳ ኦፋ» ጊ ዛሪዴሰ።

41 ሂሰቲን ሳኦሊ፡ «ታሰ ሱሬ ዛሮ ኣማ» ጊ ጎዳ ኢሰራኤሌ ጸሳኮ ዋሲዴሰ፤ ሳማዚ ሳኦሌ ቦላኔ ዮናታኔ ቦላ ዋጂዴሰ፤ ዴሬዚ ጸሊ ኬዚዴሰ።

42 ሳኦሊካ፡ «ታ ቦላኔ ታ ና ዮናታኔ ቦላ ሳማ ዩጊቴ» ጊዴሰ፤ ሳማዚካ ዮናታኔ ቦላ ዋጂዴሰ።

43 ሄሳፌ ጉዬ ሳኦሊ ዮናታኔ፡ «ኣኔ ኔ ኦሊዳይሳ ታሰ ዮታ» ጊዴሰ፤ ዮናታኔይካ፡ «ታኒ ታ ጉፌ ጾራን ጉፋ ኤሳ ኢሊሎ ኤካዳ ታ ዶናን ጌልሊዳ ጊሻሰ ሄኮ ታኒ ሃይቃናሰ ጊኑታ ኡታዲሰ» ጊዴሰ።

44 ሳኦሊካ፡ «ኢታ ሚሽ ታ ቦላ ኤሂዳ ዮናታኔ! ኔኒ ሃይቆንታ ኣጊኮ ጎዳይ ታ ቦላ ፒርዶ» ጊዴሰ።

45 ጊዶ ኣቲን ዴሬዚ ሳኦሌሰ፡ «ኢሰራኤሌ ዴራሰ ሃይሳ ጊታ ጾኖ ኤሂዳ ዮናታኔይ ሃይቃናሰ ቤሲዜ? ቤሴና፤ ጸሲ ኢዛ ማዲን ሃቾ ኢዚ ሃይሳ ኦሊዳ ጊሻሰ ዴኦ ጎዳይ ቤኢን ኢዛ ሁኤ ቢናናፌ

ኢሲናካ ቢታ ቦላ ኩንዲኩ» ጌዳ፤ ሄሳን አሳይ ዮናታኔ አሺን ዮናታኔይ ሃይቆፔ አቲዴስ።

⁴⁶ ሂስቲን ሳኦሊ ፊሊስጾሜታ ዬዴጢዳይሳ አጊ ሲሚዴስ፤ ኢስቲካ ባንታ ዴሬ ሲሚዳ።

ሳኦሊ ካዎቴሴኔ ኢዛሶ አሳ ሃኖ

⁴⁷ ሳኦሊ ኢስራኤል አሳ ቦላ ካዎቴዳፔ ጉዬ ባ ዩሾን ዲዛ ባ ሞርኬታ ሞኦቤታ፥ አሞኔታ፥ ኤዶሜታ፥ ጸባ ካዎታኔ ፊሊስጾሜታ ኦሊዴስ። ቢዳሶን ቢዳሶን ኡባን ጸኒዴስ።

⁴⁸ ሚኒ ኦሌቲዲ አማሌቄታ ጸኒዴስ፤ ኢስራኤልታ ቦንቁዛይታ ኩሼፔ ኬሲ ኤኪዴስ።

⁴⁹ ሳኦሊ አቱማ ናይቲ ዮናታኔ፥ ዩሺዌኔ ማልኬሹኣ፤ ማጫ ናይቲ ባይራያ ሜርቦ፥ ካሎያ ሚልኮሎ ጌቴቴቴስ።

⁵⁰ ሳኦሊ ማቺያ አከማሴ ቢዮ አሂናሆሞ ጌቴታዉስ፤ ኢዛሶ ኦላ ጋዳዋዚ ኢዛ አዋ አሻ ኔሬ ና አቢኔሬ ጌቴቴስ።

⁵¹ ሳኦሊ አዋ ቂሴይኔ አቢኔሬ አዋ ኔሬይ አቢኤሌ ናይታ።

⁵² ሳኦሊ ካዎቴፋ ዎዴ ኡባን ፊሊስጾሜታራ ጫሞ ኦላይ ዴስ፤ ሄሳ ጊሻሰ ሚኖ አሰ ዎይኮ ቃራ አሰ ቤኢዳ ዎዴ ኡባን ኢዛዴ ባኮ ኤሂዲ ኦላንቻታ ጌዶ ጌልሴስ።

15

ሳኦሊ አማሌቄ አሳ ቦላ ዴንፊዳ ኦላ

¹ ሳሚሊ ሳኦሌ፥ «ባ ዴሬ ኢስራኤል ቦላ ታ ኔና ቲያዳ ካዎሳና ማላ ጎዳይ ታና ከቲዴስ፤ ሄሳ ጊሻሰ ጎዳፔ ዩዳ ከታ ኤዘጋ።

² ጎዳይ ኡባሬ ዎልቃማ ጸሳይ፥ ሂስራኤሌይ ጊብጾፔ ኬዚዳ ዎዴ አማሌቄቲ ኢስታራ ኦጌ ቦላ ኤቄቲዳ ጊሻሰ ታ ኢስታ ቃጸያና።

³ ሃኢካ ባ፤ አማሌቄታ ኦላ! ኢስታሰ ዲዛ ሚሽ ሙሌራ ቆይሳ፤ ኢሲ ሚሺካ አሾፋ፤ አቱማኔ ማጫ፥ ናኔ ዩቆ፥ ሚሄታኔ ደርሳታ፥ ጋሜላኔ ሃሬ ዎቆ» ጌዴስ።

⁴ ሄሳ ጊሻሰ ሳኦሊ አሳ ጸላኢሜ ጌቴቲዛሶን ሺሺዲ ቆዲዴስ፤ ኢስቲካ ኢስራኤሌፔ 200,000 ዎታዳራታ፥ ዩሁዳፔ 10,000 ዎታዳራታ ጌዲዳ።

⁵ ሳኦሊ አማሌቄታ ካታማ ቢዲ ኢሲ ዙሌ ጌዶን ዛማዲ ኡቲዴስ።

6 ኢዚካ ቄናዌ ዴሬ አሳ፡ «ኢስራኤል አሳይ ጊብጾ ቢታፌ ኬዚዳ ዋዴ እንቲ ኢስታስ ኪያቲዳ ገሻስ ታ ኢስታራ እንቲና ኢሲፌ ዳይሶንታ ማላ አማሌቄታፔ ሃኪቲ፤ ኢስታፌካ ሻኬቲቲ» ጊዴስ። ሂስቲን ቄናዌ አሳቲ አማሌቄታፔ ሻኬቲዳ።

7 ሂስቲን ሳኦሊ አማሌቄታ ሃዊላፔ ዴንፊዲ ኣርሼይ ሞኪዛ ባጋራ ጊብጾን ዲዛ ሹራ ጋካናስ ኦሊዴስ።

8 አማሌቄታ ካዎ አጋጌ ሺሞፖራ ፓጻ ዲኢዴስ፤ ዴራ ኡባ ቃራ ማሻን ሲፊዴስ።

9 ጊዶ ኣቲን ሳኦሊኔ ኢዛ ኦላ አሳቲ አጋጌ፤ ሎኦ ዶርሳታኔ ማሄታ፤ ኦሃላ ማሪኔ ላቃ፤ ሎኦ ሎኦ ጊዲዳ ኡባ ዋዶንታ አጋጊዳ፤ ሄይታንታ ኡባ ዋዳናስ ኮዪቤቴና፤ ጊዶ ኣቲን ሌቄቲዳይታኔ ሹፋርታ ዳይሲዳ።

ሳኦሊ ካዎቲላን ጋሞኦንታ ማላ ዮቲቲዳ ቃላ

10 ሃይሳፌ ጉዬ ጎዳ ቃላይ ሳሜላኮ ዪዲ፤

11 «ታኒ ሳኦሊ ካዎሊዳ ገሻስ ሞዴታዲስ፤ ጋሶይካ ኢዚ ታና ካሎ አጊዲ ጉዬ ሲሚዳ ገሻሲኔ ታ ኣዛዘ ፖሎንታ አጊዳ ገሻሳ» ጊዴስ። ሳሜሊ ኬሂ ጨጨዲ ኦማርስ ኩሜል ጎዳኮ ዋሲዴስ።

12 ሳሜሊ ዋንታ ማላዶራ ዴንዲዲ ሳኦሊራ ጋይታና ቢዴስ፤ ጊዶ ኣቲን፡ «ሳኦሊ ቃርሜሎሴ ቢዴስ፤ ሄን ሳና ሃሳኢሲዛ ሃዉልቲ ኤሲዳፔ ጉዬ ዲጌ ጌልጌላ ዋዲዴስ» ጌቲቲ ኢዛስ ዮቲቲዴስ።

13 ሳሜሊ ሳኦሊ ዴሚን ሳኦሊ፡ «ጎዳይ ኔና ኣንጆ፤ ጎዳ ኣዛዘ ታ ፖላዲስ» ጊዴስ።

14 ሳሜሊ ኢዛ፡ «ሂስቲን ሃይሲ ታ ሃይላን ሴቲቲዛ ዶርሳታ ዋሶይኔ ቦራታ ጸጎይ ኣዜ?» ጊ ኦይቺዴስ።

15 ሳኦሊ፡ «ኦላ አሳይ አማሌቄ አሳፔ ዲኢ ኤሂዳይታኮ፤ ሎኦ ሎኦ ዶርሳታኔ ቦራታ ጎዳ ኔ ጸሳስ ያርሻናስ ዋዶንታ ፓጻ ኣሺዳይታ፤ ሃንኮይሳ ጊዲኮ ሙሌራ ዳይሲዶስ» ጊ ዛሪዴስ።

16 ሳሜሊ ሳኦሊስ፡ «ሲያ፤ ቃማ ኦማርስ ጎዳይ ታስ ዮቲዳይሳ ኣኔ ታ ኔስ ዮታይስ» ጊዴስ። ሳኦሊካ፡ «ኤር ኣኔ ዮታ» ጊዴስ።

17 ሳሜሊ ኢዛስ፡ «ኔኒ ኔ ቆፋን ጉል ጊዲኮካ ኔ ኢስራኤል ኣሳ ካሌሊዛዴ ጊዳቤኪ? ጎዳይ ኔና ቲይዲ ኢስራኤል ቦላ ካዎሊዴስ።

18 ጎዳይ ኔና፡ «ባዳ ሄይታ ናጋራንቻታ አማሌቄ አሳ ሙሌራ ዳይሳ፤ ዲፒ ሂስታ ዳይሳናሺ ጋካናስ ኦላ» ጊዲ ኪቲዴስ።

19 ሂስቲን ኔ ኣይስ ጎዳስ ኣዛዜታቤኪ? ዲኦይሳ ሺሻናስ ዮራታዳ ኣይስ ጎዳ ሲንላን ኢታ ኦላዲ?» ጊዴስ።

20 ሳኦሊ ኢዛስ፥ «ታኒ ጎዳስ አዛዜታዲስ፤ ኢዚ ታና ከቲዳ ማላ ባዲስ፤ አማሌቄ አሳ ሙሌራ ጳይሳዳ ኢስታ ካዎ አጋጌ ኤካ ያዲስ።

21 ኦላ አሳይ ጊዲኮ ዲኤቲዳይሳፌ ጎዳስ ዱማቲዳይታ ጊዶፌ ሎኦ ሎኦ ዶርሳታኔ ቦራታ ጌልጌላን ጎዳ ኔ ጸሳስ ያርሻናስ ኤኪዳ» ጊዴስ።

22 ሳሜሊ፥

«ጎዳ ቃላስ አዛዜቲን
ኢዛ ኡፋይሲዛይሳ ማላ
ጎዳይ ጸጌቲዛ
ካላ ያርሻኒኔ
ሃራ ያርሻን ኡፋዬቲ ኤሪዜ?

ሄኮ አዛዜቴሊ ያርሻፌ፥
ኤዝጊ ሲሲ ጳርሻ
ሃንዳፌ አጼስ።

23 ማካላይ ማርሶ ማላ ናጋራ፤

አጋ ኢጸይ ኤቃ ጸሳስ
ጎይኖ ማላ ኢታ፤
ኔኒ ጎዳ ቃላ
ካጲዳ ጊሻስ
ኢዚካ ኔኒ ካዎ ጊዶንታ ማላ
ኔና ካጲዴስ» ጊዴስ።

24 ሄሳፌ ጉዬ ሳኦሊ ሳሜላስ፥ «ታኒ ናጋራ ኦላዲስ፤ ጎዳ አዛዛኔ ኔ ኢሚዳ ዎጋ ሞራዲስ፤ ታኒ ዴራስ ያዬዳ ጊሻስ ኢስታስ አዛዜታዲስ።

25 ሃኢካ ኔኒ ታ ናጋራ አቶ ጋና ማላኔ ጎዳስ ጎይናናስ ኔ ታናራ ኢሲፌ ሲማ ባና ማላ ታ ኔና ዎሳይስ» ጊዴስ።

26 ጊዶ ኦቲን ሳሜሊ ኢዛስ፥ «ታ ኔናራ ሲማ ቢኬ፤ ኔኒ ጎዳ ቃላ ካጲዳሳ፤ ጎዳይካ ኔ ኢስራኤሌ ቦላ ካዎቶንታ ማላ ኔና ካጲዴስ» ጊዴስ።

27 ሳሜሊ ባና ጉዬ ሲሚሺን ሳኦሊ ኢዛ አፋላ ጸራ ኦይኪን አፋላዚ ዳኬቲዴስ።

28 ሳሜሊ፥ «ጎዳይ ሃች ኢስራኤሌ ካዎቴላ ኔ ኩሼፔ ዳኪዴስ፤ ኔፔ ሎኢዛ ኔ ሾራስ አሊ ኢሚዴስ።

29 ኢስራኤሌ ቦንሾ ጊዲዳ ጎዳይ ዎርዶቴና፤ ሞጴቴና፤ ጋሶይካ ሞጴታናስ ኢዚ አሴ ጊዴና» ጊዴስ።

30 ሳኦሊ፡ «ታኒ ናጋራ ኦፋዲስ፤ ጊዶ አቲን ታ ዴሬዛ ሃላቃታ ሲንፋኒኔ ኢሰራኤል አሳ ሲንፋን ታና ቦንቻርኪ! ጎዳ ኔ ጸሳስ ጎይናናስ ታናራ ኢሲፌ ሲማርኪ!» ጊዴስ፡

31 ሄሳ ጊሻስ ሳሜሊ ኢዛራ ኢሲፌ ሲሚዴስ፤ ሳኦሊካ ጎዳስ ጎይኒዴስ፡

32 ሄሳፌ ጉዬ ሳሜሊ፡ «አማሌቄ ካዎ አጋጌ ታስ ሃ ኤሂቲ» ጊዴስ፤ አጋጌይ፡ «ቱማፔ ሃይቆይ ሃይሳ ማላ ጫሞ?» ጊ ኮኮሪሼ ዩዴስ፡

33 ሳሜሊካ፡ «ኔ ማሻይ ማጫሳታ ዬሎይ ባይንዳ አሺዳይሳፉ ኔ አያካ ማጫሳታ ጊዶን ዬሎይ ባይንዳሮ ጊዳና» ጊሼ አጋጌ ጌልጌላን ጎዳ ሲንፋን ቃንጾሬላ ዩጊዴስ፡

34 ሄሳፌ ጉዬ ሳሜሊ ኤራማ ቢዴስ፤ ሳኦሊ ጊዲኮ ባሶ ፑዴ ጊቢኣ ኬዚዴስ፡

35 ሳሜሊ ሳኦሊስ ዩኪኮካ ኢዚ ሃይቃናሼ ጋካናስ ናምኣንፉ ኢዛ ቤኣናስ ቢቤና፤ ጎዳይ ሳኦሊ ኢሰራኤል ቦላ ካዎሊዳ ጊሻስ ሞጴቲዴስ፡

16

ዳዊቲ ቲዬቲል

1 ጎዳይ ሳሜሊስ፡ «ኢሰራኤል ቦላ ካዎቲ ደንታ ማላ ታ ካጵዳ ሳኦሊስ ኔ አዉዴ ጋካናስ ዩካኔ? ቤቴሊሄሜ ዴሬ አስ ኢሴዬኮ ታ ኔና ኪታና ጊሻስ ባሼ ካጩን ዛይቲ ኩንፋ ኤካ ባ፤ ታ ኢዛ ናይታ ጊዶፌ ኢሶይ ካዎ ጊዳና ማላ ዶራዲስ» ጊዴስ፡

2 ሳሜሊ ጊዲኮ፡ «ሳኦሊ ሲዩኮ ታና ዎፋና፤ ሂስቲን ታ ዋና ባና ዳንዳያዚና?» ጊዴስ፡ ጎዳይ ዛሪዲ፡ «ኢሲ ኡሱ ኤካ ባዳ፡ ሳዳስ ያርሻናስ ያዲስ» ጋ፡

3 ያርሾሶሆ ኢሴዬ ጴይጋ፤ ሄሳፌ ጉዬ ኔ ኦፋናይሳ ታ ኔና ቤሳና፤ ታ ኔስ ዮቲዛዴ ኔ ቲያና» ጊዴስ፡

4 ሳሜሊ ጎዳይ ጊዳይሳ ኦላዴስ፤ ኢዚ ቤቴሊሄሜ ጋኪዳ ዎዴ ካታማ ጨማቲ ኮኮሪሼ ኢዛራ ጋይታናስ ዩዳ፤ ኢስቲካ ኢዛ፡ «ኔ ሳሮስ ያዲ?» ጊ ኦይቺዳ፡

5 ሳሜሊካ ዛሪዲ፡ «ኤ ሳሮሳ፤ ታኒ ጎዳስ ያርሾ ሸሻናስ ያዲስ፤ ኢንቲካ ኢንቲና ጌሺዲ ታናራ ያርሾሶሆ ሃ ዩቲ» ጊዴስ፡ ሄሳፌ ጉዬ ኢሴዬኔ ኢዛ ናይታ ዱማሲዴስ፤ ያርሾሶሆ ያና ማላካ ጴይጊዴስ፡

6 ኢስቲ ሄ ጋኪሸን ሳሜሊ ኤልያቤ ቤኢዲ፡ «ቤኢቲ፤ ቱሙካ ጎዳይ ቲይዳይሲ ጎዳ ሲንፋን ኤቂዴስ» ጊ ቆፒዴስ፡

7 ጊደ እቲን ጎዳይ ሳሜላ፡ «ታኒ ሃይሳ ካጲዳ ጊሻስ ኔ ኢዛስ ማላ ዋይኮ ጌሳ ጸሎፋ፤ ጎዳይ እሲ ጸሊዛ ማላ ጸሌና፤ እሲ ካሬ ባጋ ሃኖታ ቤኤስ፤ ጎዳይ ጊዲኮ ዋዚና ጸሌስ» ጊደስ።

8 ሄሳፌ ጉዬ ኢሴዬይ ኣቢናዳቤ ጸይጊዲ ሳሜላ ሲንፋሪ ኣቆና ማላ ኦሊደስ፤ ጊደ እቲን ሳሜላ፡ «ጎዳይ ሃይሳካ ዶሪቤና» ጊደስ።

9 ካሊዲካ ኢሴዬይ ሻማሃ ኤሂደስ፤ ሳሜላ፡ «ኢዛካ ጎዳይ ዶሪቤና» ጊደስ።

10 ኢሴዬይ ባ ላፑን ናይታ ሳሜላ ሲንፋ ሺሺደስ፤ ጊደ እቲን ሳሜላ፡ «ጎዳይ ሃይታንታካ ዶሪቤና» ጊደስ።

11 ሄሳፌ ጉዬ ሳሜላ ኢሴዬይ፡ «ኔ ናይቲ ሃይታንታ ጸላ?» ጊደ እደቲደስ።

ኢሴዬይካ፡ «ኡባፌ ካሎዚ ቡሮ ዪቤና፤ ሃኢ ኢዚ ዶርሳታ ሄሚሼ ደስ» ጊደ ዛሪደስ።

ሳሜላካ፡ «ኣኔ ኪታዳ ኤሂሳ፤ ኢዚ ያናሼ ጋካናስ ኑ ኡቶኮ» ጊደስ።

12 ሂስቲን ኢሴዬይ ኪቲዲ ኤሂሲደስ፤ ኢዚ ኣሪሳ፡ ኣይፌራ ሎኢዛ ፑላንቻኔ ማላ ሎኦ ና። ጎዳይ ሳሜላስ፡ «ታኒ ዶሪዳይ ሃይሳ፡ ዴንዳዳ ቲያ» ጊደስ።

13 ሳሜላካ ካጪዞን ዲዛ ዛይቴዛ ኤኪዲ ኢዛ ኢሻታ ሲንፋን ኢዛ ቲይደስ። ሄ ጋላሳፌ ዶሚዲ ጎዳ ኣያናይ ዳዊቲ ቦላ ኬሂ ዋልቃን ዋጲደስ፤ ሳሜላ ጉዬ ሲሚ ኤራማ ቢደስ።

ሳኦሌ ካዋቲፋ ኬፋን ዳዊቲ

14 ጎዳ ኣያናይ ሳኦሌፕ ሃኪዳ ጊሻስ ጎዳፕ ኣዛዜቲዳ ኢታ ኣያናይ ዋዪሲሼ ደስ።

15 ሳኦሌ ኦሳንቻቲ፡ «ቤኣ፤ ጎዳፕ ኪቲቲዳ ኢታ ኣያናይ ኔና ዋዪሲሼ ደስ።

16 ሄሳ ጊሻስ ባጋና ሾጪ ዳንዳይዛ ኣስ ኮያና ማላ ኑ ጎዳይ ባ ሲንፋን ኤቂዛ ኦሳንቻታ ኣዛዞ፤ ሂስቲን ጎዳፕ ኣዛዜቲዳ ኢታ ኣያናይ ኔ ቦላ ዪዛ ዋዴ ኔስ ኢዚ ባጋና ሾጪና፤ ኔስካ ሎኦ ጊዳና» ጊደ።

17 ሄሳ ጊሻስ ሳኦሊ ባ ኣሽካራታ፡ «ባጋና ሎኤሊ ሾቕ ዳንዳይዛዳ ታስ ኮዪ ኤሂቲ» ጊደስ።

18 ኢዛ ኦሳንቻታፕ ኢሶይ፡ «ሎኤሊ ባጋና ሾቕ ዳንዳይዛ ቤቲሊሂሚ ዴሬ እስ ኢሴዬ ናዛ ቤኣዲስ፤ ኢዚ ቃራኔ ኦሳንቻ፡ ኣኬካንቻኔ ኡፋይሲዛ ቃላ ሃሳይዛዴ፤ ጎዳይካ ኢዛራ ደስ» ጊደስ።

19 ሄሳፌ ጉዬ ሳኦሊ፥ «ኔ ደርሳታኮን ዲዛ ኔ ና ዳዊቴ ዬዳ» ጊዲ ኢሴዬኮ ቃሰታኔታ ከቲደሰ።

20 ኢሴዬይ ቡዳና፥ ሉካሞ ኩሜላ ዎይኔ ኡሹ ሃሪ ቦላ ጫኒዲ፥ ዳይሻ ላቃ ጉጂ ኦይሊዲ ባ ና ዳዊቴ ሳኦሊኮ ዬዲደሰ።

21 ዳዊቴ ሳኦሊኮ ዬዲ ኢዛሰ ሃጋዘ ደሚደሰ፤ ሳኦሊካ ኢዛ ከሄ ደሲደሰ፤ ኢዚካ ሳኦሊ ጎንዳሌ ቶኪዛዴ ጊዲደሰ።

22 ሄሳፌ ጉዬ ሳኦሊ፥ «ታኒ ዳዊቴ ደሲዳ ጊሻሰ ኢዚ ማታን ዲሼ ሃጋዛና ማላ ታሰ ኢማርኪ!» ጊዲ ኢሴዬኮ ከቲደሰ።

23 ጎዳፔ አዛዜቲዲ ኢታ ኣያናይ ሳኦሊ ቦላ ዬዛ ዎዴ ዳዊቴ ባጋና ሾጪሺን ሳኦሊሰ ሎኤሰ፤ ኢታ ኣያናይካ ኢዛ ቦላፌ ሃኬሰ።

17

ዳዊቴኔ ጎልያዴ

1 ፊሊሰጾሜቲ ባ ኦላንቻታ ኦላሰ ዩሁዳ ቢታን ሶኮን ሺሺ ዎሊዳ፤ ኢሰቲካ ኢሰኮቴፔኔ ኣዜቄፔ ጊደን ዲዛ ኤፍሲ-ዴሚሜን ዱንካኒ ኡቲዳ።

2 ሳኦሊኔ ኢሰራኤላቲ ሸቂዲ ኤላ ዙሌን ዱንካኒዳ፤ ፊሊሰጾሜታራ ኦሌታናሰ ሶሆ ሶሆ ኦይኪዳ።

3 ኢሲ ባጋ ዙሞቡላዛ ፊሊሰጾሜቲ፥ ሃንኮ ባጋ ዙሞቡላዛ ኢሰራኤላቲ ኦይኪዳ፤ ኢሰታፌ ጊደን ዙሌይ ደሰ።

4 ጌቴፔ ዬዳ ኢዛሰ ጌሳይ ኡሱፑን ዋቆ ጊዲዛ ጎልያዴ ጌቴቲዛ ኢሲ ኦላ ቃራዚ ፊሊሰጾሜታ ጉታፔ ከዚደሰ።

5 ኢዚ ጸርቂማላፔ ኦሴቲዳ ቆቤ ሁኤን ዎሊደሰ፤ 5,000 ሳቂሌ ጊዲ ዴጲዛ ጸርቂማላፔ ኦሴቲዳ ጸሩሬ ማይኢደሰ።

6 ባ ሱሌዛን ጸርቂማላፔ ኦሴቲዳ ጋሞባሌ ዎሊዲ ባ ሃሼን ጸርቂማላፔ ኦሴቲዳ ጸንቃ ቶራ ኦይኪደሰ።

7 ኢዛ ቶራሰ ቶማይ ዎንዲራሼ ማላ ኦርዴ፤ ኢዛሰ ቶራ ኣይፌዚ ላፑን ከሎ ኬና ዴዴሰ፤ ኢዛ ኦላ ሚሽ ቶኪዛይሲ ኢዛፔ ሲንፋን ሲንፋን ቤሰ።

8 ጎልያዴይ ያቻን ኤቂዳ ኢሰራኤሌ ኣሳ ቦላ፥ «ኢንቴ ኦላሰ ሳልፊ ከዚዳይ ኣዛሰ? ታኒ ፊሊሰጾሜ ኣሰ ጊዲሺን ኢንቴ ሳኦሊ ኣይሌታ ጊዴኬቲ? ኣኔ ኢንቴ ጊደፊ ኢሳዴ ዶሪቴ፤ ኢዚካ ኣኔ ሃ ታ ዲዛሶ ዎጵ።

9 ኢዚ ታናራ ኦሌታናሲኔ ታና ዎቆናሰ ዳንዴይኮ ኦኒ ኢንቴሰ ኣይሌታ ጊዳና፤ ጊዶ ኣቲን ታኒ ኢዛ ጸኒዛ ጊዲኮኔ ኢዛ ዎጵዛ ጊዲኮ ኢንቴ ኦሰ ኣይሌታ ጊዲዲ ሃሪታና» ጊ ናጪደሰ።

10 ሂስቲዲ ፊሊስጶሜ ዳሬ አዳዚ፡ «ሃኙ ታኒ ኢስራኤል ኦላንቻታራ ኤቁታና፤ እኔ ኦሌታና እስ እሚቴ!» ጌዴስ።

11 ሳኦሊኔ ኢስራኤል አሳይ ኡባይ ሃ ፊሊስጶሜ አዳዚ ሃሳይዳ ቃላ ሲዱዲ ኬሂ ባቢዳኔ ዳጋሚዳ።

12 ዳዊቲ ዩሁዳ ቢታን ቤቴሊሃሜን ዲዛ ኤፍራታ ዳሬ እስ ኢሴዬ ና፤ ኢሴዬስ ኦሰፑን አቱማ ናይቲ ዴቴስ፤ ኢዚ ሳኦሊ ካዋቲላ ዋዴ ጨማኔ ዋዴይ ኬሂ ቢዳ አሳ።

13 ኢሴዬስ ባይራ ና ሃሻቲ ሳኦሊ ካሊዲ ኦላስ ቢዳ፤ ባይራዚ ኤልያቤ፡ ናሞኦንፊዚ አቢናዳቤ፡ ሃሻንፊዚ ሻማሃ።

14 ዳዊቲ ኢስታ ኡባሬ ካሎ፤ ኢዛስ ባይራ ኢሻቲ ሃሻቲ ሳኦሊ ካሊዲ ኦላስ ቢዳ።

15 ዳዊቲ ጌዲኮ ባ አዋ ዶርስ ሃማናስ ሳኦሊ ማታፔ ቤቴሊሃሜ ሲሜሬቲሼ ዴስ።

16 ሃ ፊሊስጶሜ አዳዚ 40 ጋላስ ኩሜል ኦማርሲኔ ማላዶ ኬዚ ቤቲ ቤቲ ሲሜስ።

17 ሃ ዋዴ ኢሴዬይ ባ ናዛ ዳዊቲ፡ «ሃይሳ ሃላሄቲዳ ታሙ ኪሎ ቲያኔ ታሙ ሶሎ ኔ ኢሻታስ ኢስቲ ኦላስ ዱንካኒ ኡቲዳሶ ኤሌ ጋላ።

18 ሃይታ ታሙ ላሉካ ፒላ ኢስታ አዛዚዛይሳስ ኢሲፌ ኤካ ባ፤ ኔ ኢሻቲ ዋኒ ዲዛኮ ቤአዳ ኢስቲ ሎኦ ዲዛይሳ ኤሪሲዛ ማላታ ታስ ኤካ ያ።

19 ኢስቲካ ሳኦሊራኔ ኢስራኤል አሳ ኡባራ ጌዲዲ ኤላ ዙሊን ፊሊስጶሜታራ ኦሌቲሼ ዴቴስ» ጌዴስ።

20 ዳዊቲ ዋንቲላ ጋላስ ማላዶራ ዶርሳታ ሃሚዛ አሳስ አገዲ ኢሴዬይ ኢዛ አዛዚዳ ማላ ሽንቄዛ ኤኪ ቢዴስ። ኦላንቻቲ ኦሌታናስ ጨቄቲሼ ሶሆ ሶሆ ኦይኪሺን ኢስቲ ዱንካኒ ኡቲዳሶ ጋኪዴስ።

21 ኢስራኤሊቲኔ ፊሊስጶሜቲ ሶሆ ሶሆ ኦይኪዲ ቲራን ጋይታናስ ዛማዲ ኡቲ ናጌቲስ።

22 ዳዊቲ ባ ኤፊዳ ሽንቄዛ ናጌዛይሳ ማታን ዋሊዲ አሳይ ኦሌቲዛሶ ዋዲዴስ፤ ባ ኢሻታ ዴሚዲ ኢስታ ሎኤቱል ኦይቺዴስ።

23 ኢዚ ኢስታራ ሃሳያን ዲሺን ጌቲፔ ዪዳ ፊሊስጶሜ ኦላ ቃራ ጎልያዴይ ኦላ አሳ ጌዶሬ ኬዚዲ ካሴ ባ ሎሲዳ ማላ ባልቡቂሺን ዳዊቲ ሲዪዴስ።

24 ኢስራኤል አሳይ ኡባይ አዳዛ ቤኢዳ ማላ ኬሂ ባቢዲ ኢዛ ሲንላፌ ባቃቲዴስ።

25 ኢስራኤል አሳይ ባንታ ጌዶን ኢሶይ ኢሳራ፡ «ሃይሲ ኡባ ጋላስ ኢስራኤሊራ ኤቄቲዛይሳ ቤኤቲ? ሃ አዳዛ ዋዲዳዴስ

ካዎይ ዳሮ አቆታ ኢማና፤ ባ ናዮካ ኢዛስ ማሾ ኢማና፤ ኢዛ አዋ ኬላካ ኢስራኤሌን ጊራ ቃንጺሴና» ጊ ሃሳዬቴስ።

26 ዳዊቲ ባ አቻን ኤቂዳ አሳታ፡ «አኔ ሃይሳ ፊሊስጶሜ አዳዛ ዎጂዲ ሃይሳ ሃ ካወሻቴላ ኢስራኤሌ ቦላፌ ዲጊዳዴስ አዚ ኦሴታኔ? ቃሴካ ዴኦ ጎዳ ኦላንቻታራ ኤቂታናስ ሃይሲ ቃጸራ ቃንጾቶንታ ፊሊስጶሜዚ ኢዚ ኦኔ?» ጊ ኦይቺዴስ።

27 ኢስቲካ ኢዛስ፡ «ኢዛ ዎጃና አሳስ ኦሴታናይ ሃይሳ» ጊዲ ካሴ ሃሳይዳይሳ ዛሪ ዮቲዳ።

28 ኢዛስ ባይራ አሻ ኤልያቤይ ዳዊቲ አሳታራ ሃሳይሺን ሲዱዲ፡ «አይስ ሃ ዎጃዲ? ሄ አማርዳ ዶርሳታካ ባዘን እናስ አጋ ያዲ? ኔ ኦቶሮቴላኔ ኔ ዎዚና ኢታቴላ ታ ኤራይስ፤ ኔ ዱዳይ ኦላ ቤያናስ ጸላ» ጊዲ ኬሂ ሃንቄቲዴስ።

29 ዳዊቲ፡ «ሂስቲን ታ አይ ኦላዲና? ኦይቻናስ ዳንዳይኪና?» ጊ ዛሪዴስ።

30 ሄሳፌ ጉዬ ሃራ አሳኮ ሲሚዲ ሲንላን ኦይሾ ኦይሻ ኦይቺዴስ፤ አሳቲካ ሲንላ አሳቲ ዛሪዳ ማላ ኢዛስ ዛሪዳ።

31 ዳዊቲ ሃሳይዳ ዮኦይ ሳኦሌ ሃይላን ዎጂዴስ፤ ሳኦሊካ ከቲ ጴይጊዴስ።

32 ዳዊቲካ ሳኦሌ፡ «ሃይሳ ፊሊስጶሜ አዳዛፔ ዴንዲዳይሳን እና ዎዚናይካ ዳጋዎፎ፤ ኔ አይሌዚ ቢዲ ኦላና» ጊዴስ።

33 ሳኦሊ ዛሪዲ፡ «ኔኒ ቡሮ ኢሲ አይፌ ና፤ አዳዚ ጊዲኮ ናቴቴላፌ ዶሚዲ ኦላራ ሜዜቲዳ ጊሻስ ኬዛዳ ሃ ፊሊስጶሜ አዳዛራ ኤቂታና ዳንዳያካ» ጊዴስ።

34 ጊዶ አቲን ዳዊቲ ሳኦሌስ፡ «ታኒ ኔ አይሌይ ታ አዋ ዶርሳታ ሄሚዛ ዎዴ ጋዎይ ዎይኮ ዛርዶይ ዱዲ ወዴ ሜሃ ጊዶፌ ኢሲ ዶርስ ኤኪ ቢሺን፤

35 ታኒ ካላ ባዳ ኢዛ ሾጫዳ ዶናፔ ዬጊሳይስ፤ ኢዚ ታ ቦላ ሲሚሺን ኢዛ ሲጸናላ ጩላ ኦይካዳ ሾጫ ዎጃይስ።

36 ታኒ ኔ አይሌይ ጋዎኔ ዛርዶ ዎጃዲስ፤ ሃይሲ ቃጸራ ቃንጾቶንታ ፊሊስጶሜዚ ዴኦ ጸሳ ኦላንቻታራ ኤቂቲዳ ጊሻስ ኢዛ ወርሴላ ኢስታፌ አሳ ማላ ጊዳና።

37 ታና ጋዎፌኔ ዛርዶ አቻፌ አሺዳ ጎዳይ ሃኢካ ሃ ፊሊስጶሜ አዳዛ ኩሼፔ አሻና» ጊዴስ፤ ሳኦሊካ ዛሪዲ፡ «ባ፡ ጎዳይ ኔናራ ጊዶ» ጊዴስ።

38 ሄሳፌ ጉዬ ሳኦሊ ባ ኦላ ማይኦ ዳዊቲ ማይዚዴስ፤ ቲራን ማይኢዛ ጹሩራካ ማይዚዴስ፤ ጸርቂማላፔ ኦሴቲዳ ቆቤ ኢዛ ሁኡን ዎላዴስ።

39 ዳዊቲ ሄሳ ማላ ኦላ ማይኦ ማይኢ ኤርንታ ገሻሰ ገላ ማሻ ኦላ ማይኦዛ ቦላ ዳንጪዲ ሄሜታናሰ ፓጪ ጸሊዴሰ። ኢዚካ ሳኦሌሰ፡ «ሃይሳፌ ካሴ ሃይሳ ማላ ሎሴይ ባይንዳ ገሻሰ ሃይሳዎ ሃናዳ ባናሰ ዳንዳይኬ» ገዴሰ፤ ሄሳ ገሻሰ ኦላ ማይኦታ ኡባ ኬሲ ዩጌዴሰ።

40 ሄሳፌ ጉዬ ባ ጉፌዛ ኦይኪዲ ኢቻሽ ሙሉሙቄ ሹቻታ ካንቼፌ ዶሪ ኤኪዲ ባ ሄንላ ኮሮጀን ዩጌዴሰ፤ ሂሰቲዲ ባ ያንባርሻ ኦይኪዲ ፊሊሰጾሜ ኣዴዛኮ ሸቂዴሰ።

ጎልያዴ ጸኔቴላ

41 ፊሊሰጾሜ ኣዴዚ ባ ጎንዳሌ ቶኪዛይሳ ሲንፌ ኣሊዲ ዳዊቲኮ ማቲ ማቲ ቢዴሰ።

42 ኢዚ ዳዊቲ ቲሺ ሂሰቲ ጸሊሸን ካይሻ፡ ማላ ሎኦኔ ቄሪ ኢሲ ኣይፌ ና ገዲዳ ገሻሰ ኢዛ ካቂዴሰ።

43 ፊሊሰጾሜ ኣዴዚ ዳዊቲ፡ «ላ፡ ኔኒ ጉፌ ኤካዳ ታ ቦላ ያናሰ ታ ኔሰ ካኔ?» ገዲ ባ ኤቃ ጸሳ ሱንላን ቃንጌዴሰ።

44 ቃሴካ፡ «ኣኔ ሃ ታኮ ያ! ኔ ኣሾ ታ ሳሎ ካፎታሲኔ ዶኣታሰ ኣላ ኢማና» ገዴሰ።

45 ዳዊቲ ፊሊሰጾሜ ኣዴዛሰ፡ «ኔኒ ገላ ማሻ፡ ቶራኔ ጸንቃ ቶራ ኤካዳ ታ ቦላ ያሳ፤ ታኒ ገዲኮ ኔ ኢዛራ ኤቄቲዳ ኢሰራኤሌ ኦላንቻታ ጸሳን፡ ኡባ ዳንዳይዛ ጎዳ ሱንላን ኔ ቦላ ባይሰ።

46 ሃች ጎዳይ ኔና ታ ኩሼን ኣሊ ኢማና፤ ታ ኔና ሾጫ ዩጋና፤ ታ ኔ ቆቆ ቃንጸ ዩጋና፤ ሃች ታኒ ፊሊሰጾሜ ኦላንቻታ ኣሃ ሳሎ ካፎታሲኔ ሳኦ ዶኣታሰ ኣላ ኢማና፤ ኣላሜ ኡባይ ኢሰራኤሌን ጸሲ ዲዛይሳ ኤራና።

47 ሃይሳን ሸቂዳ ኡባይ ጎዳይ ኣሺዛይ ማሻን ዎይኮ ቶራን ገደንታይሳ ኤራና፤ ኦሊዛይ ጎዳ ገዲዳ ገሻሰ ኢዚ ኢንቴና ኡባታካ ኑ ኩሼን ኣሊ ኢማና» ገዴሰ።

48 ፊሊሰጾሜ ኣዴዚ ኢዛ ሾጫናሰ ሸቂን ዳዊቲ ኢዛራ ኤቄታናሰ ጌዴ ኦላ ዴምባ ዎጺ ጌሊዴሰ።

49 ዳዊቲ ባ ኩሼ ኮሮጀን ዩዲዲ ኢሲ ሹች ኤኪዲ ቆይቂዴሰ፤ ፊሊሰጾሜዛሰ ኮንኬን ዩጌዴሰ፤ ሹቻዚ ኢዛ ኮንኬዛ ቶርጺ ጌሊዴሰ፤ ፊሊሰጾሜ ኣዴዚካ ሲንላ ጉላ ኩንዲዴሰ።

50 ሄሳሶ ሂሰቲዲ ዳዊቲ ፊሊሰጾሜ ኣዴዛ ሹቻኒኔ ያንባርሻን ጫዲ ዎቂ ጸኒዴሰ።

51 ዳዊቲ ዋጺ ቢዲ አዳዛ ቦላ ኬዚ ኤቂዳስ፤ ሃሳፌ ጉዬ ፊሊስጶሜዛ ማሻ ኮሆዛ፤ ሾዲ ኤኪዲ ኢዛ ዋጺዲ ኢዛ ቆጂካ ማሻን ቃንጺዳስ ፤ ፊሊስጶሜ አሳይ ኢስታ ኦላ ቃራይ ሃይቂዳይሳ ቤኢዲ ባቃቲዳ።

52 ሃሳፌ ጉዬ ኢስራኤል አሳይኔ ዩሁዳ አሳይ ዴንዲ ማጉሊሼ ጌቱ ፔንጌፊ ዴንፊዲ አቃሮኔ ፔንጌ ጋካናሰ ዩዴፊዳ፤ ፊሊስጶሜታ አሃይ ሻኢራይሜ፤ ቢዲ ጌቱ ጋካናሰ፤ ሄፔካ ቢዲ አቃሮኔ ጋካናሰ ዲዛ ኦጌ ቦላ ኩንዲዳስ።

53 ኢስራኤል አሳይ ፊሊስጶሜታ ዩዴፊ ሲሚዲ ኢስታ ጉታን ዲዛ ሚሽ ኡባ ቦንቂዳስ።

54 ዳዊቲ ፊሊስጶሜ አዳዛ ሁኤ ዩሩሳላሜ ኤኪ ዩዴስ፤ ጊዶ አቲን ፊሊስጶሜታ ኦላ ሚሻታ ባ ዱንካኔ ጊዶን ዋፊዳስ።

ሳኦሌ ሲንሳን ዳዊቲ ሺቆ

55 ዳዊቲ ፊሊስጶሜ አዳዛራ ኤቂታናሰ ቢዛ ዋዴ ሳኦሊ ቤኢዲ ባ ኦላንቻታ አዛዚዛ አቢኔሬ፤ «አቢኔሬ፤ ሃይሲ ናዚ ኦና ና?» ጌ ኦይቺዳስ። አቢኔሬ፤ «ካዎ፤ ኔ አሾ፤ ታ ኤሪኬ» ጌ ዛሪዳስ።

56 ካዎዚ፤ «ሃ ናቱላ ናዚ ኦና ናኮ ካሌታ ጋካ» ጌዴስ።

57 ዳዊቲ ፊሊስጶሜ አዳዛ ዋጺ ሲሚዲ ማላ አቢኔሪ ኢዛ ኤኪዲ ካዋዛ ሲንሳ ሺሺዳስ። ሄ ዋዴ ዳዊቲ ጎልያዴ ሁኤዛ ባ ኩሼን ኦይኪ ኡቲዳስ።

58 ሳኦሊ ኢዛ፤ «ሃይሶ ኔ ኦና ና?» ጌ ኦይቺዳስ። ዳዊቲ፤ «ታኒ ኔ አይሌ ቤቴሊሄሜ ዴሬ አሰ ኢሴዬ ና» ጌዴስ።

18

1 ዳዊቲ ሳኦሌራ ሃሳዬ ገጊዳ ማላ ዮናታኔይ ዳዊቲስ ሸዎፖ ላጌ ጊዲዳስ፤ ባና ማላ ኢዛ ሲቂዳስ።

2 ሄ ጋላሳፊ ዶሚዲ ሳኦሊ ዳዊቲ ባናራ ዋፊዳስ፤ ኢዚ ባ አዋ ሶ ቦንታ ማላ ዲጊዳስ።

3 ዮናታኔይ ኢዛ ዋዚናፔ ሲቂዳ ገሻሰ ዳዊቲራ ጫቂቲዳስ።

4 ዮናታኔይ ባ ማይኢዳ ካባ ኬሲዲ ባ ኦላ ማይኦራ፤ ባ ጊላ ማሻ፤ ባ ዋንዳፊዛኔ ባ ዳንጮዛ ዳዊቲስ አሚዳስ።

5 ሳኦሊ ኢዛ ከቲዛሶ አዋካ ጊዲን ዳዊቲ ባ ከቲቲዳይሳ ቤሲዛ ማላ ፖሊዛ ገሻሰ ባ ኦላንቻታ ቦላ ኢዛ ሹሚዳስ፤ ሄሲ ኡባ ዴራኔ ሳኦሌ ኦላ ሹሜታ ኡፋይሲዳስ።

ዳዊቱ ቦላ ሳኦሌ ሚቃይኔቴስ

6 ዳዊቱ ፊሊስጶሜ ኣዳዛ ዋዲዳፔ ጉዬ ኣሳይ ባሶ ባሶ ሲሚሺን ማጫሳቲ ካራቤኔ ማሲንቆ ኤኪዲ ዩዲሼ፥ ጉፒሼኔ ኢሊሊሼ ካዎ ሳኦሌ ሞካናሰ ኢሰራኤሌ ካታማታፔ ኬዚዳ።

7 ማጫሳቲ፡

«ሳኦሊ ሺ ዋዲዳስ!

ዳዊቱ ጊዲኮ

ታሙ ሺ ዋዲዳስ»

ጊዲ ሶሬን ዩዲዳ።

8 ሄሲ ኢዛ ኡፋይሶንታ ኣጊዳ ጊሻሰ ሳኦሊ ኬሂ ሃንቄቲዳስ፤ ኢዚካ፡ «ኢሰቲ ዳዊቱስ ታሙ ሺ፥ ታሰ ኢሲ ሺ ጸላ ጊዳ! ሂሰቲን ኢዛሰ ካዎቴፋፌ ኣቲን ሃራይ ኣዜ ኣቲዳይ!» ጊዳስ።

9 ሳኦሊ ሄ ጋላሳፌ ደሚዲ ዳዊቱ ኢታ ኣይፌን ጸሎ ኦይኪዳስ።

10 ዎንቴፋ ጋላሰ ጸሳፌ ኣዛዜቲዳ ኢታ ኣያናይ ሳኦሊ ቦላ ዋዲዳስ፤ ሄ ዎዴ ዳዊቱ ካሴ ኢዚ ኡባ ዎዴ ኦፊዛይሳ ማላ ባጋና ሾጪሺን ሳኦሊ ባሶን ኡቲዲ ጎሻ ማላ ሃሳይሼ ቶራ ኦይኪ ዳስ።

11 ኢዚካ፡ «ዳዊቱ ጎዳራ ጋፋ ኦይሴፋና» ጊ ቆፒዲ ቶራዛ ኢዛ ቦላ ጸንጊዳስ፤ ዳዊቱ ጊዲኮ ናምኡቶ ኢዛ ሲንፋፌ ሼርኢ ጊዳስ።

12 ጎዳይ ኢዛፔ ሻኬቲዲ ዳዊቱራ ጊዲዳ ጊሻሰ ሳኦሊ ዳዊቱስ ባቢዳስ።

13 ሄሳ ጊሻሰ ዳዊቱ ባ ኣቻፌ ሃሲዲ ሻላቃቴፋን ሹሚዳስ። ዳዊቲካ ኦላ ኣሳ ካሌፊዲ ኢሰታ ሲንፋን ኬዜሲኔ ጌሊስ።

14 ጎዳይ ኢዛራ ዲዛ ጊሻሰ ኢዚ ኦፊዛ ሚሺ ኡባይ ሃኔስ።

15 ሳኦሊካ ዳዊቱስ ኡባ ሚሺ ሃኒዛይሳ ቤኢዳፔ ጉዬ ኢዛሰ ባቢዳስ።

16 ኩሜፋ ኢሰራኤሌይኔ ዩሁዳይ ጊዲኮ ዳዊቱ ዶሲዳ፤ ኢሰታ ሲንፋን ኬዚዳ፥ ጌሊዲ ካሌፊዳይ ኢዛ።

ዳዊቱራ ሳኦሊ ቦሎቴስ

17 ሳኦሊ ዳዊቱ፡ «ኔኒ ኦላ ሚና ኦሌቲኮ ታ ና ባይራዮ ሜርቦ ታ ኔሰ ማቾ ኢማና» ጊዳስ፤ ሳኦሊ ባ ዎዚናን፡ «ፊሊስጶሜ ኣሳይ ባ ኩሺ ኢዛ ቦላ ዎፉ ኣቲን ታኒ ኢዛ ቦቺኬ» ጊ ዎፊዳስ።

18 ዳዊቱ ጊዲኮ ሳኦሊስ፡ «ካዎ ቦሎ ጊዳናሰ ታ ኦኔ? ታሶ ኣሳይ ጊዲን ታ ኣዎ ኬፊ ኢሰራኤሌ ኣሳ ኣቻን ኣዜ?» ጊዳስ።

19 ጊደ አቲን ሳኦሌ ና ሜሮባ ዳዊቱ ጌላና ዋዴይ ጋኪሺን ማሆላቱ ዴሬ ኣስ ኣዲርኤሌስ ኢሜታዲስ።

20 ሄ ዋዴ ሳኦሌ ና ሚልኮላ ዳዊቱ ደሳዲስ፤ ሳኦሊካ ሄሳ ሲዪዲ ኡፋዬቲዴስ።

21 ሳኦሊ ባ ዋዚናራ፥ «ኢዛስ ዋጺማዴ ጊዳና ማላ፥ ኢዚ ፊሊስጶሜታ ኩሺን ኣጁ ኢሜቲዲ ጳያና ማላ ታ ኢዞ ኢዛስ ኢማና» ጊ ቆፒዴስ። ሄሳ ገሻስ ሳኦሊ ዳዊቱ፥ «ሄኮ ኔኒ ታናራ ቦሎታናስ ቃሴካ ቃዳ ዴማዳሳ» ጊዴስ።

22 ሄሳፌ ጉዬ ሳኦሊ ባ ሹሜታስ፥ «ዳዊቱስ፥ ሂኮ ካዋዚ ኔናን ኡፋዬቲዴስ፤ ኢዛ ሹሜቲካ ኔና ደሴቲስ፤ ሄሳ ገሻስ ኔ ኢዛስ ቦሎ ጊዳ» ጊዲ ኢዛስ ጸሪቱ» ጊ ኣዛዚዴስ።

23 ኢስቲ ሄሳካ ዳዊቱስ ዛሪ ዛሪ ዮቲዳ፤ ዳዊቲ ጊዲኮ፥ «ካዋራ ቦሎቲል ኢንቲ ላፋ ሚሻ ማላ ቆዲዴቲ? ታኒ ኬሃ ማንቆኔ ኣሳ ማታን ዳሮ ኤሬቶንታ ኣሳ» ጊዴስ።

24 ሳኦሌ ሹሜቲ ዳዊቲ ጊዳይሳ ኢዛስ ዮቲን፥

25 ሳኦሊ፥ «ዳዊቱ፥ ሂዋዛ ናዪ ገሻስ ኔፔ ጨሎሻ ኮይዛይ ባ ሞርኬታ ቦላ ሃሎ ኬሳናስ ፊሊስጶሜ ኣሳፔ ጸቱ ኣሳ ኣቱማቴል ቃንጸ ኤሃዳ ኢማናይሳፌ ኣቲን ሃራ ኮዬና» ጊዲ ዮቲቱ» ጊዴስ። ሳኦሊ ሄሳ ቆፒዳይ ዳዊቲ ቢዲ ፊሊስጶሜታ ኩሺን ኩንዳና ማላ ኮይዛ ገሻሳ።

26 ካዋዛ ሹሜቲ ሄሳ ዳዊቱስ ዮቲን ካዋራ ቦሎቲል ኢዛ ኡፋይሲዴስ። ሄሳ ገሻስ ባሪዳ ባሬይ ኣጵንታ ዲሺን፥

27 ዳዊቲኔ ኢዛራ ዲዛ ኣሳቲ ቢዲ ፊሊስጶሜ ኣሳፔ ናሞኡ ጴት ዋጲዳ፤ ካዋዛስ ቦሎ ጊዳናስ ቃንጸ ኤሃዳ ኣቱማቴላ ኢስታ ቆዳ ማላ ካዋዛስ ኢሚዴስ፤ ሄሳፌ ጉዬ ሳኦሊ ባ ና ሚልኮሎ ዳዊቱስ ኢሚዴስ።

28 ሳኦሊ ጎዳይ ዳዊቲራ ዲዛይሳኔ ኢዛ ና ሚልኮላ ዳዊቲ ሲቂዳይሳ ኤሬዲ፥

29 ሳኦሊ ካሴፔ ኣል ባቢዴስ፤ ሃይቃናሽ ጋካናስ ኢዛስ ሞርኬ ጊዲዴስ።

30 ፊሊስጶሜ ኦላ ጋዳዋቲ ካሴ ኬዚዛ ማላ ኦላስ ኬዜቲስ፤ ዳዊቲ ኣቲዳ ሳኦሌ ኦላ ጋዳዋታፔ ቦላራ ጸኖ ዴሚዴስ፤ ሄሳ ገሻስ ኢዛ ሱንል ኬሂ ኤሬቲዴስ።

19

ዳዊቲ ጎዴቲል

1 ሳኦሊ ዳዊቱ ዋዳና ማላ ባ ና ዮናታኔሲኔ ባ ሹሜታስ ዮቲዳስ፤ ዮናታኔይ ጊዲኮ ዳዊቱ ከሂ ሲቄስ፤

2 «ታ አዋ ሳኦሊ ኔና ዋዳናስ ኦጌ ኮሻን ዳስ፤ ኔ ዋንቶ ማላዶ ቆቴታ አታናሶ ባ፤ ሄንካ ታካሻ።

3 ታኒካ ከዛዳ ኔኒ ዲዛ ጋዴን ታ አዋ አቻን ኤቃና፤ ኔ ጊሻስ ታ ኢዛራ ሃሳያና፤ ኢዛ ቆፋ ኤራዳ ኔስ ዮታና» ጊዳስ።

4 ዮናታኔይ ባ አዋ ሳኦሊ፡ «ካዎይ ባ ኦሳንቻ ዳዊቱ ቦላ ኢታ ሚሽ ኦላፎ፤ ኢዚ ኔና ቆሂቤና፤ ኢዚ ኦላዳይሲ ኔና ዳሮ ጎኢዛ ሚሻ።

5 ዳዊቱ ፊሊስጶሜ አዳዛ ባ ሸምፖ ባይዚዲ ዋዳዳስ፤ ጎዳይ ኩሜላ ኢስራኤሌስ ጊታ ጸዮ ኢሚዳስ፤ ኔካ ሄሳ ቤአዳ ኡፋዬታዳሳ። ሂስቲን ኔ ኢዛ ጮ ሃዳ ዋዳናስ ዳዊቱ ማላ ጊሻ አሳ ቦላ አይስ ቆሆ ኦላይ?» ጊዲ ዳዊቱ ጊሻስ ሎኤቴላ ዮቲዳስ።

6 ሳኦሊ ዮናታኔይ ጊዛይሳ ኤዘጊ ሲዪዳፔ ጉዬ፡ «ዴኦ ጎዳይ ቤአን፤ ዳዊቱ አሳ ኩሼን ሃይቄና» ጊ ጫቂዳስ።

7 ሄሳ ጊሻስ ዮናታኔይ ዳዊቱ ጴይጊዲ ሃሳዬቲዳ ዮኦታ ኡባ ኢዛስ ዮቲዳስ፤ ኢዛ ሳኦሊኮ ኤሂዳስ፤ ዳዊቱ ካሴይሳላ ኢዛ ሲንሳን ኤቂዳስ።

8 ቃሴካ ሃራ ኦላይ ዳንዲዳስ፤ ዳዊቱ ፊሊስጶሜ አሳ ኦሊዳስ፤ ኢስቲ ኢዛ ሲንሳፌ ባቃታናሼ ጋካናስ ከሂ ሾጪዳስ።

9 ጊዶ አቲን ሳኦሊ ቶራ ኦይኪዲ ባሶን ዲሺን ጎዳፔ ኢታ አያናይ ኢዛ ቦላ ዋዳዳስ፤ ሄ ዋዴ ዳዊቱ ባ ዲላ ዲዳስ፤

10 ሳኦሊ ኢዛ ጎዳራ ጋላ ኦይሴላና ጊዲ ባ ቶራ ኢዛ ቦላ ጸንጊዳስ፤ ጊዶ አቲን ዳዊቱ ሼርኢ ጊን ሳኦሊ ጸንጊዳ ቶራይ ጎዳን ኤቂዳስ፤ ሄ ጋላሳ ኦማርስ ዳዊቱ ኢዛፔ ኬሲ ኤኪ አቲዳስ።

11 ሳኦሊ ዳዊቱ ኬላ ዩዩ አዲዲ ኢዛ ዋዳና አሳታ ከቲዳስ፤ ዳዊቱ ማቻ ሚልኮላ ጊዲኮ፡ «ኔኒ ኔ ሸምፖ አሻናስ ባቃቶንታ አጊኮ ዋንቶ ሃይቃሳ» ጋዳ ሚንላ ዮታዱስ።

12 ሚልኮላ ዳዊቱ ማሰኮቴራ ኬሳ ዩዳዱስ፤ ኢዚካ ኬሲ ኤኪ አቲዳስ።

13 ሄሳፌ ጉዬ ሚልኮላ ኤቃ ሚሰሌ ኤካዳ ኢዛ ሂጸ ቦላ ኢሺሳዱስ፤ ሀኤሶራ ዳይሻ ኢሰኬ ቦርኮላ ዋላዱስ፤ ማይኦራካ ካማዱስ።

14 ሳኦሊ ዳዊቱ ኦይካና አሳታ ከቲ ዩዲን ሚልኮላ፡ «ኢዚ ሳኬቴስ» ጋዱስ።

15 ሳኦሊ አሳቲ ዳዊቱ ቢዲ ቤኣና ማላ ዛሪ ዩዲዴስ፤ ሳኦሊ፥ «ታ ኢዛ ዎቆና ማላ ሂጸራ ኢዛ ታስ ሃ ኤሂቴ» ጊዴስ።

16 ከቲቲዳ አሳይ ኢዛኮ ቢ ጌሊሺን ኤቃ ሚሰሌይ ኢዛ ሂጸ ቦላ ኢቺን ሁኤሶራ ዴይሻ ኢስኬ ቦርኮሊ ዴስ።

17 ሳኦሊ ሚሊኮሎ፥ «ኔ ሂስታ ባሌሳዳ ታ ሞርኬይ ታፔ ኬሲ ኤካና ማላ አዛስ ኦሳዲ?» ጊ ኦይቺዴስ።

ሚልኮላካ፥ « ታ ኬሳ ኤካ አታና ማላ ታና ማዳ፤ አካይ ጊኮ ታ ኔና ዎቆና ጊዴስ» ጋ ዛራዲስ።

18 ዳዊቱ ባቃቲ አቲዳፔ ጉዬ ጌዴ ኤራማን ዲዛ ሳሜላኮ ቢዴስ፤ ሳኦሊ ኢዛ ቦላ ኦሊዳይሳ ኡባ ኢዛስ ዮቲዴስ። ሄሳፌ ጉዬ ኢዚኔ ሳሜሊ ኔዋቲን ኡቲዳ።

19 ሳኦሊስካ፥ «ሄኮ ዳዊቱ ኤራማን ዲዛ ኔዋቲን ዴስ» ጊዲ ኢዛስ ዮቲዳ።

20 ሄሳ ጊሻስ ኢዚ ዳዊቱ ኦይካናስ አሳታ ከቲ ዩዲዴስ። ጊዶ አቲን ናቤቲ ሸቂዲ ሳሜሊ ካሌሊሺን ቲንቢቲ ሃሳይዛይሳ ቤኢዲ ጸሳ አያናይ ሳኦሌ አሳ ቦላ ዎቆን ኢስቲካ ቲንቢቲ ዮቲዳ።

21 ሳኦሊካ ሄሲ ኢዛስ ዮቲቲዳ ማላ ሃራ አሳታ ከቲ ዩዲዴስ፤ ኢስቲካ ቲንቢቲ ዮቲዳ። ሳኦሊ ሄቫንሶካ ሃራ አስ ከቲ ዩዲዴስ፤ ኢስቲካ ዛሪዲ ቲንቢቲ ዮቲዳ።

22 ወርሴላን ኢዚ ባ ሁኤራ ኤራማ ቢዴስ፤ ሄፔካ ሴኩን ዲዛ ጊታ ሃሳ ኤሊሲዛ ኦላኮ ጋኪዳ ማላ፥ «ሳሜሊኔ ዳዊቱ አዋን ዲዞ?» ጊ ኦይቺዴስ።

ኢሲ አሲ ኢዛስ፥ «ኤራማን ዲዛ ኔዋቲን ዴቲስ» ጊ ዮቲዴስ።

23 ሄሳ ጊሻስ ሳኦሊ ኤራማን ዲዛ ኔዋቲ ቢዴስ፤ ጸሳ አያናይ ኢዛ ቦላካ ዎቆዴስ። ኢዚ ቢዲ ኔዋቲ ጋካናሼ ቲንቢቲ ዮቲሼ ቢዴስ።

24 ኢዚካ ባ ማይኦ ኬሲ ዩጊዲ ሳሜላ ሲንሳን ቲንቢቲ ዮቲዴስ። ሄሳሶ ኢዚ ኩሜላ ጋላሲኔ ኩሜላ ኦማርስ ካሎ ኢቺዴስ። ዴሪይ ኢዛ፥ «ሳኦሊ ናቤታፔ ኢሳ ማላ ቆዴቲዴ?» ጊዳይ ሄሳ ጊሻሳ።

20

ዳዊቱኔ ዮናታኔ

1 ሄሳፌ ጉዬ ዳዊቱ ኤራማን ዲዛ ኔዋቲ ዙሌፌ ዮናታኔኮ ባቃቲ ቢዲ፥ «ታ አይ ኦሳዲና? ታ አይ ቆሆ ኦሳዲና? ኔ አዋይ

ታና ዋጃና ስኮይዛይ ታ ኢዛ ሲንላን አይ ኢታ ኦሊኔ?» ጊዲ ኢዛ ኦይቺዴስ።

² ዮናታኔይካ፡ «ሄሲ ኔ ቦላ ሙሌካ ሃናፖ! ኔ ሃይቃካ! ታ አዋይ ጉል ጊዲን ዳር ጊዲን አይ ሚሺካ ሲንላቲ ታስ ዮቶንታ ኦሊ ኤሪና፤ ሂስቲን ታ አዋይ ሃይሳ ታፔ አይስ ቆቲዜ? ዮኦይ ሄሳ ማላ ጊዴና!» ጊ ዛሪዴስ።

³ ዳዊቲካ ኢዛስ፡ «ታኒ ኔ ሲንላን ቦንቺቲዳይሳ ኔ አዋይ ሎኤሊ ኤሪስ፡ ሄሳ ጊሻስ ኢዚ ባ ዋዚናራ፡ «ዮናታኔይ ሚሹቶንታ ማላ ሃይሳ ኤሪናስ ቤሴና» ጊዴስ። ጊዶ አቲን ታኒ ዴኦ ጎዳይ ቤዪን! ታ ኔ ሽምፖን ጫቃይስ! ታስ ሃይቃናስ ኢሲ ታንጎይ ጸላ አቲዴስ» ጊ ዛሪዴስ።

⁴ ዮናታኔይካ፡ «ታ ኔስ ኦላና ማላ ኔ ኮይዛ አይ ሚሺካ ታ ኔስ ኦላና» ጊዴስ።

⁵ ሂስቲን ዳዊቲ፡ «ዋንቶ አገና ጸር ባኦሌ ጊዲዳ ጊሻስ ታኒ ዋንቶ ካዋራ ኢሲፌ ማናስ ቤሴስ። ጊዶ አቲን ዋንቶ ፔይን ኦማርስ ጋካናስ ታኒ ዋራ ጊዶን ቆቲታሻና።

⁶ ኔ አዋይ ታና ኮይኮ፡ ሒዛ ዳቦቲ ላይላን ላይላን ሺሺዛ ያርሾ ሺሺዛ ጋላስ ጊዲዳ ጊሻስ ዳዊቲ ባ ሶ አሳኮ ቤቴሊሄመ ባናስ ፒቃዴ ታና ሚንሊ ኦይቺዴስ» ጋዳ ዮታ።

⁷ ኢዚካ፡ ሒሮ ሎኦ ጊኮ ታና ኔ ኦሳንቻ ሂርጊሲዛ ሚሺ ዴና፤ ኢዚ ሃንቄቲዛ ጊዲኮ ኢዚ ታ ቦላ ኢታ ቆፒዳይሳ ኔ ኤሪና።

⁸ ኔኒ ጊዲኮ ታስ ኔ አሽካራስ ኪያቴል ቤሳ፤ ታና ኔ አሽካራራ ኔኒ ጎዳ ሲንላን ጫቄቲዳ ጊሻስ ታ ዋሪዳ ጊዲኮ ታና ኔኒ ዋጃ አቲን አይስ ኔ አዋስ ታና አላ አማይ?» ጊዴስ።

⁹ ዮናታኔይካ ዛሪዲ፡ «ሃይሲ ኔፔ ሃኮ! ታ አዋይ ኔ ቦላ ኢታ ቆፒዳይሳ ኤሪዳኮ ታ ኔስ ዋና ዮቲኪና?» ጊዴስ።

¹⁰ ዳዊቲካ ኢዛ፡ «ኔ አዋይ ታ ጊሻስ ኔስ ኢታ ቃላ ዛሪኮ ሄሳ ታስ ኦኒ ዮታኔ?» ጊ ኦይቺዴስ።

¹¹ ዮናታኔይካ ኢዛስ፡ «ኦኔ ሃያ! ዴምባ ኬኦስ!» ጊዴስ፤ ናምኦይካ ኦይኬቲዲ ካሬ ኬዚዳ።

¹² ሄሳፌ ጉዬ ዮናታኔይ ዳዊቲስ፡ «ጎዳ ኢስራኤሌ ጸሳይ ታ ቦላ ማርካ ጊዶ፤ ዋንቶ ታኒ ታ አዋ ፒልጋ ኦይቻዳ ዋንቶ ዋይኮ ዋንቶፔይና ሃኒ ዋዴ ታ ኔስ ኪታና፤ ኢዚ ኔ ጊሻስ ሎኦ ቆፒዛ ጊዲኮ ታ ሄሳ ኔና ኤሪሳና።

13 ጊደ አቲን ታ አዋይ ኔ ቦላ ኢታ ቆፒን፥ ሄሳ ታ ኔና ኤሪሶንታ ኣጊኮኔ ኔ ሳሮን ኢዛ ኩሼፔ ኬሳ ኤካ ባና ማላ ታ ኦሶንታ ኣጊኮ፥ ታ አዋይ ኔ ቦላ ጋላናሰ ቆፒዳ ኢታ ዮኦዛፔ ኣጲዳ ኢታ ጎዳይ ታ ቦላ ጋላ፤ ካሴ ጎዳይ ታ አዋራ ዲዛይሳል ኔናራካ ዶ።

14 ኔኒካ ታኒ ሼዎፖራ ፓጾ ዲዛ ዎዴ ኣሳ ኩሼን ሃይቆንታ ማላ ኔ ታሰ ጎዳ ኪያቴላ ኦላ።

15 ጎዳይ ዳዊቴ ዋርኬታ ቢታ ቦላፌ ፒቲ ጳይሲዛ ዎዴካ ኔ ሎኦ ኦሶይ ታሶ ኣሳሰ ሙሌካ ፓፎፎ» ጊዴሰ።

16 ሄሳ ጊሻሰ ዮናታኔይ፥ «ዳዊቴ ዋርኬታ ቦላ ጎዳይ ፒርዶ!» ጊዲ ዳዊቴ ሶ ኣሳራ ጫቂቲዴሰ።

17 ዮናታኔይ ዳዊቴ ባ ሼዎፖ ማላ ሲቂዛ ጊሻሰ፥ ሲቆፔ ዴንዲዳይሳን ዳዊቴ ዛሬሊ ጫቂሲዴሰ።

18 ሄሳፌ ቃሴ ዮናታኔይ ዳዊቴ፥ «ዎንቶይ ኣጊና ጸሮን ቦንቹቲዛ ባኣሌ ጋላሳ፤ ኔ ኡቲዛሶን ኣሲ ጳይኮ ኔ ባይንዳይሲ ኤሬታና።

19 ዎንቶፔይና ኦማርሳ ዎዴ ሃይሲ ሜቶይ ሜጴቲዳ ጋላሰ ካሴ ቆቴቲዳሶ ባዳ ኤዜሌ ሹቻ ኣቻን ታካሻ።

20 ታኒ ቃሴ ኢሲ ሚሻ ቦላ ማሊ ጸሊዲ ጸንጊዛ ኣሳ ማላ ሄቩ ዪሽ ሹቻ ኣቻን ዱካና።

21 ሄሳፌ ጉዬ ታኒ፥ «ዪሻታ ኤካ ያ፥ ጋዳ ኢሲ ና ኪታና፥ ናዛካ፥ «ዪሻቲ ኔፔ ሃ ባጋራ ዴቲሰ፤ ባዳ ሃ ኤካ ያ፥ ታ ጊኮ ዴኦ ጎዳይ ቤዪን! ኔና ኢታ ሚሽ ዴሜና፤ ሜቶይካ ዴና፤ ኬዛዳ ሃያ።

22 ጊደ አቲን ታኒ ናዛሰ፥ «ሄኮ ዪሻቲ ኔፔ ሄኒ ባጋራ ዴቲሰ!» ጊኮ፥ ኔ ባና ማላ ጎዳይ ኮዪዳ ጊሻሰ ኔ ቢዛሶ ባ።

23 ኮኒ ኢሶይ ኢሳራ ሃሳዬቲዳ ዮኦዛ ጊሻሰ ጎዳይ ኦ ጊደን ሜርናሰ ማርካ» ጊዴሰ።

24 ሄሳ ጊሻሰ ዳዊቴ ዎራ ጊደን ቆቴቲዴሰ። ኣጊና ጸሮን ጸሮን ቦንቹቲዛ ባኣሌ ጋላሰ ካዎ ሳኦሊ ጊቢራ ማናሰ ኡቲዴሰ።

25 ካዎዚ ካሴ ባ ኡቲዛሶን ጎዳ ኣቻን ኡቲዴሰ፤ ኣቢኔሪ ኢዛፔ ካሊዲ ኡቲዴሰ፤ ዮናታኔይካ ካዎዛፔ ሲንሳ ባጋራ ኡቲዴሰ፤ ዳዊቴ ኡቲዛሶይ ጊዲኮ ማላ ዴሰ።

26 ሳኦሊ፥ «ዳዊቴ ዎጋይ ጊዛይሳል ኢዚ ዪዲ ጌዮንታ ማላ ኢሲ ሜቶን ጋይቶንታ ኣጊቤና፤ ቱማፔ ኢዚ ጌዪቤና» ጊዲ ቆፒዳ ጊሻሰ ሄ ጋላሰ ኣይኮካ ቃቲቤና።

27 አገና ጾሮ ባኣሌይ ኣጂን ዋንቴላ ጋላሲካ ዳዊቲ ኡቲዛሶይ ሜላ ዴሰ፤ ሂሰቲን ሳኦሊ ባ ናዛ ዮናታኔ፥ «ኢሴዬ ናይ ቃማካ ሃቸካ ሃይሳ ጊቢራን ኣይሰ ቤቶንታ ኣጊዴ?» ጊዲ ኦይቺዴሰ።

28 ዮናታኔይካ ኢዛሰ፥ «ዳዊቲ ቤቴሊሄሜ ባናሰ ታና ሚንሉ ዋሲዴሰ።

29 ኢዚካ፥ «ኦ ሶ ኣሳይ ካታማ ጊዶን ያርሾ ያርሺዛ ጊሻሲኔ ታ ኢሻይ ታኒ ሄን ቤታና ማላ ታና ኣዛዚዳ ጊሻሰ ታ ባና፤ ኔ ታሰ ሚሼቲኮ ታ ኢሻታ ቤያናሰ ባና ማላ ታና ዬዳርኪ!» ጊ ዋሲዴሰ፤ ኢዚ ሄሳ ጊሻሰ ካዎ ጊቢራዛሶን ቤቶንታ ኣጊዴሰ» ጊ ዛሪዴሰ።

30 ሳኦሊ ዮናታኔ ኬሂ ሃንቄቲዲ፥ «ሃይሶ ጌላኔ ማካላንቻ ማጫሳይ ናዛ! ኔሰ ኔ ሁኡሰ ካዉሻቴላ ቃሴ ኔ ኣዬይሰካ ዬላቴላ ጊዲዳ ኢሴዬ ናዛሪ ኔ ላጌቲዛይሳ ታ ኤሪሰና!

31 ኢሴዬ ናይ ሼምፖፖ ፓጻ ዲዛ ዋዴን ኣይዴካ ኔኒኔ ኔ ካዎቴላይ ሚኔኬታ። ኢዚ ሃይቃና ቤሲዛ ጊሻሰ ኣሰ ዬዳዳ ታሰ ሃ ኤካ ያ!» ጊዴሰ።

32 ዮናታኔይ፥ «ኢዚ ኣዛሰ ሃይቂዜ? ኣይ ሞሮ ኦሊዴ?» ጊዲ ባ ኣዎ ሳኦሊ ኦይቺዴሰ።

33 ሳኦሊካ ዮናታኔ ዋጳናሰ ባ ቶራ ኢዛ ቦላ ጸንጊን ዮናታኔይ ኢዛ ኣዋይ ዳዊቲ ዋጳናሰ ባ ዎዚናን ቃቺ ዴንዲዳይሳ ኤሪዴሰ።

34 ዮናታኔይካ ኬሂ ሃንቄቲዲ ካላ ሚዛ ማዳፌ ዴንዲዴሰ፤ ኢዛ ኣዋይ ዳዊቲ ካዉሺዳ ጊሻሰ አገና ጾሮ ባኣሌ ቦንቺዳ ዋንቴላ ጋላሰ ኣይኮ ካሊካ ሚሴና።

35 ዋንቴላ ጋላሰ ማላዶራ ኢሲ ቄሪ ና ካሌሊ ኤኪዲ ካሴ ዳዊቲራ ባሬቲዳሶ ቢዴሰ።

36 ናዛካ፥ «ኔ ዋጻ ባዳ ታ ዬዲዛ ዪሻታ ኢሰቲ ዋጲዳሶፔ ኮያ» ጊዴሰ፤ ናዚካ ቡሮ ዋላን ዲሺን ዮናታኔይ ኢሲ ዪሻ ናዛፔ ቦላራ ሲንላ ኣሊ ዬዲዴሰ።

37 ናዚካ ዮናታኔይ ዬዲዳ ዪሻዚ ዋጲዳሶ ጋኪሺን ዮናታኔይ ዴይጊዲ፥ «ዪሻዚ ኔፔ ኣጂ ቢዴሰ ዴኔ?» ጊዴሰ።

38 ኢዚካ፥ «ኤሌላ! ዋጻ! ኤቆፋ!» ጊ ዋሲ ዮቲዴሰ፤ ናዚካ ዪሻታ ሺሺዲ ባ ጎዳኮ ሲሚዴሰ።

39 ሄሳ ሄ ጹራ ዮኦዛ ኤሪዛይ ዮናታኔፔኔ ዳዊቲፔ ኣቲን ናዚ ኣይኮካ ኤሪሴና።

40 ሂሳፌ ጉዬ ዮናታኔይካ ኦላ ሚሻ ሄ ናዛሰ ኢሚዲ፥ «ኔኒ ሃይሳ ኤካዳ ጌዴ ካታማ ሲማ ባ» ጊዴሰ።

41 ናዚካ ቢዳፔ ጉዬ ዳዊቲ ሹቻፌ ዱጌሃ ባጋራ ቆቴቲ ዲዛሶፔ ኬዚዲ ዮናታኔ ሲንላን ሄ፹ቶ ዱጌ ቢታ ቦላ ጉፋኒ ዚጊደስ። ሄሳፌ ጉዬ ኢሶይ ኢሳራ ዩሬቲዳ፤ ናምኣይካ ዩኪዳ፤ ዳዊቲ ኬሂ ዩኪደስ።

42 ሄሳፌ ጉዬ ዮናታኔይ ዳዊቲስ፡ « ሳሲኔ ታስ፡ ኔ ዜሬላሲኔ ታ ዜሬላሲ ጊደን ጎዳይ ሜርናስ ማርካ፡ ጊዲ ኑ ላጌቲሊ ሚናና ማላ ኑኒ ጸሳ ሱንላን ጫቄቲዳ ጊሻሰ ኔ ሃኢ ሳሮን ባ» ጊደስ። ሄሳፌ ጉዬ ዳዊቲ ዴንዲ ቢደስ፤ ዮናታኔይካ ካታማ ሲሚ ቢደስ።

21

ሳኦሌፔ ዳዊቲ ባቃታ

1 ዳዊቲ ቄሴ አሂሜሌኬይ ዲዛሶ ናቤ ቢደስ፤ አሂሜሌኬይካ ኮሮሪሽ ዳዊቲራ ጋይታናስ ዩዲ፡ «ኔና ኔርካ ኤሂዳይ ኣዜ? ኣሲ ባይንዳ ኣይስ ኔርካ ያዲ?» ጊዲ ኦይቺደስ።

2 ዳዊቲ ቄሴ አሂሜሌኬስ፡ «ካዎዚ፡ ቀኒ ዩዳይ ሚሻ ጊሻሲኔ ታኒ ኢሚዳ ኣዛዞ ጊሻሰ ኦኒካ ኣይኮካ ኤርፖ፡ ጊ ኣዛዚደስ። ታና ካሊዛይታራ ታኒ ኣዎን ጋይታናስ ኢስታስ ዮታ ዎላዲስ።

3 ሂስቲን ሃኢ ኔ ኩሼን ኣዚ ዲዜ? ኢቻሹ ኡኬላ ዎይኮ ዲዛ ኣይ ሚሺ ዲኮካ ታስ ኢማ?» ጊደስ።

4 ቄሴዚካ፡ «ጮ ኣሲ ሚዛ ካሊ ታኮን ዳና፤ ኔና ካሊዛይቲ ማታ ዎዴ ማጫሳታራ ጋይቶንታ ባንታና ጌሻቲላን ናጊዲ ጋምኢዳ ጊዲኮ ሃይሳን ጸሳስ ዲማቲ ኡቲዳ ኡኬሊ ደስ» ጊደስ።

5 ዳዊቲካ ቄሴዛስ ዛሪዲ፡ «ካሴ ሎሴ ጊዲዳ ማላ ታኒ ኬዚዳ ዎዴፔ ዶሚን ኦኒ ማጫሳፌ ናጌቲደስ፤ ጮ ቄሪ ኦሶስ ቢሼካ ታናራ ዲዛይቲ ባንታና ጌሻቲላን ናጌቲስ። ሂስቲን ሃቶ ዎኒዲ ኣጴኔ!» ጊደስ።

6 ሄሳ ጊሻሰ ቄሴዚ ጎዳስ ዲማቲዳ ኡኬላ ዴንሊዲ ዳዊቲስ ኢሚደስ፤ ጎዳ ሲንላፌ ዴንዲዲ ሆኑ ካላን ላሚቲዳ ኡኬላፌ ኣቲን ሃራ ካሊ ሄን ዳና።

7 ሄ ጋላስ ሳኦሌ ኦሳንቻታፔ ሚሄ ሄሚዛይታ ኣላፌዚ ኤዶሚ ኣስ ደይቄይ ሄን ጎዳ ሲንላን ታካና ማላ ዎሊዳ።

8 ዳዊቲ አሂሜሌኬ፡ «ካዎዛ ጉዳይ ታና ኤሶሲዳ ጊሻሰ ታ ጊላ ማሻ ጊዲን ዎይኮ ሃራ ኦላ ሚሽ ኤካ ያቤኬ፤ ሃይሳን ኔ ኣቻን ቶራይ ዎይኮ ጊላ ማሻይ ዴኔ?» ጊዲ ኦይቺደስ።

9 ቄሴ አሂሜሌኬይ ኢዛሰ፡ «ኔኒ ኤላ ሾባን ዎጂዳ ፊሊስጶሜ አሰ ጎልያዴ ማሻይ ሃን ዴስ፤ ኢዚካ ኤፋዴፔ ጉዬ ባጋራ ጫርቃን ጸጾቲ ኡቲዴሰ፤ ኔ ኢዛ ኮይኮ ኤካ፤ ኢዛፔ አቲን ሃራይ ኦላ ሚሺ ሃን ዴና» ጊ ዛሪዴሰ።

ዳዊቲካ፡ «ኢዛ ማላይ ሃራይ ዶንታ ጊሻሰ ኔኒ ኢዛ ታሰ ሃማ!» ጊዴሰ።

10 ሄ ጋላሰ ዳዊቲ ሳኦሌፔ ባቃቲዲ ጌቲ ዴሬ ካዎ አንኩሴኮ ቢዴሰ፤

11 አንኩሴ ኦሳንቻቲ፡ «ሃይሲ ሄ ቢታይ ካዎ ዳዊቲ ጊዴኔ? « ሳኦሊ ሺ ዎጂዴሰ፤

ዳዊቲ ጊዲኮ

ታሙ ሺ ዎጂዴሰ»

ጊ ማጉሊሺ አሳይ ሳቢዳይሲ

ሃይሲ ኢዛ ጊዴኔ?» ጊዴ።

12 ዳዊቲ ዮኦዛ ባ ዎዚናን ኦይኪዲ ጌቲ ካዎ አንኩሴሰ ኬሂ ባቢዴሰ።

13 ሄሳ ጊሻሰ ኢሰታ ሲንፋን ዎዚናይ ባቄቲዳ አሳ ማላ ጊዲዴሰ፤ ኢሰቲ ኢዛ ኦይኪዳ ማላ ካታማይ ፔንጌ ኢቢል ቃጩሬሊሺ ቡቻ ቦላራ ባ ሳሶ ጎጊሲሺ ጎሻ አሳ ማላ ጊዲዴሰ።

14 አንኩሴይ ባ ኦሳንቻታ፡ «ሃይሳ አዴዛ አኔ ጴሊቲ፤ ኢዚ ጎሻኮ! ሂሰቲን አይሰ ታኮ ኤሂዴቲ?»

15 ኢዚ ታ አቻን ጎያና ማላ ኢንቲ ታኮ ሃይሳ ኤሂዳይ ታሰ ሃይሳ ማላ ጎሺ ጳይኔ? ሃይሳ ማላ አሲ ታ ኬል ጌላናሰ ቤሲዜ?» ጊዴሰ።

22

1 ዳዊቲ ጌቲፔ አዲላሜ ጎንጎሎን ቢዴሰ፤ ኢዛ ኢሻቲኔ ኢዛ አዎ ሶ አሳይ ሄሳ ሲዪዲ ዱጌ ኢዚ ዲዛሶ ዎጂዳ።

2 ሜቶቲዳይቲ፡ አጮራ ዲዛይቲኔ ዲሳይ አቲዳይቲ 400 ጊዳና አሳቲ ኢዛኮ ሸቂዳ፤ ኢዚካ ኢሰታ ካሌሊዛይሳ ጊዲዴሰ።

3 ዳዊቲ ሄፔ ዴንዲዲ ሞኦቤ ዴሬን ዲዛ ሚጸጸ ቢዴሰ፤ ሞኦቤ ካዎሰ፡ «ጸሲ ታሰ ኦፋናይሳ ታ ኤራና ጋካናሰ ታ አዋይኔ ታ አያ ሃ ዪዲ ኔ አቻን ዳና ማላ ፒቃዴ አማርኪ!» ጊዴሰ።

4 ኢዚካ ኢሰታ ሞኦቤ ካዎ አቻን ዎሊዴሰ፤ ዳዊቲ ሚጸን ዲዛ ላይፋታ ኩሜል ኢሰቲ ሄን ጋሞኢዳ።

5 ጊዶ አቴን ናቤ ጋዴይ ዳዊቱ፥ «ሚጸን ጋሞኦፋ፤ የሁዳ ቢታ ጌላ» ጊዴሰ። ሄሳ ጊሻሰ ዳዊቱ ዴንዲ ቢዲ ሄሬቱ ዎራን ጌሊዴሰ።

ኖቤ ቄሴታ ሃይቆ

6 ሳኦሊ ዳዊቱኔ ኢዛራ ዲዛ አሳይ ቤተዳይሳ ሲዪዲ ጊቢኦ ዙሞቡላ ቦላ ዲዛ ታማርሲኬ ጌቱቲዛ ሚላ ጋርሳን ባ ቶራ ኩሼን ኦይኪ ኡቲ ዲሺን ኢዛ ሹሜቲ ኡባይ ኢዛ ዩዪ ኦፂ ኤቂዳ።

7 ሳኦሊ ኢሰታሰ፥ «ኢንቴኖ ቢኒያሜ አሳቶ ሲዪቲ! ኢሴዬ ናይ ጎሻ ጋዴኔ ዎይኔ ቶኪዛሶሆ ኢንቴሰ ቱሙ ኢማኔ? ኢዚ ኢንቴና ኡባታካ ሻላቃታኔ ማቶ ሃላቃታ ሂሰቲ ሹማኔ?

8 ኢንቴ ታ ቦላ ዲላቲዳይ ሃይሳሴ? ታ ናዚ ኢሴዬ ናዛራ ጫቂቲዳይሳ ኦኒካ ታሰ ዮቲቤና፤ ኢዚ ሃች ኦሊዛይሳ ኡባ፥ ታ ናዚ ታ ኦሳንቻዛ ታ ቦላ ዴንፌሊዳይሳ ኢንቴፌ ኦኒካ ታሰ ሚሹቲዲ ዮቲቤና» ጊዴሰ።

9 ሄ ዎዴ ሄን ዲዛ ሳኦሊ ሹሜታራ ኤቂ ዲዛ ኤዶሜ አሰ ዶይቂይ፥ «ኢሴዬ ናይ ኖቤን ዲዛ አሂጹቤ ና አሂሜሌኬኮ ዩሺን ቤኦዲሰ።

10 አሂሜሌኬይ ኢዛ ጊሻሰ ጎዳ ኦይቺዴሰ፤ ሂሰቲዲ ሺንቄኔ ፊሊሰጾሜ አሰ ጎልያዴ ጌላ ማሻ ኢዛሰ ኢሚዴሰ» ጊ ዮቲዴሰ።

11 ሄሳፌ ጉዬ ካዎዚ ቄሴ አሂጹቤ ና ቄሴ አሂሜሌኬ፥ ኖቤን ዲዛ ቄሴታ ባ አዋ ኬላ አሳ ኡባሰ ኪታ ዩዲ ጴይጊን ኡባይካ ካዎዛኮ ዪዳ።

12 ሳኦሊ፥ «ሃይሶ አሂጹቤ ናዉ! ሲያ» ጊዴሰ።

አሂሜሌኬይካ፥ «ኤሮ፥ ታ ጎዳዉ» ጊዴሰ።

13 ሳኦሊካ፥ «ሃች ኢዚ ታ ቦላ ኦሊዛ ኡባሶ፥ ታ ቦላ ማካሊዛይሳኦኔ ታ ጌዶን ኤቂዛይሳ ካሊኔ ማሻ ኢሚዲ ኢዛሰ ጸሰ ዎሲዲ ኢሴዬ ናራ ታ ቦላ አይሰ ዲላቲዴቲ?» ጊዴሰ።

14 አሂሜሌኬይ ካዎዛሰ፥ «ካዎዛ ቦሎይ፥ ኔ ቦንቾ ዛቤታ አዛዚዛይሲኔ ኔሶ አሳ አቻን ኬሂ ቦንቹቲዳ ዳዊቱ ሚሳቲዛ አማኔቲዳ ኦሳንቻይ ኔ ኦሳንቻታ ጋርሳን ዲዛይ ኦኔ?

15 ታ ኢዛሰ ጸሰ ኦይቺሺን ሄ ጋላሳይ ኮይሮ ጋላሴ? ሙሊካ ጊዴና፤ ሃይሳ ሃ ዮኦዛ ኔ ኦሳንቻይ ታ ኤሪዛ አይኮ ሚሺ ባይንዳ

ገሻሰ ካዎይ ታና ባ ኦሳንቻዛ ዎይኮ ታ አዋ ሶ አሳፔ ኦናካ ሞራንቻ ኬሶፎ» ገዴሰ።

16 ካዎዚ ዛሪዲ ኢዛሰ፡ «አሂሜሌኬ! ኔኒኔ ኔ አዋ ሶ አሳይ ኡባይ ሃይቃንዳታ!» ገዴሰ።

17 ሄሳፌ ጉዬ ካዎዚ ባ አቻን ኤቂዳ ዛቤታ፡ «ሃይቲካ ጎዳ ቄሴቲ ዳዊቴራ ኢሲኖ ገዲዲ ኢዚ ባቃቲዳይሳ ታሰ ዮቶንታ ኣገዳ ገሻሰ ኢሰታ ገደላ ዎዲቲ» ገዴሰ። ካዎ ሹሜቲ ገዲኮ ባ ኩሼ ጎዳ ቄሴታ ቦላ ዴንሲዲ ሾጫናሰ ኮዪቤቲና።

18 ካዎዚ ዶይቄ፡ «ሂሰቲኮ ኔኒ ቄሴታ ገደላዳ ዎዳ» ገዴሰ። ኢዛዚዴሰ፤ ኤዶሜ አሰ ዶይቄይ ኢሰታ ገደላ ዎዲዴሰ፤ ኢዚ ሄ ጋላሰ ኤፋዴ ማይኢዳ 85 ቄሴታ ዎዲዴሰ።

19 ቄሴታ ኖቤ ካታማን ማሻን ወርሲዴሰ፤ ሄን ዲዛ ማጫሳታኔ አቱማታ፡ ናይታኔ ቡሮ ጳሚዛይታ፡ ሄሳላካ ቦራታኔ ሃሬታ፡ ዶርሳታ ኡባ ገላ ማሻን ሲፊዴሰ።

20 ገደ አቲን አሂጹቤ ና አሂሜሌኬ ናይ አቢያታሬይ ኬሲ ኤኪዲ ዳዊቴኮ ባቃቲዴሰ።

21 ኢዚካ ሳኦሊ ጎዳ ቄሴታ ዎዲዳይሳ ዳዊቴሰ ዮቲዴሰ።

22 ዳዊቲ አቢያታሬሰ ዛሪዲ፡ «ሄ ዎዴ ኤዶሜ አሰ ዶይቄይ ሄን ዲዛ ገሻሰ ኢዚ ሳኦሌሰ ዮታናይሳ ታ ኤራዲሰ፤ ወሪዳ ኢንቲሶ አሳ ኡባ ገሻሰ ታ ኦይሼታና።

23 ኔ ሃኢ ታናራ ዳሻ፤ ባቦፋ፤ ኔ ሼምፖ ዎዳና ኮይዛዴይ ታ ሼምፖ ዎዳና ኮይዛዴ ማላ፤ ኔኒ ታናራ ኢሲፌ ሳሮን ዴኣንዳሳ» ገዴሰ።

23

ዳዊቲ ቂኢላ አሺዳ አሾ

1 ሄሳፌ ጉዬ፡ «ፊሊሰጾሜ አሳይ ቂኢላን ኦላ ዴንሲዲ ቡኬቲዛ ካላ ባለፔ ቦንቂሼ ዴቲሰ» ገዲ ዳዊቴሰ ዮቲዳ።

2 ዳዊቲ፡ «ሃይሳ ፊሊሰጾሜ አሳ ኦሎ?» ገዲ ጎዳ ኦይቺዴሰ። ጎዳይካ፡ «ባ፤ ፊሊሰጾሜታ ሾጫ፤ ቂኢላካ አሻ» ገዴሰ።

3 ዳዊቲ አሳይ ገዲኮ፡ «ሃይሳን ዩሁዳ ቢታን ዲሼ ባቦሰ፤ ፊሊሰጾሜ ኦላንቻታ ኦላናሰ ቂኢላ ቢዛ ገዲኮ አይ ማላ ኦና ባቢሳኔ?» ገዴ።

4 ዳዊቲ ቃሴካ ጎዳ ዛሪ ኦይቺዴሰ፤ ጎዳይካ ኢዛሰ፡ «ታኒ ፊሊሰጾሜ አሳ ኔ ኩሼን አላ ኢማና፤ ሄሳ ገሻሰ ኔ ዱጌ ቂኢላ ዎዳ» ገዴሰ።

5 ሄሳ ጊሻስ ዳዊቲኔ ኢዛ ካሊዛይቲ ቂኢላ ቢዲ ፊሊስጾሜ አሳ ኦሊዳ፤ ኢስታ ሜሄካ ዲኢዳ፤ ፊሊስጾሜታ ቦላ ጊታ ቆሆ ጋሊዳ፤ ዳዊቲ ቂኢላ ዴራ አሺዴስ።

6 አሂሜሌኬ ና አቢያታሬይ ዳዊቲኮ ቂኢላ ባቃቲሼ ባ ኩሼን ኤፋዴ ኦይኪ ቢዴስ።

7 ዳዊቲ ቂኢላ ቢዳይሳ ሳኦሊ ሲዪዲ፡ «ዳዊቲ ሳንቃኔ ቢራታ ኮላታቲ ዲዛ ካታማ ጌሊዳይሲ ኢዚ ባርካ ባና ቃቺዳ ማላ ጊዲዳ ጊሻስ ኢዛ ጸሲ ታ ኩሼን አሉ አሚዴስ» ጊዴስ።

8 ሄሳ ጊሻስ ሳኦሊ ባ ኦላንቻታ ጾይጊዲ ዱጌ ቂኢላ ዎዲዲ ዳዊቲኔ ኢዛ ኦላ አሳ ጊዳላና ማላ አዛዚዴስ።

9 ዳዊቲካ ሳኦሊ ኢዛ ቦላ ኢታ ቆፒዳይሳ ኤሪዲ ቄሴ አቢያታሬ፡ «ኤፋዴዛ ሃማ» ጊዴስ።

10 ሄሳፌ ጉዬ ዳዊቲ፡ «ጎዳ ኢስራኤሌ ጸሳዉ! ሳኦሊ ቂኢላ ዪዲ ታ ጋሶን ካታማዮ ጳይሳናስ ቆፒዳይሳ ኔ አይሌይ ታ ሎኤላ ሲያዲስ።

11 ሂስቲን ቂኢላ አሳይ ታና ሳኦሌስ አሉ አማኔ? ታኒ ኔ አይሌይ ሲዪዳይሳ ማላ ሳኦሊ ሃ ዱጌ ዎዳኔ? ጎዳ ኢስራኤሌ ጸሳዉ! ታስ ኔ አይሌዛስ ኔ ዮታና ማላ ታ ኔና ዎሳይስ» ጊዴስ። ጎዳይካ፡ «ኤ ኢዚ ዱጌ ዎዳና» ጊዴስ።

12 ዳዊቲ ቃሴካ፡ «ቂኢላ አሳይ ታናኔ ታ አሳ ሳኦሌስ አሉ አማኔ?» ጊ ኦይቺዴስ። ጎዳይካ፡ «ኤ ኢስቲ ኢንቴና አሉ አማና» ጊዴስ።

13 ሄሳ ጊሻስ ዳዊቲኔ 600 ጊዲዛ አሳቲ ቂኢላፔ ዴንዲዲ ባናስ ዳንዳይዛ ኡባሶ ቢዳ፤ ዳዊቲ ቂኢላፔ ባቃቶይሳ ሳኦሊ ሲዪዲ ሄ ቡሳ አጋጊዴስ።

ዳዊቲ ባዞ ቢታን ዙምቡላታ ቦላ ዴኢዳ ዴኦ

14 ዳዊቲ ባዞን ዲዛ ሚጸታኒኔ ዚፌ ባዞን ዙምቡላታ ቦላ ዴኢዴስ፤ ሳኦሊ ኢዛ ኡባ ጋላስ ካሌቴስ፤ ጊዶ አቲን ጸሲ ዳዊቲ ኢዛስ አሉ አሚቤና።

15 ዳዊቲካ ዚፌ ባዞን ሆሬሼ ጌቴቲዛሶን ዲሼ ሳኦሊ ኢዛ ዎዳናስ ዪዳይሳ ቤኢዴስ።

16 ሳኦሌ ና ዮናታኔይ ዳዊቲ ዲዛሶ ቢዲ ጸሳ ሱንላን ኢዛ ሚንሌሉዴስ።

17 ኢዚካ፡ «ባቦፋ! ታ አዋ ሳኦሊ ባ ኩሼ ኔ ቦላ ዎሌና፤ ኔኒ ኢስራኤሌ ቦላ ካዎታና፤ ኔፔ ካላዳ ታ ናምኣንሶ ካዎ ጊዳና፤ ታ አዋ ሳኦሊካ ሄሳ ኤሬስ» ጊዴስ።

18 ናሞአይካ ጎዳ ሲንፋን ጫቄተዳ፤ ሄሳፌ ጉዬ ዮናታኔይ ባሶ ሲሚ ቢደሰ፤ ዳዊቱ ጊዲኮ ሄን ሆሬሼን ኡቲደሰ።

19 ዚፌ አሳይ ሳኦሌኮ ገቢኦ ኬዚዲ፡ «ሄኮ ዳዊቱ ዬሴሞኔፔ ዲጌሃ ባጋራ ሃካሊያ ዙሞቡላ ቦላ ዲዛ ሆሬሼ ሚጸታን ቆቴቲ ደሰ ገዴኔ?»

20 እቤት ካዎ ሃኢ ጊዲኮ ኔና ኡፋይሲዳ ጋላሰ ያ ኣቲን ካዎዛሰ ኑ ኢዛ ኣሊ ኢማና ዶሰ» ገዳ።

21 ሳኦሊ ኢሰታሰ፡ «ኢንቴ ታሰ ሚሼቲዳ ገሻሰ ጎዳይ ኢንቴና ኣንጆ!

22 ሃኢ ሲሚ ቢዲ ኢዚ ኣዎን ዲዛኮ ኤሪቴ፤ ሄን ኢዛ ቤኢዳ ኣሰ ሻኪ ኤሪቴ፤ ኢዚ ኬሂ ጨንጫ ኣሰ ጊዲዳይሳ ታ ሲያዲሰ።

23 ኢዚ ቆቴቲዛሶሆታ ኡባ ቤኢዳፔ ጉዬ ቆንጩራ ቤሲዛ ሃኖታ ኤኪ ታኮ ዪቴ፤ ታኒካ ኢንቴናራ ባና፤ ኢዚ ዴሰ ዶ ኣቲን ዩሁዳ ቆሞታ ገደን ኢዚ ጌሊዳ ኦላፌ ታ ጌላ ኬሳና» ገዴሰ።

24 ሄሳ ገሻሰ ኣሳቲ ሳኦሌፔ ሲንፋቲ ዴንዲዲ ዚፌ ቢዳ፤ ሄ ዎዴ ዳዊቲኔ ኢዛራ ዲዛ ኣሳቲ ዬሴሞኔፔ ዲጌሃ ባጋራ ኣራቤን ዲዛ ማኦኔ ባዞን ዴቲሰ።

25 ሳኦሊኔ ኢዛ ኣሳቲ ዳዊቲ ኮያና ቢዳ፤ ዳዊቲካ ሄሳ ሲዬዲ ዲጌ ዛላኮ ዎጂዲ ማኦኔ ባዞን ኡቲደሰ። ሳኦሊ ሄሳ ሲዬዲ ማላ ዳዊቲ ጎዲሼ ማኦኔ ባዞ ቢ ጌሊደሰ።

26 ሳኦሊ ዙማሰ ኢሲ ባጋራ ጊዲ ጎዲሺን ዳዊቲኔ ኢዛራ ዲዛ ኣሳቲ ዙማሰ ሃንኮ ባጋራ ሳኦሌፔ ኣታናሰ ዎጾቲሰ። ሳኦሊኔ ሳኦሌ ኦላንቻቲ ዳዊቲኔ ኢዛራ ዲዛ ኣሳታ ኦይካናሰ ኡንኤሊዳሺን፡

27 ኢሲ ኣሲ ቃሰታኔ ሳኦሌኮ ዪዲ፡ «ፊሊሰጾሜቲ ዴራ ቦላ ዎራጂዳ ገሻሰ ኤሶን ጋካ» ገዴሰ።

28 ሂሰቲን ሳኦሊ ዳዊቲ ጎዲዛይሳ ኣገዲ ፊሊሰጾሜታራ ኦሌታናሰ ቢደሰ፤ ሄሳ ገሻሰ ሄ ሶሆዛ፡ «ሻኬቴላ ዛላ» ገ ሰንሰዲ።

29 ዳዊቲ ሃፔ ፑዴ ኬዚዲ ኤን-ጋዴ ሚጸታን ኡቲደሰ።

24

ሳኦሊሰ ዳዊቲ ቃጂቴሰ

1 ሳኦሊ ፊሊሰጾሜታ ኦሊ ሲሚዳፔ ጉዬ፡ «ቤኦ ዳዊቲ ኤን-ጋዴ ባዞን ደሰ» ገዲ ኢዛሰ ዮቲዳ።

2 ሄሳ ጊሻስ ሳኦሊ ኩሜላ ኢስራኤል፤ ደሬቲዳ 3,000 እስከ ኤኪዲ ዳዊቲኔ ኢዛራ ዲዛ አሳታ ኮያናስ፤ «ዎራ ዳይሻታ ዛላ» ጌቲቲዛሶ ማታ ቢደስ።

3 ሳኦሊ ኦጌ ዶናን ዶርሳቲ አቁዛሶ ጋኪዳ ዎዴ ሄን ጎንጎሎ ዴሚዲ ሼሽ ኡታና ጌሊዴስ፤ ዳዊቲኔ ኢዛ ካሊዛይቲ ጎንጎሎዛስ ጊዶን ቆቲቲ ኡቲዳ።

4 ዳዊቲ ካሊዛይቲ ዳዊቲስ፤ «ጎዳይ፤ ሩኔ ዶሲዳይሳ ኦላና ማላ ኔ ሞርኬዛ ታ ኔ ኩሼን አላ አማና» ጊዲ ካሴ ኔስ ዮቲዳ ጋላሳያ ሃቻ» ጊዳ። ዳዊቲ ቲራን ጎሼቲ ቢዲ ሳኦሌ ማይኦ ጼራፔ ኦኒካ ኤሮንታ ቃንጺ ኤኪዴስ።

5 ጊዶ አቲን ዳዊቲ ሳኦሌ ማይኦ ጼራ ቃንጺዳይሳን ኢዛ ዎዚናይ ኬሂ ጨጨደስ።

6 አሳታስካ፤ «ጎዳይ ቲይዳ ታ ጎዳ ቦላ ሄሳ ማላ ኦሶ ኦላናፔኔ ኢዚ ቲይዳይሳ ቦላ ታ ኩሼ ዴንላናፔ ጎዳይ ታና ናን» ጊዴስ።

7 ዳዊቲ አሳ ሃ ቃላን ሴሪዴስ፤ ሳኦሌ ቦላካ ኢስቲ ሜቶ ጋላናይሳ ኮዬቤና፤ ሳኦሊካ ጎንጎሎዛ ጊዶፌ ኬዚ ቢዴስ።

8 ሄሳፌ ጉዬ ዳዊቲ ጎንጎሎዛ ጊዶፌ ኬዚዲ ሳኦሌ፤ «ታ ጎዳ ካዎ!» ጊ ዴይጊዴስ፤ ሳኦሊካ ጉዬ ሲሚ ጴሊሺን ዳዊቲ ባ ኩሼ ዴንሊዲ ዘጊሺን ቤኢዴስ፤

9 ዳዊቲ ሳኦሌስ፤ «አሳይ፤ ሳኦሌ ዳዊቲ ኔ ቦላ ኢታ ኦላና ኮዬስ» ጊሺን ኔ ኣይስ ኢስታ ሲያይ?

10 ሃቻ ጎንጎሎ ጊዶን ኔና ታ ኩሼን ዎስቲ አሊ አሚዳኮ ሄኮ ኔኔ ኔ ኣይፌራ ቤኣዳሳ፤ ኢሲ ኢሲ አሳቲ ታ ኔና ዎቆና ማላ ዴንሊዲዳ፤ ጊዶ አቲን ታኒ፤ ሳዳይ ቲይዳ ታ ጎዳ ቦላ ታ ኩሼ ዎሊኬ» ጋዳ ታ ኔስ ቃጴታዲስ።

11 ታ አዋወ ኔ ማይኦዛ ጼራፔ ቃንጸቲዳይሳ ሃይሳ ታ ኩሼን ቤኣ! ኔስ ማይኦ ጼራፔ ቃንጸ ኤካዲስ አቲን ኔና ዎቆቤኬ። ሃኢካ ታኒ ኢታቲላ ዎይኮ ማካላቲላ ኦላንታይሳ ኔ ኤራ፤ ሄሳ ኔ ዎዚናን ዎላ፤ ታ ኔ ቦላ ኢታ ኦላቤኬ፤ ኔኒ ጊዲኮ ታ ሼምፖ ቆይሳናስ ጎዳሳ።

12 «ጎዳይ ኔ ጊዶኒኔ ታ ጊዶን ፒርዶ። ኔኒ ኢታ ኦሊዳ ጊሻስ ጎዳይ ኔ ቦላ ሃሎ ኬሶ አቲን ታ ኔ ቦላ ኩሼ ዎሊኬ።

13 ካሴ ዎዴ ቶሴን፤ ሳኦሌ ካሊዛይታፔ ኢታይ ኬዬስ» ጌቲቲዛ ማላ ሃኢ ታ ኩሼይ ኔና ቦቹና።

14 «ኢስራኤል ካዎይ እና ቦላ ከኢዴ? ኔኒ እና ጎዳይ? ሃይቂዳ ካና ዎይኮ ካሰቶሌ ጎዳይ?

15 ሃኢካ ኑ ጊዶን ጎዳይ ዳና ጊዱ ፒርዶ። ታ ዮኦዛ ጾሊዱ ታ ጊሻሰ ኢዚ ሞቱቶ። ታናካ ኔ ኩሼፔ ኬሲ ኤኪዱ ታ ቱማቴላ ኢዚ ቆንጨሶ» ጊዴሰ።

16 ዳዊቲ ሄሳ ሃሳይዱ ወርሲዳ ማላ ሳኦሊ፥ «ታ ና ዳዊቲ! አዳፌ ሃይሲ ኔ ቃላ?» ጊዱ ዬኪሼ ኦይቺዴሰ።

17 ካሌሊዱ ሳኦሊ ዳዊቲሰ፥ «ታ ኔ ቦላ ኢታ ኦሊሺን ኔ ታሰ ሎኦ ኦሊዳ ጊሻሰ ኔ ታፔ ጸሎ።

18 ኔ ታሰ ኦሊዳ ሎኦ ሚሺ ሄኮ ታሰ ዮታዳሳ፤ ጎዳይ ታና ኔ ኩሼን አሊ ኢሚዴሰ ሺን ኔ ታና ዎቆቤካ።

19 ባ ሞርኬ ዴሚዱ ኢዛ ቦላ ቆሆ ጋሶንታ ዲሼ ዬዲዛይ ኦኔ? ኔኒ ሃቶ ታሰ ኦሊዳ ኪያቴላ ኩሼ ጎዳይ ኔሰ ዛር።

20 ቤያ ቱማፔ ኔኒ ካዎታናይሳኔ ኢስራኤል ካዎቴሊ ኔ ኩሼን ሚናናይሳ ታ ኤራይሰ።

21 ኔኒ ታ ዜሬላታ ቆይሶንታ ማላኔ ታ ሱንሐ ታ አዋ ከላፌ ቆይሶንታ ማላ ጎዳ ሱንላን ጫቃ» ጊዴሰ።

22 ዳዊቲካ ሳኦሌሰ ጫቂዴሰ። ሄሳፌ ጉዬ ሳኦሊ ባ ሶ ሲሚ ቢዴሰ፤ ዳዊቲኔ ኢዛ ካሊዛይቲ ካሴ ባ ቆቴቲዛ ሚጸን ሲሚ ከኢዳ።

25

ዳዊቲ፥ ናባሌኔ አብጊያ

1 ሳሚሊ ሃይቂዴሰ፤ ኩሜላ ኢስራኤል አሳይ ኢሲ ቦላ ሺቂዱ ኢዛሰ ዬኪዴሰ፤ ሄሳፌ ጉዬ ኤራማን ዲዛ ኢዛሶ ኤፊዱ ኢዛ ሄን ሞጊዳ።

ሄሳፌ ጉዬ ዳዊቲ ዱጌ ማኦኔ ባዞ ቢዴሰ።

2 ማኦኔ ቢታን ቃርሜሎሴን አቆታራ ዲዛ ኢሲ ዱሬ አሲ ዴሰ፤ ኢዛሰ 1,000 ዴይሻቲኔ ኢሰኬይ ቃንጾቲዛ 3,000 ዶርሳቲ ዴቲሰ።

3 አዴዛ ሱንሊ ናባሌ፥ ማቺይ ሱንሊ አቢጋሎ ጌቲቲሰ። ኢዛ አኬካንቻኔ ኬሃ ማላ ሎኦ ማጫሳ፤ ኢዚ አዚናዚ ጊዲኮ ቦዛኔ ኢታ ኦሊዛ አሳ። ኢዚ ካሌቤ ባጋ አሳ።

4 ዳዊቲ ባዞን ዲሼ ናባሌይ ባ ዶርሳታ ኢሰኬ ቃንጸዛይሳ ሲዱዴሰ።

5 ኢዚካ ታሙ ናቴላ ናይታ፡ «ናባሌኮ ፑዴ ቃርሜሎሴ ከዚቲ፤ ታ ሳሮካ ኢዛሰ ጋሊቲ።

6 ኢዛሰ፡ «ሼምፖ ጋምኦ! ሳሮይ ኔሰ ጊዶ፤ ሳሮይ ኔሶ ኣሳሲኔ ኔሰ ጊዲዳ ኡባሰ ጊዶ።

7 ሃኢ ኔኒ ዶርሳታ ኢሰኬ ቃንጺዛይሳ ታኒ ሲያዲሰ። ኔ ሜሄዛ ሄሚዛይቲ ካሴ ኑናራ ዲዛ ዎዴ ኡባን ኑ ኢሰታ ቦላ ኣይኮ ኢታካ ጋሊቤኮ። ኢሰቲ ቃርሜሎሴን ዲዛ ዎዴ ኡባን ኢሰታፌ ቆይዳ ኢሲ ሚሽካ ዳና።

8 ሄሳ ኔኒ ኔ ኦሳንቻታ ኦይቻ፤ ኢሰቲ ኔሰ ዮታና። ሃቕ ኑኒ ሎኦ ጋላሰ ዪዳ ገሻሰ ሃ ናቴላ ናይቲ ኔ ሲንላን ቦንቹቲቶ። ሾቤ ኔና ኔ ኣይሌታሲኔ ኔ ና ዳዊቲሰ ኔሰ ዳንዳዬቲዛ ማላ ኑሰ ኢማ፡ ገቲ» ጊዴሰ።

9 ዳዊቲ ከቲዳ ኣሳቲ ሄ ጋኪዳ ማላ ዳዊቲ ከታ ናባሌሰ ዮቲዳፔ ጉዬ ዛር ናሳ ዶሚዳ።

10 ናባሌይ ዳዊቲ ኦሳንቻታሰ፡ «ዳዊቲ ኢዚ ኦኔ? ኢሴዬ ናይ ኢዚ ኦኔ? ሃይሳ ሃ ዎዴዛን ባንታ ጎዳታፔ ባቃቲ ቢዛ ኦሳንቻቲ ዳር።

11 ሂሰቲን ታኒ ታ ካሊኔ ታ ሃሐ፡ ታ ዶርሳታ ኢሰኬ ቃንጺዛይታሰ ታ ሹኪዳ ኣሾ ኢሰቲ ኣዋፔ ዪዳኮ ኤፊቶንታ ኣሳሰ ታኒ ኣዛሰ ኢሞ?» ጊዴሰ።

12 ዳዊቲ ከቲዳ ኣሳቲ ጉዬ ሲሚ ቢዲ ጋኪዳ ማላ ናባሌይ ኢሰታሰ ጊዳይሳ ኡባ ዳዊቲሰ ዮቲዳ።

13 ዳዊቲካ ኣሳታሰ፡ «ኣኔ ኡባቲካ ኢንቲ ገላ ማሻ ጊጺቲ» ጊዴሰ። ሄሳ ገሻሰ ኡባይካ ባ ማሻ ማሻ ጊጺዳ፤ ዳዊቲካ ባ ማሻ ጊጺዴሰ። 400 ጊዳና ኣሲ ዳዊቲራ ከኢሺን 200 ጊዳና ኣሲ ኢሰታ ሚሻ ናጋናሰ ጉዬ ኣቲዴሰ።

14 ናባሌ ኣይሌታፔ ኢሶይ ኢዛ ማቕ ኣቢጋሊሰ፡ «ቤኣ፡ ዳዊቲ ባ ዲዛ ባዘፌ ኑ ጎዳኮ ኣሰ ሳሮካራ ጋሊ ዬዲዴሰ። ጊዶ ኣቲን ኢዚ ኢሰታ ጫሽ ካልሲዴሰ።

15 ሃ ኣሳቲ ከሄ ሎኦ ኣሳ፤ ኑ ቦላ ኣይ ቆሆካ ጋሊቤቲና። ባዘን ኑ ኢሰታራ ዲዛ ዎዴ ኑሰ ኣይኮይካ ቆይቤና።

16 ኑኒ ኑ ሜሄታ ሄሚሼ ኢሰታራ ዲዛ ዎዴ ኡባን ጋላሰ ጊዲን ኦማርሰ ኢሰቲ ኑሰ ዲርሳ ጊዲዳ።

17 ሃኢ ኑ ጎዳ ቦላኔ ኢዛሶ ኣሳ ቦላ ሜቶይ ኣላንጺሼ ዲዛ ገሻሰ ኔኒ ዩሻ ቆፓዳ ኦላናሰ ቤሲዛይሳ ኦላ። ኢዚ ጊዲኮ ሄሳ ማላ ቦዛ ኣሰ ጊዲዳ ገሻሰ ኢዛሰ ጸሊ ዮታና ኢሳዴይካ ዳና» ጊዴሰ።

18 አቢጋላ ጋሞኦነታ ዳሼ ኤሌላዳ 200 ሶሎ፣ 2 ሉካሞ ኩሚላ ወይኔ ኡሹ፣ 5 ዶርሳ አሾ ጸጸ፣ 17 ኪሎ ቲያ ጫጫ፣ 100 ዉርጮ ወይኔ አይፌኔ 200 ባላሴ ሚላ አይፌፔ ኡኬቲዳ ቄሪ ኡኬሐ ኢሲ ቦላ ሺሻ ኤካዳ ሃሪ ቦላ ጫናዱስ።

19 ሄሳፌ ጉዬ ባ አይሌታ፣ «አንቲ ታፔ ሲንሳቲ ቢቲ፤ ታኒካ አንቲ ጉዬራ ጋካና» ጋዱስ። ጊዶ አቲን ባ አዚና ናባሌስ አይኮካ ዮታቤኩ።

20 ኢዛ ባ ሃሪዛ ቶጋዳ ዱጌ ዙሌዛ ወዲሺን ዳዊቲኔ ኢዛ ካሊዛይቲ ኢዚኮ ዱጌ ወዲዳ፤ ኢዛካ ኢስታ ዳማዱስ።

21 ዳዊቲ፣ «ኢዛ ሚሻፌ ኢሲናካ ጳዮንታ ማላ ሃይሳ አዴዛ አቆታ ባዞ ቢታን ታ ናጊዳይ ጮ ሃዳ ጊዱዴስ። ታ ኢዛስ ሎኦ ኦሊዳይሳ ኩሼ ኢዚ ታስ ኢታ ዛሪዴስ።

22 ዋንቶ ማላዶ ኢዛ አሳፔ አሳዴካ ታ ሸምፖራ ፓጻ አጊኮ ጸሲ ታ ቦላ ሄሳ ማላ ኦሶ፤ ሄሳፌካ አዲዛ ኢታ ሚሽ ኦሶ» ጊዴስ።

23 አቢጋላ ዳዊቲ ዳሚዳ ማላ ሄራካ ሃሪዛ ቦላፌ ወዳዳ ዳዊቲ ሲንሳን ጉፋናዳ ኩሼ ዳንሳዱስ።

24 ኢዛ ሄን ዳዊቲ ቶሆ ቦላ ኩንዳዳ፣ «ታ ጎዶ! ኢዛ ሞሮይ ታ ቦላ ቆዴቶ፤ ሾቤ ታኒ ኔ አይሌይ ኔስ ዮታና ጊዛይሳ ሲያርኪ!

25 ታ ጎዶ! ሄሳ ቦዛ ናባሌ ፓጻ ሚሻን ቆዶፓ! አዴዛስ ሱንሳ ቢርሼሊ ኤያ ጉስ ጊዱዳ ጊሻስ ኢዚካ ባ ሱንሳ ማላ ኤያ! ኤያቴሊካ ኢዛራ ጋምኢዴስ። ታኒ ኔ አይሌያ ጊዱኮ ኔ ታ ጎዳይ ከቲዳ ናቴላታ ቤያቤኬ። *

26 «ታ ጎዶ! ዴኦ ጎዳይ ቤዪን! ኔ አሾ። ሱሐ ጉሳናፔኔ ኔርካ ኔ ሃሎ ኬሳናፔ ኔና ናጊዳይ ጎዳ። ሃኢካ ኔ ሞርኬቲኔ ታ ጎዳ ቆሃና ኮይዛይቲ ኡባይ ናባሌ ማላ ጊዴቶ።

27 ታ ኔ አይሌያ ታ ጎዳስ ኤሂዳ ሃ ኢሞታይ ኔና ካሊዛ ሃ ናቴላታስ ኢሜቶ።

28 ታ ጎዳይ ኦላ ኦሌቲዛ ጊሻስ ጎዳይ ታ ጎዳ ካዎቴላ ቱማፔ ኢዚ ሜርናስ ኢዛስ ሚንሳና። ሄሳ ጊሻስ ታና ኔ አይሌይ ቆሆ ታስ አቶ ጋ። ኔኒ ሸምፖራ ፓጻ ዱዛ ወዴ ኡባን ኢታቴሊ ኔፔ ቤቶፎ።

29 አይ አሲካ ኔ ሸምፖ ዳይሳናስ ጎዳኮካ ታ ጎዳ ሸምፖይ ዴኦን ዱዛይታ ኢሲፌቴላ ጊዶን ጎዳ ኔ ጸሳ ማታን ሳሮን ናጌታና።

* 25:25 ናባሌ ጉሲ ኢብራዊታ ቃላራ ኤያ ጉሳ።

ጊዳ ኣቲን ኔ ሞርኬታ ሸምፖ ሹቕ ያንባርሻን ጫዲዛ ማላ ጫዲና።

30 ጎዳይ ታ ጎዳሰ ኢሚዳ ሂዶታ ቃላ ማላ ሎኦ ሚሽ ኡባ ኦሊዳ ዋዴኔ ኢሰራኤል ቦላካ ኢዚ ኔና ካዋሊዳ ዋዴ።

31 ኔኒ ሃዳን ጉሲዳ ሱሊ ዋይኮ ኔ ኩሼን ኔኒ ሃሎ ኬሲዳዚ ዶንታ ገሻሰ ታ ጎዳይ ዋዚናን ጨጫና ሃኖይኔ ሞዴታና ሚሽ ዴና። ጎዳይ ኔሰ ሎኦ ኦሊዳ ዋዴ ታና ኔ ኣይሌዮ ባሎፓ» ጋዲሰ።

32 ዳዊቲካ ኣቢጋሊሰ። «ሃቕ ኔ ታናራ ጋይታና ማላ ኔና ታኮ ከቲዳ ጎዳ ኢሰራኤል ጸሳይ ጋላቲቶ።

33 ታኒ ኣሳ ሱሊ ጉሶንታ ማላኔ ታ ኩሼን ሃሎ ኬሶንታ ማላ ሃቕ ኔ ታና ናጊዳ ገሻሲኔ ኔ ሎኦ ቆፋ ገሻሰ ኔኒካ ኣንጃታ።

34 ታ ኔ ቦላ ሜቶ ጋሶንታ ማላ ታና ናጊዳ ዴኦ ጎዳ ኢሰራኤል ጸሳይ ቤዪን! ኔኒ ሃይሳሶ ኤሶን ታኮ ያዳ ታና ዴሞንታኮ ጋዴይ ዋንታናሰ ናባሌሰ ኢሲ ኣቱማ ናይካ ኣቲና» ጊዴሰ።

35 ሄሳፌ ጉዬ ኣብጋላ ዳዊቲሰ ኤሂዳ ኣሞታ ኢዚ ኩሼፔ ኤኪዲ። «ኔኒ ኔ ሶ ሳሮን ባ፤ ኔ ጊዳይሳ ታ ሲያዲሰ፤ ኔ ታና ኦይቺዳይሳ ታ ኦላና» ጊዴሰ።

36 ኣቢጋላ ጉዬ ሶ ሲማ ቢሺን ናባሌይ ካዋ ኬላን ገጊዛ ገቢራ ማላ ገቢራ ገብሲዳይሳ ቤያዲሰ። ኢዚካ ኬሂ ማሶቲዲ ኡፋይሳን ኩሚ ኡቲዴሰ። ሄሳ ገሻሰ ጋዴይ ዋንታናሼ ጋካናሰ ኢዛሰ ኣይኮካ ዮታቤኩ።

37 ዋንቲላ ጋላሰ ኡሻ ማሶይ ኢዛ ኣጊዳፔ ጉዬ ኢዛ ሃኖዛ ኡባ ኢዛሰ ዮቲን። ኢዛ ዋዚናይካ ኬሂ ዳጋሚዲ ጮኡ ጊዴሰ። ኢዛ ቦላይ ሹቻ ማላ ኣሃ ኬዚዴሰ።

38 ታሙ ጋላሳታፔ ጉዬ ጎዳይ ቦሻን ናባሌ ሸጪን ኢዚ ሃይቂዴሰ።

39 ዳዊቲካ ናባሌይ ሃይቂዳይሳ ሲዬዳ ዋዴ። «ናባሌይ ታና ጫዴዳ ገሻሰ ታሰ ሃሎ ኬሲዳይኔ ታና ባ ኣይሌዛ ኢታ ኦሶንታ ማላ ናጊዳ ጎዳይ ጋላቲቶ፤ ናባሌይ ኦሊዳ ኢታ ሚሽ ኢዛ ሁኤን ዛሪዴሰ» ጊዴሰ።

ሄሳፌ ጉዬ ዳዊቲ ኣቢጋላ ኢዛ ማቕ ጊዳና ማላ ኦይሻ ኣሰ ከቲዴሰ።

40 ኢዛ ኣይሌቲካ ቃርሜሎሴ ቢዲ ኣቢጋሊሰ። «ኔ ኢዛሰ ማቕ ጊዳና ማላ ኔና ኤካናሰ ዳዊቲ ኦና ኔኮ ከቲዴሰ» ጊዴሰ።

41 ኢዛካ ዴንዳ ኤቃዳ ሲንላ ጉላ ጉፋና ኩሼ ዴንላዳ። «ሄኮ ታኒ ኔ ጋራዴያ ኔሰ ሃጋዛናሲኔ ኔ ኣይሌታ ቶሆ ሜጫናሰ ገጋ ኡታዲሰ» ጋዲሰ።

42 አቢጋላ ሄራካ ሃሬ ቶጋዳ ባ ጋራዴ ኢቻሻታ ካሌፋ ኤካዳ ዳዊቱ አይሌታራ ባዳ ዳዊቱስ ማቾ ገዳዲስ።

43 ሄሳፋካ ዳዊቱ ኢዘራኤልን ዬሌቲዳ አሂናሆሞ ኤኪዴስ፤ ናሞአቲካ ኢዛ ማቾ ገዳዲ።

44 ሳኦሊ ገዲኮ ዳዊቱ ማቾ ባ ና ሚልኮሎ ጋሊሜ ዴሬን ዬሌቲዳ ላይሻ ና ፓሊጾስ አሚዴስ።

26

ዳዊቱ ናሞአንፋካ ሳኦሊ ቤሲዳ ቃጴታ

1 ዚፌ አሳይ ሳኦሊ ዲዛሶ ዪዲ፥ «ቤኢቱ ዳዊቱ ዬሴሞኔ ገናራ ዲዛ ሃካሊያ ዙሞቡላ ቦላ ቆቲቲዴስ» ገዲ ዮቲዳ።

2 ሄሳ ገሻስ ሳኦሊካ ዴንዲዲ ኢስራኤል አሳ ጋርሳፌ ዶሬቲዳ 3,000 ኦላ አሳታ ባናራ ኤኪዲ ዳዊቱ ኮሽ ዲጌ ዚፌ ባዘ ዋጂዴስ።

3 ሳኦሊ ዬሴሞኔ ገናራ ዲዛ ሃካሊያ ዙሞቡላ ቦላ ኦጌ ዶናን ዲንካኒ ኡቲዴስ፤ ዳዊቱ ገዲኮ ባዘን ዴስ። ዳዊቱ ሳኦሊ ሄ ጋካናስ ኢዛ ካሊ ዪዲይሳ ኤሪዲ።

4 ጸሞሲዛይታ ዬዲዲ ሳኦሊ ዩሳ ሻኪ ኤሪዴስ።

5 ዳዊቱ ዴንዲዲ ሳኦሊ ዲንካኒ ዲዛሶ ቢዴስ፤ ሳኦሊኔ ኢዛ ኦላ አሳ ሃላቃ፥ ኔሬ ና አቢኔሪ ዲዛሶ ቢ ቤኢዴስ። ሳኦሊ ባ ዲንካኒ ዲዛሶን አሳ ገደን ጂሰኮን ዲሺን ኢዛ ኦላ አሳይ ኢዛ ገደሏ ዋሏዴስ።

6 ዳዊቱ ሂቲ ዴሬ አስ አሂሜሌኬኔ ጽሪያ ና ኢዮአቤ አሻ አቢሳዬ፥ «ታናራ ዲጌ ሳኦሊ ዲዛሶ ዋጃናይ ኦኔ?» ገ ኦይቺዴስ። አቢሳዬይካ፥ «ታ ኔናራ ዋጃና» ገዴስ።

7 ሄሳ ገሻስ ዳዊቱኔ አቢሳዬይ ሳኦሊ ኦላ አሳይ ዲዛሶ ቢዳ፤ ኢስቲ ቢሺን ሳኦሊ ሄን ጂሰኮን ዴስ፤ ኢዛ ቶራይ ኢዛ ሁኤሶን ቢታን ኤቂ ዴስ፤ አቢኔሪኔ ኢዛ ኦላንቻቲ ኢዛ ዩሾን ጂሰኪዳ።

8 አቢሳዬይ ዳዊቱስ፥ «ጸሲ ሃቕ ኔ ሞርኬ ኔ ኩሼን ዬገዴስ፤ ሃኢ ታ ኢዛ ኢሲቶ ጫዳ ቢታራ ሲካይስ፤ ታ ናሞአንፋናስ አይኮካ ኮሺና» ገዴስ።

9 ዳዊቱ አቢሳዬ፥ «ዋጵፓ፤ ጎዳይ ቲይዳዴ ቦላ ባ ኩሼ ዴንሌዲ ሱፋፌ ጌሽ ገዲዳዳ አሲ ኦኔ?»

10 ዴኦ ጎዳይ ቤኢን፤ ጎዳይ ኢዛ ዋጃና፤ ዋይኮ ኢዛ ዋዴይ ዉሪን ኢዚ ሃይቃና፤ ዋይኮ ኢዚ ኦላን ሃይቃና።

11 ጎዳይ ቲይዳይሳ ቦላ ታኒ ታ ኩሼ ዋፋናፔ ጎዳይ ታና ናጎ! ጊዶ አቲን ኢዛ ሁኤሶን ዲዛ ቶራኔ ሃላራ ዲዛይሳ ሃ ኤካ ያ፥ እኔ ቦሰ» ጊዴሰ።

12 ሄሳ ጊሻሰ ዳዊቲ ሳኦሌ ሁኤሶን ዲዛ ቶራኔ ሃላ ኢዛን ዲዛ ሚሻ ኤኪዴሰ፤ ሄሳፌ ጉዬ ቢዳ፤ ሄሲ ሃኒሺን ቤኢዳይ፥ ኤሪዳይ ዋይኮ ዲሰኮፌ ቤጊዳይ ኦኒካ ዴና። ጎዳ አቻፌ ዋልቃማ ዲሰኮይ ኢሰታ ቦላ ዋዲዳ ጊሻሰ ኡባይካ ዲሰኪዳ።

13 ሄሳፌ ጉዬ ዳዊቲ ሄ ፒንሊ ፒኒዲ ዙምቡላ ጸራን ሃኪ ኤቂዴሰ፤ ኢሰቲ ናምኣይ ኢሶይ ኢሳፌ ኬሂ ሃኪዳ።

14 ዳዊቲ ባ ኦላ አሳኔ ኔሬ ና ኣቢኔሬ፥ «ኣቢኔሬ! ታ ኔና ጸይጊዛይሳ ሲዪኪ?» ጊ ጸይጊዴሰ። ኣቢኔሪ ኢዛሰ፥ «ካዎ ቦላ ኔ ካጫናሰ ኔ ኦኔ?» ጊ ዛሪዴሰ።

15 ዳዊቲ ኢዛሰ፥ «ኔ ሚኖ አሳ፤ ኢሰራኤሌ ጋርሳን ኔ ማላይ ኦኔ? ሄኮ ኣሲ ኔ ጎዳ ካዎዛ ዋጃናሰ ዪዴሰ፤ ሂሰቲን ኔኒ ኔ ጎዳ ካዎዛ ኣይሰ ናጋቤኪ?»

16 ኔ ሎኦ ኦላቤካ፤ ዴኦ ጎዳይ ቤኢን! ኔኒኔ ኔ አሳቲ ሃይቃና ቤሴታ፤ ጋሶይካ ጎዳይ ቲይዳ ኢንቲ ጎዳ ናጊቤኬታ፤ እኔ ጸላ፤ ኢዛ ሁኤሶን ዲዛ ካዎ ቶራይኔ ሃላ ኦይኪዛ ሚሻዚ ኣዋን ዲዞ?» ጊዴሰ።

17 ሳኦሊ ዳዊቲ ጨንጉርሰ ጊዲዳይሳ ሻኪ ኤሪዲ፥ «ታ ና ዳዊቲ! ሃይሲ ኔ ጨንጉርሴ?» ጊዴሰ። ዳዊቲካ፥ «ታ ጎዶ፥ ኤ ታ ጨንጉርሳ» ጊ ዛሪዴሰ።

18 ካሌሊዲካ፥ «ታ ጎዳይ ባ ኦሳንቻ ኣይሰ ጎዲዜ? ኣይ ኦላዲና? ኣይ ቆሃዲና?»

19 ሃኢካ ታ ጎዳ ካዎይ፥ ባ ኣይሌዛ ጨንጉርሰ ኤዘጊ ሲዮ፤ ጎዳይ ኔና ታ ቦላ ዴንሌሊዳ ጊዲኮ ኢዚ ያርሾ ሞ፤ ጊዶ አቲን ሃይሳ ኣሲ ኦሊዳ ጊዲኮ ጎዳ አቻን ቃንጌቲዳይታ ጊዴቶ፤ ጋሶይካ፥ ሳባ፥ ባዳ ሃራ ኤቃታሰ ጎይና፥ ጊዲ ጎዳ አቻን ጸንጾይ ደንታ ማላ ሃቶ ዬዴሊዳ።

20 ኣሲ ዙማ ቦላ ኩራቾ ጎዲዛ ማላ ኢሰራኤሌ ካዎይ ካሰቶሌ ኮያና ኬዚዳ ጊሻሰ ታ ሱላይ ጎዳ ሲንላፌ ሃኪዲ ቢታ ቦላ ጉካና ማላ ኦሶፋ» ጊዴሰ።

21 ሳኦሊካ፥ «ታ ና ዳዊቲ! ታ ቆሃዲሰ፤ ሃቶ ታ ሼምፖያ ኔ ሲንላን ዲዛ ጊሻሰ ሃይሳፌ ጉዬ ታ ኔና ቆሂኬ፤ ኣዳፌ ታኒ ኤያ ኦሶ ኦላዲሰ፤ ኬሃካ ባሌታዲሰ» ጊዴሰ።

22 ዳዊቲካ ኢዛሰ፡ «ካዎ ኔ ቶራ ሃይሳ ቤያ፤ ኔ ናቴላታፔ ኢሳዴይ ዪዲ ኤኮ።

23 ጎዳይ ኢሳሰ ኢሳሰ ኢዛ ጸሎቴላ ማላኔ ኢዛ አማኔቴላ ማላ ኢዛሰ ቃንጾ፤ ታኒ ጊዲኮ ሃች ጎዳይ ኔና ታ ኩሼን አሊ አሚን ታኒ ጎዳይ ቲይዳይሳ ቦላ ታ ኩሼ ዴንላቤኬ።

24 ቤኣ ኔ ሼምፖይ ታ ኣይፌ ሲንላን ቦንቹቲዳ ማላ ታ ሼምፒያካ ጎዳ ሲንላን ቦንቹቲዳር ጊዱ፤ ኢዚ ታና ሜቶ ኡባፌ አሾ» ጊ ዛሪዴሰ።

25 ሄሳፌ ጉዬ ሳኦሊ ዳዊቲሰ፡ «ታ ና ዳዊቲ! ኔ ኣንጃቲዳይሳ ጊዳ፤ ኔ ጊታ ሚሽ ኦላና፤ ኢዚካ ኔሰ ሃናና» ጊዴሰ። ሄሳፌ ጉዬ ዳዊቲ ባ ቢዛሶ ቢን ሳኦሊ ባሶ ሲሚዴሰ።

27

ዳዊቲ ፊሊሰጾሜታ ጊዶን ዴኢዳ ዱሰ

1 ዳዊቲ ጊዲኮ ባ ዎዚናራ፡ «ሃ ጋላሳታፔ ኢሲ ጋላሰ ሳኦሊ ኩሼን ሃይቆይ ታሰ አቶንታ ጊሻሰ ፊሊሰጾሜ ዴሬ ባቃታይ ታና አሻና፤ ሄሳፌ ጉዬ ሳኦሊ ታና ኢሰራኤሌ ጋርሳፌ ጎዲዛይሳ አጋጋና፤ ታኒካ ኢዛ ኩሼፔ ኩሳ ኤካና» ጊ ቆፒዴሰ።

2 ሄሳ ጊሻሰ ዳዊቲኔ ኢዛራ ዲዛ 600 ኣሳይ ዴንዲዲ ጌቴ ካዎ ማኦኬ ና ኣንኩሴኮ ቢዳ።

3 ዳዊቲኔ ኢዛራ ዲዛ ኣሳይ ኣንኩሴ ማታን ዴኢዳ፤ ኢሶይ ኢሶይ ባሶ ኣሳራ ዴሰ፤ ዳዊቲካ ባ ማቹታ ናምኣታራ ኢዝራኤሌ ዴሬ ማጫሰ ኣሂናሆሚራኔ ካሴ ናባሌ ማቾ ቃርሜሎሴ ዴሬ ማጫሰ ኣቢጋሊራ ዴሰ።

4 ሳኦሊ ዳዊቲ ጌቴ ባቃቲዳይሳ ሲዪዲ ኢዛ ጎዲዛይሳ አጋጊዴሰ።

5 ሄሳፌ ጉዬ ዳዊቲ ኣንኩሴሰ፡ «ኔ ሲንላን ታ ቦንቾ ዴሚዳ ጊዲኮ ሃኖ ዴሬዪን ዲዛ ካታማታፔ ኢሲኔይን ታ ዳና ማላ ታሰ ሶሆ አሚ። ታ ኔ ኣይሌይ ኔ ዲዛ ካታማን ኔናራ ዋና ዳኔ?» ጊዴሰ።

6 ሄሳ ጊሻሰ ሄ ጋላሰ ኣንኩሴይ ኢዛሰ ጸጊላጌ አሚዴሰ፤ ሄ ዎዴፔ ዶሚን ጸጊላጌይ ዩሁዳ ካዎታ ጸንጾ ጊዳዲሰ።

7 ዳዊቲ ፊሊሰጾሜ ዴሬን ኢሲ ላይሴኔ ኦይዱ ኣጊና ጋምኢዴሰ።

8 ሄ ዎዴ ዳዊቲኔ ኢዛ ኣሳቲ ኬዚዲ ጌሹሬ፡ ጌሪዛዌኔ ኣማለቄ ኦሊ ኦይኪዳ። ሃ ዴሬቲ ቤኒፔ ዶሚዲ ሹራፔ ቢዲ ጊብጾ ጋካናሰ ዴኢዳ።

9 ዳዊት ቢታየን ኦሊዳ ዋዴ ኣቱማስ ጊዲን ማጫስ ቢታ ቦላ ኣሺቤና። ጊዶ ኣቲን ደርሳታ፡ ሚዛታ፡ ሃሬታኔ ጋሜላታ ሄሳፋካ ማይኦታካ ኤኪ ኣንኩሴኮ ሰሚ ቢዴስ።

10 ኣንኩሴይካ፡ «ሃች ኦና ቦላ ዋራጂዴቲ?» ጊ ኦይቹን ዳዊቲ፡ «የሁዳፔ ዱጌሃ ባጋራ፡ ዋይኮ ዩራሂሞኤሌስ ዱጌሃ ባጋራ፡ ዋይኮ ቄናዌታፔ ዱጌሃ ባጋራ ዴስ» ጊዛ ዛሮ ኢሚዴስ።

11 ዳዊቲ፡ «ኢዚ ኦ ቦላ ሃይሳ ሃይሳ ኦሊዴስ ጊዲ ዮታና» ጊዲ ቆፒዳ ጊሻስ ኣቱማስ ጊዲን ዋይኮ ማጫ ሽምፖራ ፓጸ ኣሺ ጌቲ ኤኪ ዩቤና። ኢዚ ፊሊስጶሜ ዴሬን ዲዛ ዋዴ ኡባን ሄሳፋ ኦሶይ ኢዛስ ሎሴ ጊዲዴስ።

12 ኣንኩሴይ ባ ዋዚናራ፡ «ኢዚ ባ ዴሬ ኢስራኤሌ ኣሳይ ኢዛ ኬሂፔ ኢጻና ማላ ኦሊዳ ጊሻስ ኢዚ ታስ ሜርናስ ኦሳንቻ ጊዳና» ጊ ቆፒዳ ጊሻስ ዳዊቲ ኣማኒዴስ።

28

ሳኦሌ ሞይቲሌ ጴይጊዛ ማጫሳዮ

1 ሄ ዋዴ ፊሊስጶሜ ኣሳይ ኢስራኤሌ ኣሳ ኦላናስ ባ ኦላንቻታ ሺሺዴስ። ኣንኩሴይካ ዳዊቲ፡ «ኔኔ ኔ ኣሳይ ታናራ ኢሲፌ ኦላስ ኬዛናይሳ ኤሪቲ» ጊዴስ።

2 ዳዊቲካ፡ «ታኒ ኔ ኦሳንቻይ ኣይ ኦፋናኮ ኔኒ ኔ ሁኤራ ቤኣንዳሳ» ጊዴስ። ኣንኩሴይካ፡ «ኤሮ ሎኦኮ! ታ ዲዛ ላይሰ ኡባን ታ ኔና ታስ ቦንቾ ዛቤ ሂስታና» ጊዴስ።

3 ሄ ዋዴ ሳሜሊ ሃይቂ ጋሞኢዴስ፤ ኢስራኤሌ ኣሳይ ኡባይ ኢዛ ካታማን ኤራማን ዩኪዲ ሞጊዴስ፤ ሳኦሊ ማርታኔ ሞይቲሌ ሃሳይሲዛይታ ካሴ ዴሬፔ ጎዲዴስ።

4 ፊሊስጶሜ ኣሳይ ኢሲ ቦላ ሺቂቲ ዩዲ ሱኔሜን ኡቲን ሳኦሊ ቃሴ ኢስራኤሌ ኣሳ ኡባ ሺሺዲ ጊልቦኣ ዙማ ቦላ ኡቲዴስ።

5 ሳኦሊ ፊሊስጶሜ ኦላ ኣሳ ቤኢዲ ባቢዴስ፤ ኢዛ ዋዚናይ ኬሂፔ ሂርጊዴስ።

6 ኢዚ ጎዳ ኦይቹን ጎዳይ ኢዛስ ኣጉሞን ጊዲን ዋይኮ ኡሪሜን ዋይኮ ናቤታ ባጋራ ዛሮ ኢሚቤና።

7 ሳኦሊካ ባ ኦሳንቻታ፡ «ኣኔ ሃይቂዳ ኣስ ዴንፊዛ ማጫስ ታስ ኮዩቲ፤ ታኒ ባዳ ኢዙ ኦይቻና» ጊዴስ። ኢስቲካ ኢዛስ፡ «ሄኮ ሃይቂዳ ኣስ ዴንፊዛ ማጫሳያ ኤን-ዶሬን ዳዉስ» ጊዳ።

8 ሄሳ ጊሻስ ሳኦሊ ባ ማይኦ ላሚ ሃራ ማይኦ ማይኢዲ፥ ባ ሜቆካ ላሚዲ ናምኡ ኣሳታራ ኢሲፌ ኦማርስ ማጫሳይኮ ቢደስ፤ ኢዚካ ኢዞ፥ «ታሰ ሞይቲሌታ ኦይቻርኪ፤ ታ ኔሰ ዮቲዛዴ ዴንሳርኪ» ጊደስ።

9 ማጫሳያ ጊዲኮ፥ «ሄኮ ሳኦሊ ማርታኔ ሞይቲሌ ዴንሊ ሃሳይሲዛይታ ቢታፌ ኢዚ ዋስቲ ቆይሲዳኮ ኢዚ ኢስታ ቦላ ኦሊዳይሳ ኔ ኤራሳ፤ ሂስቲን ኔ ታና ዋዲሳናሲኔ ታ ሸምፖስ ዋዲማዴ ዋላናስ ኣይስ ኮያይ?» ጋዲስ።

10 ሳኦሊካ ኢዚስ፥ «ዴኦ ጎዳይ ቤኢን ሃይሲ ሃ ዮኦዚ ኔ ቦላ ቁጻቲ ኤሄና» ጊ ጫቂደስ።

11 ማጫሳያካ፥ «ኔሰ ኦና ዴንሶ?» ጋዲ ኦይቻዲስ። ኢዚካ፥ «ታሰ ሳሜላ ዴንሳ» ጊደስ።

12 ማጫሳያካ ሳሜላ ቤኢዳ ማላ ባ ቃላ ቆቁ ሂስታ ዋሳዲስ፤ ሳኦሊስ፥ «ኔ ሳኦሊ ጊዳ ኡታዳ ታና ኣዛሰ ባሌላዲ?» ጋዲስ።

13 ካዎዚካ፥ «ባቦፋ፤ ሃኢ ኔሰ ኣዚ ቤቲዛይ?» ጊደስ። ኢዛካ፥ «ኢሲ ኣያናይ ቢታፌ ፑዴ ኬዚሽን ቤኣዲስ» ጋዲስ።

14 ኢዚካ፥ «ኢዛሰ ሜቆይ ኣይ ሚሳቲዜ?» ጊ ኦይቹደስ። ኢዛካ፥ «ካባ ማይኢዳ ኢሲ ጨማ ቢታኔይ ፑዴ ኬሳ ቦላ ዴስ» ጋዲስ። ሳኦሊካ ማጫሳያ ቤኢዳይሲ ሳሜላ ጊዲዳይሳ ኤሪዴስ፤ ቢታ ቦላ ጉፋኒዲ ኢዚስ ኩሼ ዴንሊደስ።

15 ሳሜሊካ ሳኦሊስ፥ «ታና ዲፎፔ ዴንሳዳ ኣይስ ሸምፖ ዲጋይ?» ጊደስ።

ሳኦሊ፥ «ታኒ ኬሃ ጩጫዲስ፤ ፊሊስጾሜቲ ታና ኦሊሼ ዴቲስ፤ ጸሲ ታፔ ሃኪዴስ፤ ናቤታ ባጋራ ጊዲን ዋይኮ ኣጉሞን ታስ ዛሪቤና። ሄሳ ጊሻስ ታ ኣይ ኦላና ቤሲዛኮ ኔ ታስ ዮታና ማላ ኔና ጸይጋዲስ» ጊደስ።

16 ሳሜሊ ኢዛስ፥ «ሂስቲን ጎዳይ ኔፔ ሃኪኮ፥ ኔሰ ኢዚ ሞርኬ ጊዲኮ ኔ ታና ኣይስ ኦይቻይ?»

17 ጎዳይ ታ ባጋራ ኔሰ ዮቲዳይሳ ፖሊዴስ፤ ጎዳይ ኔ ካዎቲላ ኔ ኩሼፔ ዋሊ ኤኪዲ ኔ ሾሮ ዳዊቲስ ኢሚዴስ።

18 ኔኒ ጎዳስ ኣዛዜቶንታ ኣጊዳ ጊሻሲኔ ሱሊዛ ኢዛ ሃንቆዛ ኔ ኣማሌቂታ ቦላ ፖሎንታ ኣጊዳ ጊሻስ ጎዳይ ሃቕ ሃይሳ ኔ ቦላ ኦሊዴስ።

19 ጎዳይ ኔና ኢስራኤሌታ ፊሊስጾሜታስ ኣሊ ኢማና፤ ኔኒኔ ኔ ናይቲ ዋንቶ ታናራ ጊዳንዴታ፤ ቃሴካ ጎዳይ ኢስራኤሌ ኦላንቻታ ፊሊስጾሜታስ ኣሊ ኢማና» ጊ ዛሪዴስ።

20 ሳሜሊ የቲዳ ቃላፔ ዴንዲዳይሳን ሳኦሊ ባቦን ኩሚዲ ሄራካ ቢታ ቦላ ፖርጩ ጌ ኩንዲዴስ። ኩሜላ ጋላሲኔ ኦማርስ ካል ሞንታ ጊሻስ ኢዛስ ዋልቃይ ኢጲዴስ።

21 ማጫሳያ ሳኦሊኮ ያዲስ፤ ኢዚ ኬሂ ዳጋሚዳይሳ ቤያዳ ኢዛስ። «ሄኮ፣ ታኒ ኔ ኦሳንቻያ ኔ ቃላ ሲያዲስ፤ ታ ሼምፖ ባይዛዳ ኔ ታስ የቲዳይሳ ፖላዲስ።

22 ሃኢ ታኒ ኔ አሽካራያ የቲዛይሳ ሲያርኪ! ኔ ሚኔታዳ ባና ማላ ሃኖ ታ ኔስ ሺሺዛ ጉላ ካሊዮ ማ» ጋዲስ።

23 ሳኦሊ፣ «ሚኬ» ጌዲ ኢጲዴስ። ጌዶ አቲን ኢዛራ ዲዛ አሳቲ ማጫሳይራ ጌዲዲ ሚንሏ ዋሲን ኢስታ ቃላ ሲዬዴስ፤ ቢታ ቦላፌ ዴንዲዲ ሂጸ ቦላ ኡቲዴስ።

24 ማጫሳያ ባሶን ኦሃላ ማሪ ዲዛይሳ ኤሌላ ኤካዳ ሹካዲስ፤ ጉላ ጳሌ ኤካ ሙኑቃዲስ፤ ኢርሾይ ጌሎንታ ኡኬል ኡካዲስ።

25 ሂስታዳ ሳኦሊኒኔ ኢዛራ ዲዛ አሳታ ሲንሐ አላዲስ፤ ኢስቲካ ሚዳፔ ጉዬ ሄ ጋላሳ ኦማርስ ዴንዲ ቢዳ።

29

ፊሊስጶሜታ አይሲዛይቲ ዳዊቲ ኢጲዳ ኢጶ

1 ኢስራኤሌ አሳይ ኢዘራኤሌ ሾባን ዲዛ ኢሲ ፑልቶ አቻን ኡቲ ዲሺን ፊሊስጶሜ አሳይ ባንታ ኦላንቻታ ኡባ አፌቄ ጌቲቲዛሶን ሺሺዴስ።

2 ፊሊስጶሜ አይሲዛይቲ ጶቱኔ ሺ አስ ጌዲዲ ዲማ ዲማ ቆዴቲዲ ኦላስ ኬዚዳ፤ ዳዊቲኔ ኢዛራ ዲዛይቲ ቃሴ አንኩሴራ ኢሲፌ ጉዬራ ካሊ ቢዳ።

3 ፊሊስጶሜታ አይሲዛይቲ ኢስታ ቤኢዲ፣ «ሃይቲ ኢብራዌ አሳቲ ሃይሳን አይ ኦላዞ?» ጌዲ አንኩሴ ኦይቺዳ። አንኩሴይካ ኢስታስ፣ «ሃይሲ ኢስራኤሌ ካዋ ሳኦሌ ኦሳንቻ ዳዊቲ ጌዴኔ? ኢዚ ታናራ ዲስ ዶሚን ላይሏ አዲዴስ፤ ኢዚ ታ ጋርስ ዬ ጌሎሶፌ ሃቕ ጋካናስ አይ ሞሮካ ኢዛ ቦላ ዴማቤኬ» ጌ ዛሪዴስ።

4 ጌዶ አቲን ፊሊስጶሜታ አይሲዛይቲ አንኩሴ ቦላ ሃንቄቲዲ፣ «ሃይሳ አዴዛ ካሴ ኔ ኢሚዳሶ ጌዴ ጉዬ ዛራ ዬዳ፤ ኦሊቲዛ ዋዴ ሲሚ ኦ ቦላ ዴንዶንታ ማላ ኦናራ ኢሲፌ ኦላሶ ባናስ ቤሴና፤ ኢዚ ኦ አሳፔ ዋዲዲ ኢስታ ሁኔ ቃንጺ ኤኪ ቦንታ አጌኮ ባ ጎዳራ ዋኒ ሲጌታናስ ዳንዳይዜ?

5 ሃይሳፌ ካሴ ማጫሳይ ዬላን ኤዲሼኔ ሶርሼ፣
« ሳኦሊ ሺ ዋዲዴስ፣

ዳዊቲ ታሙ ሺ ዋዲዳስ»

ጌቲቲ ኢዛ ጊሻስ ዩጾቲዳ

ዳዊቲ ሃይሳ ዴኔ?» ጊዳ።

6 ሄሳ ጊሻስ ኣንኩሴይ ዳዊቲ ባኮ ጸይጊዲ፡ «ዴኦ ጎዳይ ቤኢን ኔኒ ታስ ኣማኔቲዳ ኣሳ፤ ኔኒ ታኮ ዪዳ ዋዴፔ ደሚን ሃኖ ጋካናስ ኣይኮ ሞሮካ ታ ኔ ቦላ ቤኦንታ ጊሻስ ኔኒ ታናራ ኢሲፌ ኦላስ ኬዚዳኮ ታኒ ኡፋዬታና፤ ጊዳ ኣቲን ዴራ ኣይሲዛይቲ ኔና ኮዪቤቲና።

7 ሃኢ ጊዲኮ ኔኒ ጉዬ ሲማ ሳሮን ባ፤ ፊሊስጾሜታ ኣይሲዛይታ ኡፋይሶንታዝ ኣይ ሚሺካ ኦሶፋ» ጊ ዮቲዴስ።

8 ዳዊቲካ፡ «ታ ጎዳዉ፡ ታ ኣይ ኢታ ኦሳዲና? ታ ሃ ዪዳ ዋዴፔ ደሚን ሃኖ ጋካናስ ኔ ኦሳንቻዛ ቦላ ኣይ ሚሽ ዴሚዳ? ሂስቲን ታኒ ታ ጎዳ ካዎዛ ሞርኬታ ኣይሰ ኦሊኪና?» ጊ ኦይቺዴስ።

9 ኣንኩሴይ ዳዊቲስ ዛሪዲ፡ «ታ ሲንሳን ኔኒ ጸሳ ኪታንቻ ማላ ሎኦ ጊዲዲይሳ ታ ኤራይስ፤ ጊዳ ኣቲን ፊሊስጾሜ ዴሬታ ኣይሲዛይቲ፡ ሒዚ ኦናራ ኦላሶ ባናስ ቤሴና» ጊዳ።

10 ሃኢ ጊዲኮ ኔና ኢሲፌ ዪዳ ኔ ጎዳ ኦሳንቻታራ ኢሲ ቦላ ዋንቶ ማላዶ ጸልቂይ ዋዲዳ ማላ ካሴ ኢንቲ ዲዛሶ ጌዴ ጉዬ ሲሚ ቢቲ» ጊዴስ።

11 ሄሳ ጊሻስ ዳዊቲኔ ኢዛራ ዲዛ ኣሳቲ ጉዬ ፊሊስጾሜታ ዴራ ሲማናስ ዋንታራ ዴንዲ ቢዳ፤ ፊሊስጾሜቲካ ፑዴ ኢዝራኤሌ ኬዚዳ።

30

ኣማሌቂታ ቦላ ዴንዲዳ ኦላ

1 ሄዻንሶ ጋላስ ዳዊቲኔ ኢዛራ ዲዛ ኣሳይ ጸቂላጌ ጋኪዳ፤ ኣማሌቂ ኣሳይ ኔጌቤኔ ጸጊላጌ ኦሊ ኦይኪዳ፤ ሂስቲዲ ጸቂላጌ ጸጊዲ።

2 ማጫሳታ፡ ሄን ዲዛ ናቲላታኔ ጨማታ ኡባ ዲኢ ኤፊዳ ኣቲን ኢስታፊ ኢሳዳካ ዋዲቤቲና።

3 ዳዊቲኔ ኢዛራ ዲዛ ኣሳቲ ጸቂላጌ ጋኪዳ ማላ ካታማያ ጸጊቲዲይሳ፡ ኢስታ ማቺቲ፡ ኢስታ ኣቲማ ናይቲኔ ኢስታ ማጫ ናይቲ ዲኤቲ ቢዲይሳ ኤሪዳ።

4 ሄ ዋዴ ዳዊቲኔ ኢዛራ ዲዛ ኣሳቲ ኢስታስ ቃላይ ሾሪቃና ጋካናስ ባንታ ቃላ ቶቁ ሂስቲ ዩኪዳ።

5 እዝራኤል ዳሬ እስ አሂናሆማኔ ካሴ ቃርማሎሴ ዳሬ እስ ናባሌ ማቾ አቢጋላ ሃይቲ ዳዊቲ ማቾ ናምኣቲካ ዲኤቲዳ።

6 ኢዛራ ዲዛ አሳይ ባንታ ኣቱማ ናይታ ገሻሲኔ ባንታ ማጫ ናይታ ገሻሰ ዩሎቲዲ ኢዛ ሹቻን ጫዳናሰ ዞሬቲዳ፤ ሂስቲን ዳዊቲ ኬሂ ጨጨደሰ፤ ጊዶ ኣቲን ዳዊቲ ጎዳ ባ ጸሳን ሚኔቲደሰ።

7 ሃሳፌ ጉዬ ዳዊቲ አሂማሌኬ ና ቄሴ አቢያታሬ፥ «ኤፋዴዛ ታስ ሃ ኤካ ያ» ጊደሰ፤ አቢያታሬይካ ኤፋዴዛ ኢዛሰ ኤሂደሰ።

8 ዳዊቲ ጎዳ፥ «ሃይታ ዲኢ ኤፊዛ ኦላንቻታ ካሎ? ታ ኢሰታ ጋካ ኦይካኔ?» ጊ ኦይቺደሰ። ጎዳይ ኢዛሰ፥ «ኤ ካላ! ኔ ኢሰታ ጋካ ኦይካና፤ ኢሰቲ ዲኢ ኤፊዳይሳ ኔ ዛራና» ጊደሰ።

9 ሂስቲን ዳዊቲኔ ኢዛራ ዲዛ 600 አሳይ ቦሶሬ ሻፋ ዩዳ፤ ጉላቲ ቦሶሬ ሻፋን ታኪዳ።

10 ናምኡ ጾቱ አሳቲ ኬሂ ዳቡርዳ ገሻሰ ሻፋ ፒናና ዳንዳይቤቲና። ጊዶ ኣቲን ዳዊቲኔ ኢዛራ ኣቲዳ 400 አሳይ ካሊ ቢደሰ።

11 ኢሰቲካ ባዞ ቢታን ጊብጾ ዳሬ እስ ኢሳ ደሚዲ ኢዛ ዳዊቲኮ ኤኪ ዩዳ፤ ኢዛሰ ሚዛ ካሊኔ ኡዩዛ ሃላ ኢሚዳ።

12 ቃሴካ ባላሴፔ ኡኬቲዳ ቄሪ ኡኬላ ሜንሶኔ ሜሊዳ ናምኡ ዛቢቤ ዉርጮታ ኢዛሰ ኢሚዳ። ሄዙ ጋላሲኔ ሄዙ ኦማርሰ ኣይኮ ካሊካ ሞንታ ገሻሲኔ ሃሊካ ኡዮንታ ገሻሰ ሃይታ ሚዳፔ ጉዬ ኢዛሰ ሽምፖይ ሲሚደሰ።

13 ዳዊቲ ኢዛ፥ «ኔ ኦና ኦሳንቻ? ኔ ዩዳይ ኣዋፔ?» ጊ ኦይቺደሰ፤ ኢዚካ፥ «ታኒ ጊብጾ አሳ፤ ታኒ ኢሲ ኣማሌቄ ዳሬ አሳሰ ኣይሌ፤ ታኒ ሳኬቲዳ ገሻሰ ሄዙ ጋላሳፌ ካሴ ታ ጎዳይ ታና ዬጊ ኣጊ ቢደሰ።

14 ኬሊቲታስ ዱጌሃ ባጋራ ዲዛ ዳሬ፥ ዩሁዳይ ኣይሲዛ ዳሬኔ ካሌቤስ ዱጌሃ ባጋራ ዲዛ ቢታ ዋራጂዲ ጸጊላጌ ካታማ ታማን ጸጊደሰ» ጊ ዛሪደሰ።

15 ዳዊቲካ፥ «ሃኢ ኔ ታና ሄ ዋራጂዳ ኦላንቻቲ ዲዛሶ ካሌላ ጋላኔ?» ጊ ኦይቺደሰ። ኢዚካ ዳዊቲሰ ዛሪዲ፥ «ኔ ታና ዋራንታ ማላኔ ታ ጎዳሰ ኣላ ኢሞንታ ማላ ታስ ጸሳን ጫቃ፤ ሂስቲኮ ሄ ዋራጂዳ ኦላንቻቲ ዲዛሶታ ታ ኔና ጋላና» ጊደሰ።

16 ሄሳፌ ጉዬ ኢዚ ዳዊቱ ካሌሉ ኤፊ ጋሊሽን ዋራጂዳይቲ ፊሊስጶማፔኔ የሁዳፔ ዲኢ ኤኪዳ ዳሮ ሚሻፌ ዴንዲዳይሳን ዲማ ዲማሶን ሚሹ፥ ኡዩሹ፥ ዩዲሹኔ ጉፒሹ ዴቲስ።

17 ዳዊቲ ሄ ጋላሳ ኦማርሳፌ ዶሚዲ ዋንቴላ ጋላሳ ኦማርስ ጋካናስ ኢስታ ኦሊዴስ፤ ጋሜላ ቶጊዲ ባቃቲዳ 400 ናቴላታፔ ኣቲን ኢስታፌ ኬሲ ኤኪ ኣቲዳይ ሃራይ ዴና።

18 ዳዊቲ ኣማሌቄ ኣሳይ ኤኪ ቢዳይሳ ኡባ ዩጊሲዴስ፤ ባ ማቼታ ናምኣታ ዋሉ ኤኪዴስ።

19 ዳዊቲ ጉላታ ጊዲን ጊታታ፥ ኣቱማ ናይታ ጊዲን ማጫ ናይታ፥ ዲኤቲዳዝ ጊዲን ሃራ ሚሽ፥ ኣማሌቄቲ ኤፊዳይሳፌ ኢሲናካ ፓጮንታ ዛሪዴስ።

20 ቃሴካ ዳዊቲ ዶርሳ ዉዴታ፥ ዴይሻ ዉዴታ፥ ሚዛ ዉዴታ ኡባ ኤኪዴስ፤ ኣሳይካ፥ «ሃይሲ ኡባይ ዳዊቲ ዲኢዳይሳ» ጊሹ ሄ ዉዴ ሜሄዛ ሃንኮ ሜሄታፔ ሲንሐ ኣሉ ሳጊዳ።

21 ሄሳፌ ጉዬ ዳዊቲ ኬሄ ዳቡርዲ ካላናስ ዳንዳዮንታ ጊሻስ ቦሶሬ ሻፋን ኢስታፌ ጉዬ ኣቲዳ 200 ኣሳታኮ ሲሚ ዩዴስ፤ ኢስቲካ ዳዊቲኔ ኢዛራ ዲዛ ኣሳ ሞካናስ ኬዚዳ፤ ዳዊቲኔ ኢዛራ ዲዛ ኣሳይ ኢስታኮ ጋኪዳ ማላ ዳዊቲ ኢስታ ሳርኪዴስ።

22 ጊዶ ኣቲን ዳዊቲ ካሊዛይታ ጊዶፌ ኢታ ኣሳቲኔ ሹፋር ኣሳቲ ኡባይ፥ «ኢስቲ ኦናራ ኦላሶ ቦንታ ኣጊዳ ጊሻስ ኦ ዲኢ ኤሄዳይሳፌ ኢስታስ ኢሞኮ፤ ጊዶ ኣቲን ኢስቲ ኢሶይ ኢሶይ ባ ማቼታኔ ባ ናይታ ኤኪ ባናስ ዳንዳዬቴስ» ጊዳ።

23 ዳዊቲ ዛሪዲ፥ «ታ ኢሻቶ! ኦና ናጊዳይ፥ ኦ ቦላ ዩዳ ኦላ ኦ ኩሹን ኣሉ ኢሚዳይ ጎዳ፤ ኢዚ ኦስ ኢሚዳ ሚሻን ኢንቴ ሃይሳሶ ኦላናስ ቤሴና።

24 ኢንቴ ጊዛይሳ ኦኔ ኤካናይ? ኦላ ሚሻ ናጊዛይታ ጊሻይኔ ኦላስ ቢዳይታ ጋኪዛ ጊሻይ ዲማቴና፤ ኡባይካ ኢሲ ጊና ጊሹታና» ጊዴስ።

25 ዳዊቲ ሄዴፔ ዶሚዲ ሃኖ ጋካናስ ሃይሳ ኢስራኤሌስ ዋጋኔ ማራ ሂስቲ ዋሉዴስ።

26 ዳዊቲ ጸጊላጌ ዩዳ ዋዴ ኢዛስ ሲቆ ላጌ ጊዲዳ የሁዳ ጨማታስ፥ «ኢንቴስ ጎዳ ሞርኬታፔ ኦ ዲኢ ኤኪዳይሳ ሃይሳ ኢንቴስ ኢሞታ ቤኢቴ» ጊዲ ዲኢ ኤሆይሳፌ ኢስታስ ሻኪ ዩዲዴስ።

27 ሄሳካ ቤቴሌን፥ ኤራሞቴፔ ዱጌሃ ባጋን ዲዛይታሲኔ ዩቴሬን ዲዛይታስ።

28 ኤሪኦሬን፥ ሲፊሞቴን፥ ኤሽታሞኣኔ

29 ኤራካሌን ዲዛይታስ ሄሳፉካ ዩራሂምኤሌ ቆሞቲኔ ቄናዌቲ ዲዛ ካታማታን ዲዛይታስ፤
 30 ሆርማን፣ ቦራሳኔን፣ ኣታኬን
 31 ኬብሮኔን ሄሳፉካ ዳዊቲኔ ኢዛራ ዲዛይቲ ዩዩዳሶን ዲዛይታ ኡባታስ ዩዲዴስ።

31

ሳኦሌ ሃይቆ (1ተሪ 10:1-12)

1 ሄ ዋዴ ፊሊስጶሜ ኣሳይ ኢስራኤሌ ኣሳ ኦሊዴስ፤ ኢስራኤሌ ኣሳይ ኢስታ ሰንሓፌ ባቃቲዴስ፤ ዳሮ ኣሳይ ጌልቦኣ ዙማ ቦላ ጫዴቲ ሃይቂዴስ።

2 ፊሊስጶሜ ኣሳይ ቃሴ ሳኦሌኔ ኢዛ ናይታ ካሌቲ ጋኪዲ ዮናታኔ፣ ኣቢናዳቤኔ ማልኬሹኣ ዋፏዳ።

3 ኦላዚ ሳኦሌ ቦላ ሚኒዴስ፤ ዋንዳፌን ዲኪዛይቲ ኢዛ ዲኪዲ ኬሂ ማዲንሒዳ።

4 ሳኦሊ ባ ጎንዳሌ ኦይኪዛይሳስ፡ «ሃይቲ ቃጸፊቶንታይቲ ታና ጫዶንታ ማላኔ ካዉሾንታ ማላ ኔኒ ኔ ማሻን ታና ጫዳ» ጌዴስ። ኢዛስ ጎንዳሌ ቶኪዛይሲ ኬሂ ባቢዳ ጌሻስ ጫዶንታ ኢዲዴስ። ሂስቲን ሳኦሊ ባርካ ባ ጌላ ማሻ ቦላ ኩንዲ ሃይቂዴስ።

5 ኢዛ ጎንዳሌዛ ኦይኪዛይሲ ሳኦሊ ሃይቂዳይሳ ቤኢዲ ኢዚካ ባ ጌላ ማሻ ቦላ ኩንዲዲ ኢዛራ ኢሲፌ ሃይቂዴስ።

6 ሳኦሊኔ ኢዛ ና ሄሻቲ፣ ኢዛ ጎንዳሌ ኦይኪዛይሲኔ ኢዛራ ዲዛ ኣሳቲ ኡባይ ሄ ጋላስ ሃይቂዳ።

7 ዙሌዛፔ ሄ ፒንላኒኔ ዮርዳኖሴ ሻፋፔ ፒንላን ዲዛ ኢስራኤሌ ኣሳይ፣ ኢስራኤሌ ኦላንቻቲ ባቃቲዛይሳ፣ ሳኦሊኔ ኢዛ ናይቲ ሃይቂዳይሳ ቤይዳ ዋዴ ባንታ ካታማታ ዩዲ ባቃቲዳ፤ ፊሊስጶሜ ኣሳይ ዩዲ ሄ ካታማታን ኡቲዳ።

8 ዋንቴላ ጋላስ ፊሊስጶሜ ኣሳይ ሃይቂዳ ኣሳ ቦላፌ ኦላ ሚሻ ቃራታናስ ዩዛ ዋዴ ሳኦሊኔ ኢዛ ና ሄሻቲ ጌልቦኣ ዙማ ቦላ ኩንዲዳይታ ቤኢዳ።

9 ሄሳፌ ጉዬ ሳኦሌ ቆጼ ቃንጺዲ፣ ኢዛ ኦላ ሚሻካ ቃራቲ ኤኪዲ፣ ሚሺራቸዛ ባንታ ኤቃ ጸሳታ ኬላን ኬላኒኔ ባንታ ዴራ ጌዶን ኣዋጃና ማላ ፊሊስጶሜ ዴሬ ኡባኮ ቃስታኔ ዩዲዳ።

10 ኢዛ ኦላ ሚሻታ ኣስታሮቲ ጌቲቲዛ ኤቃ ጸሳ ኬላን ዋሒዳ፤ ቃሴ ኢዛ ኣሃዛ ቤቲሳኔ ካታማ ጊምቤ ቦላ ካቂዳ።

11 ጋላኣዴን ዲዛ ያቡሴ ኣሳይ ፊሊስጽሜ ኣሳይ ሳኦሌ ቦላ ኦሊዲይሳ ሲዪዲ ዋዴ፥

12 ኦላ ቃራቲ ኡባይ ኦማርሳራ ቤቲ-ሳኔ ቢዲ፤ ሳኦሌ ኣሃኔ ኢዛ ናይታ ኣሃ ጊምቤዛ ቦላፊ ዋሊዲ፤ ሂስቲዲ ያቡሴ ካታማ ኤሂዲ ታማን ጸጊዲ።

13 ሂሳፌ ጉዬ ኢስታ ሜቄሳታ ኤኪዲ ያቡሴን ካታማ ጊድን ዲዛ ታማርሲኬ ጌቴቲዛ ሚላ ጋርሳን ሞጊዲ፤ ሂስቲዲ ላፑን ጋላስ ጸሚዲ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b